

LOS HECHOS

DE LOS APOSTOLES

1 ¹ Zuma Teófilo, tuqui wejrqui tsjii libro cjijrchinča tjapa Jesucristuž puntuquiztan. Jesusiž ojklaytanacami tjaajintanacami cjijrchinča, nasta tjuñquiztan, ² arajpacha quejpsquiz tjuñicama. Ima arajpacha quejpžcan Jesusižtan Espíritu Santužtan apostolonacžquin mantichiča, jaknužt kamz waquizičhaja, jalla nii. ³ Jesusaqui ticziquiztan jacatatžcu tii yokquiz iya pusi tunc tjuñi žejlchiča niiz apostolonacžquiz persuna tjon tjonzjapa. Tjon tjonžcan, kjanapacha tjeeziča, “Jacatatchinča”, cjican. Nižaza jaknužt Yooz mantuquiz kamz waquizičhaja, jalla nii tjaajinchiča.

⁴ Tsjii nooj niiz apostolonacžtan juntjapžcu, Jesusaqui ninacžquiz chiižinchiča, tuž cjican:

—Anača tii Jerusalén wajtquiztan ulnaquiča. Tekziča tjewznaquiča ančhucqui, wejt Yooz Epiž chiita taku cumpliscama. Niiqui Espíritu Santo cuchanžcaquiča; jalla niicamaž tjewznaquiča. Tuqitan wejrqui anchucaquiz nii puntu paljaychinpantača. ⁵ Juan Bautistaqui kjazan bautissipanča. Anzihi tsjii kjaž majquiztan ančhucqui Espíritu Santužtan bautistaž cjequiča. —Nuž cjichiča Jesusaqui.

JESUCRISTUQUI ARAJPACHQUIN QUEJPCHIČHA

⁶ Apostolonacaqui Jesusižtan juntjapsi cjen, pewcziča, tuž cjican: —Wejt Jiliri, łanzpacha amqui tii Israel wajtchiz žoñinaca ninacž quintranacžquiztan liwriyaquiya? ¿Tii žoñinaca persuna mantisjapaya?

⁷ Nekztanaqui Jesusaqui ninacžquiz kjaaziča, tuž cjican:

—Yooz Ejppankazza timpunacaqui mantiñiqui, čhjulatorat tii tii watačhaja, jalla nii. Nižaza Yoozqui ančhucaquiz ana zizkatz munča, čhjulatorat tii Israel žoñinaca liwriita cječhaja, jalla nii. ⁸ Pero Espíritu Santuž ančhuca kuzquiz luztan, ančhucqui tjup kuzziz cjequiča. Jalla nekztan ančhucqui wejt puntuquiztan paljayñi ojklayaquiča Jerusalén wajt yokaran, nižaza Judea yokaran, nižaza Samaria yokaran, nižaza tjapa kjutñi. —Jalla nuž cjichiča Jesusaqui.

⁹ Nekztan apostolonacaž cheran Jesusaqui ninacž taypiquiztan tsewcchuc waytissiča. Yooz Epiž chjichtatača arajpacha. Nužquiz tsjir taypiquiz katchiča Jesusaqui. Ana iya tjenčiča. ¹⁰ Nekztanaqui tsewcchuc cheksnan, pucultan chiw zquitchiz žoñinacažtakaz jeczquichiča ninacž

žcati. ¹¹Nii pucultan anjilanacaqui tuž cjichiča:

—Galilea žoñinaca, ěkjažtiquiztan ančhucqui tsewcchuc chekžqui? Jesusaqui ančhucaquiztan arajpacha chjichtača. Pero tsjii nooj nii Jesusapacha wilta tii muntuquiz quejpžcaquiča, jaknužt tsjir taypiquiz katčhaja, jalla nuž tsjir taypiquizzakaz jecžcaquiča. Nuž tjonaquiča. —Nuž cjichiča anjilanacaqui.

MATIASQUI ILLZTA APOSTOL CJISSIČHA

¹²Jalla nekztanaqui apostolonacaqui Olivos cjita curullquiztan chjijwžquiču, Jerusalén watja quejpchiča. Jerusalén watjaqui nii curullquiztan žcatitača, jeejz tjuñquiz jaknužt judiuz lli jaru ojkz waquzičhaja, jalla nužullquin ojkztača. ¹³Jerusalén watja irantižcu apostolonacaqui alujta kjuya luzziča; tsewcta altu pisuquin alujtatača.

Nii apostolonacaqui tinacatača: Pedrotiča, Jacobotiča, Juantača, Andrestača, Felipitāča, Tomastača, Bartolomitača, Mateotiča, Jacobo cjita Alfeož majčtača, Simonatača (niiqui cananista cjita partir žoñitača), nižaza Judas cjita Jacobož majčtača. Jalla ninacatača apostolonacaqui.

¹⁴Tjapa ninacaqui tsjii kuzziz Yoozquin mayizizjapa ajcajczñipantača. Ninacžtan chica želatča Jesusiž lajknacžtan, Jesusiž maatan, nižaza yekja maatakanacžtan. Tjappacha Yoozquin mayizican želatča.

¹⁵Tsjii noojiqui jalla nuž chicapacha želan Pedruqui tsijtsiča, nii Yoozquin criichi žoñinacž taypiquiz. Nii oraqui tsjii patac paatuncani nužquintakalča nii criichi žoñinacaqui. Pedruqui ninacžquiz cjichiča:

¹⁶—Jilanaca, cullaquinaca, Judasqui Jesusa tanñi žoñinaca irpichiča.

Tuquitan jalla nii Judas puntuquiztan Espřitu Santuqui Davidžquiz mazinchiča, Yooz tawk liwruquiz cjiirta cjisjapa. Nižaza nii Espřitu Santuž mazintaqui cumplispantača. Jaziqui cumplissiča. ¹⁷Judasqui učhum partiquiztantača. Nižaza Yoozta langžñiquiz uchtatača. ¹⁸Nii anawali paañi Judasqui Jesusa tarasunta paaztan tsjii yoka kjaychiča. Nekztan, kozzuc achchiz tjojtscu, walu pjatsi ticziča. ¹⁹Tjapa Jerusalén wajtchiz žoñinacaqui nii Judas quintu zizza. Jalla nii quinto nonžcu, Judas kjayta yoka tjuuskatchiča, Acéldama cjican. Acéldama tjuuqui ninacž tawkquiztan “Ljoc Yoka” cjiča. ²⁰Judas puntuquiztan Salmos cjita liwruquiz tuž cjiirtača: “Niiž kjuyaqui jaytitaj cjila. Nižaza ana jecmi nii kjuyquiz kamla”. Salmos cjita liwruquiz tuž zakaz cjiirtača: “Niiž puestuquiz yekja uchtaj cjila”.

²¹Pedruqui tira chiichiča, tuž cjican:

—Jalla nii Yooz takuž cjen učhumnacquiztan tsjiiqui illza, Judas puesto tanzñijapa. Jaziqui nii puesto tanzñi žoñiqui tjapa wejrnacaž Jesusižtan ojklayta timpu cumpant'ichi žoñinacžquiztan illzta cjistanča. ²²Juanž bautis timpu jalla nijctanpacha Jesusa arajpacha ojkcama, jalla nii timpu cumpant'ichi žoñinacžquiztan nii žoñiqui illzta cjistanča. Nekztan nii žoñiqui wejtnacatan chicapacha cjequiča, Jesusaž jacatatta puntu paljayzjapa. —Nuž cjichiča Pedruqui.

²³Nekztanaqui pucultan žoñi illsiča, tsjiiqui Judas puesto tanzñijapa. Tsjiiqui José cjitatača, nižaza Josiqui Barsabás cjitazakaztača. Nižaza Josiqui Justo tjuuchizzakaztača. Tsjiizuñqui Matías cjitatača.

²⁴Nekztan nii ajczñi žoñinacaqui mayizichiča, tuž cjican:

—Jesús Jiliri, amqui tjapa žoñinacž kuz zizza. Jaziqui tii pucultiquiztan amiž illzta apóstol tjeeznalla. ²⁵Niiqui Judas puestuquiz uchtaž cjequiča, amquin sirwiñiž ojklajzjapa. Judasqui nii puestuqui pertichiča anawali uj paažcu. Jaziqui infieruquin ojkečiča. Jalla nuž niižtaqui waquizichiča.

—Jalla nuž mayizichiča.

²⁶Nekztanaqui ject Jesusiž illzta, jalla nii zizjapa, zurtiassiča, nii pucultiquiztan jakziltižquiz nii zurti cayačhaja, jalla nii. Jalla nuž zurtiascu, nii zurtiqui Matiasquiz caychiča. Jalla nekztan Matiasqui nii parti tuncaman illzta apostolonacžtanuntu cjissiča. Lijitum apóstol nužquiz cjissiča.

YOOZ ESPIRITU SANTUQUI TJONČHA

2 ¹Pentecostés cjita pjijsta tjuñquiz tjapa Jerusalén žejlñi criichi žoñinacaqui juntassiča tsjii kjuyquizkaz. ²Tiripintit tsewctan tsjii chawc tjamž joražtakaz nonziča. Tjapa nii kjuya zmali kjaazkatchiča. ³Jalla nekztanaqui uj lastakaz jeczquichiča zapa mayni ninacž juntučama t'akža, yekja yekja. Jalla nuž zapa maynižquiz nii ujnacaqui želatča. ⁴Jalla nuž tjonžcu Espíritu Santuqui tjapa ninacžquiz luzziča. Nekztan ninacaqui parijunaca yekja yekja taku chiichiichiča, jaknužt nii Espíritu Santuž chiikatčhaja, jalla nii.

⁵Nii timpunacaqui Jerusalén wajtquin wacchi judío žoñinaca kamñi želatča, ninacž cuzturumpi jarupan paañi. Nii judío žoñinacaqui tjapa kjuttan ajczquichitača. ⁶Jalla nii suyniñi jora nonžcu, žoñinacaqui juntassiča. Zapa mayni nii žoñinacaqui persun taku nonziča.

Nekztan ana tantiichuca, čhjulut watačhaja, nii. ⁷Jalla nižtiquiztan ninaca ancha kuz turwaysi cjissiča. Ispantichi ninacpora parlassiča, tuž cjican:

—ČTjapa nižta chiichiñinacaqui anaj Galilea wajtchiz žoñinacajo? ⁸Zapa mayni učum persun takuž nonža. ČJaknužupan teejo? —Jalla nuž cjichiča.

⁹Nekz želatča Partia žoñinaca, nižaza Media žoñinaca, nižaza Elam žoñinaca, nižaza Mesopotamia žoñinaca, nižaza Judea žoñinaca, nižaza Capadocia žoñinaca, nižaza Ponto žoñinaca, nižaza Asia yokchiz žoñinaca, ¹⁰nižaza Frigia žoñinaca, nižaza Panfilia žoñinaca, nižaza Egipto žoñinaca, nižaza Africa žoñinaca, nii Afric yokaqui Cirene yokž nawjktuñtan. Nižaza Roma wajtquiztan tjonñi žoñinaca želatča. Yekjapanacaqui judío maa ejpchiz žoñinacatača. Yekjapanacaqui ana judío maa ejpchiz cjenami judionacž cuzturumpi paañi žoñinacapantača. ¹¹Nižaza želatča Creta wajtchiz žoñinaca, nižaza Arabia žoñinaca. Nii žoñinacaqui parlassiča, tuž cjican:

—Wacchi watjanacchiz žoñinacala učhumtanaqui. Pero zapa mayni učum persun takunacž nonžla. iNii tjapa takunacžtan chiñinacaqui Yooziž ispanrichuca paatanaca quint'ila!

¹²Jalla nuž chiichiñi nonžcu tjappacha ispanrichiča. Kuz turwaysi cjissiča. Nekztan pewcsassiča, tuž cjican:

—Nii puntuquiztanac, čkjažt cjeejo?

¹³Yekjapanacaqui iñarchiča, tuž cjican:

—Aaaa, ninacaqui licchikazza.

PEDRUQUI ŽOÑINACŽQUIZ PALJAYCHIČHA

¹⁴Nekzpacha tsijtsi želatča nii tuncapan illzta apostolonaca. Jaziqui

Pedruqui altu joržtan paljaychiča, tuž cjican:

—Judea yokquiz kamñi žoñinaca, nižaza Jerusalén wajtquiz žejlñi žoñinaca, wejt taku zumpachaž nonžna. Čhjuluzłaja, jalla niil kjanzt'ača. ¹⁵ Ančhucqui “Tii žoñinaca licchikaz” cjican pinsiča. Pero tii žoñinacaqui anača licchi. Anzic wenzlakača. ¹⁶ Anziqui Joelž cjiřta Yooz taku cumplissa. Nii Joelqui Yooz cuntiquiztan mazinchiča, tuž cjican:

¹⁷ “Yoozqui tuž cjiča, Tii timpu tucuzinžtan wejrqui tii muntuquiz žejlñi žoñinacžquiz wejt Espíritul tjaača. Wejt Espíritu Santuž kuzquiz luzziz cjen, ančhuca maatinacaqui lucmajch cjiñi tjunmata cjiñi wejt takuž parlaquiča. Nižaza Espíritu Santuž cjen tjtjowaqui visionanaca cheraquiča. Nižaza chawc chawcwanacaqui wiyquin chjuuznaquiča. ¹⁸ Jalla nii timpuquiz wejt sirwiñinacžquiz luctaka cjiñi maataka cjiñi wejt Espíritu cuchanžcača. Nii Espírituž cjen, ninacaqui wejt takuž parlaquiča. ¹⁹ Tsewc arajpachquinami tii yokquizimi wejrqui ispantichuca siñalanaca tjeeznača, ljocnaca, ujnaca, tsokchi tsjirinaca, uj žketižtakaz, jalla nuž. ²⁰ Ima Jesucristo Jiliriž tjonan, tjuñiqui zumchi cjisnaquiča. Nižaza jiizmi ljocžtakaz cjisnaquiča. Jalla nižtanaca watan, wajillaž Yooz chawc tjuñiqui tjonaquiča, Yooz wali azi tjeeznñi tjuñi. ²¹ Nii timpuquiziqui jakziltat liwriita cjisjapa Yooz Jiliržquin mayizičaja, jalla niiqui liwriitaž cjequiča”.

Jalla nuž cjiřchiča Joelqui.

²² “Israel wajtchiz žoñinaca, wejt taku nonžna. Jesusaqui Nazaret wajtchiz žoñitača. Ančhuca watjanacquiz ojklaycan Jesusaqui Yooz aztan ispantichucanacami, milajrunacami, siñalanacami, jalla ninaca tjeeziča. Nii tjeežta obranaca ančhucqui zizza. Jalla nii obranacaqui kjanapacha tjeeziča, Jesusaqui Yooz Epiž cuchanžquita žoñipankazza, jalla nii. ²³ Jalla nuž pajk obranaca paachiž cjenami ančhucqui Jesusa conkatchinčhucča. Nekztanaqui ančhucqui uj paañi žoñinacžquiz Jesusa intirjichinčhucča cruzquiz ch'awczjapa. Tuquitanpacha Yooz Ejpqui jalla tižtanaca watzpan zizatča. Nižaza niiž muntacama tii watzjapa mantichiča. ²⁴ Ančhucqui Jesusa conkatchinčhucča. Yooz Ejpzi Jesusa jacatatskatchiča. Anawal ticzquiztan liwriichiča. Nii ticzqui Jesusižquiztanaqui anapantača atipchuca. ²⁵ Tuqui ažk watanaca David cjita jiliriqui Jesusiž puntu cjiřchiča tuž cjican:

“Yooz Jiliri wejttan chica željñipanča. Jalla nuž wejt kuzquiz Yoozquin zint'iñpanča. Yoozqui wejt žew latuquiz žejlča, wejr yanapzjapa, nižaza wejr ana čhjulquiztanami eksnajo. ²⁶ Jalla nižtquiztan wejt kuzqui wali cuntintutča. Chipchipcan wejt tawkžtan Yoozquin honorat tjaa-uča. Ticz cjenami, Yoozquin kuzziztča, Yooz Ejpqui wejr jacatatskataquiča. ²⁷ Yooz Tata, amqui ticzi žoñinacžtan wejt alma anam ecaquiča. Wejrqui am lijitum sirwiñi žoñtqui. Jaziqui wejt curpuqui anam ecaquiča sipulturquiz mokajo. ²⁸ Nižaza wejtquiz arajpach

kamaña tjaajinchamcha. Tii muntuquiz amtan chica kamcan ancha cuntintul cjeecha”.

Jalla nuž Jesusiž puntuquiztan cjiirchiča Davidqui.

²⁹Jilanaca, učum David cjita tuquita atchi ejpž puntuquiztan kjanapacha intintiskats pecuča. David jiliriqui ticziča. Nižaza tjattatača. Anzcamaniž sipulturuqui učum yokquiz žejlča. ³⁰Davidqui illztatača Yooz taku chiiñijapa. Yooz Ejpqui nižquiz juramintužtan compromitchalča tuž cjican: “David, tsjiiqui am majchmaatquiztan (Cristo cjita) pajk jiliri cjequiča. Niiqui mantiz puestuquiz uchtaž cjequiča, tii wajtchiz žoñinaca mantizjapa.” Jalla nuž Yoozqui Davidžquiz compromitchiča. ³¹Jalla nii zizcu, Davidqui tuquitanpacha Cristuž jacatatz puntuquiztan chiichiča, tuž cjican: “Cristuž almaqui ticzi žoñinacžtan anaž ecta cjequiča. Nižaza Jesucristuž curpumi anaž mokaquiča.” Jalla nuž Cristuž puntuquiztan chiichiča. ³²Jaziqui Yooz Ejpqui nii Jesucristo jacatatskachiča. Jacatattan, wejrnapachača Jesucristo cherchintqui. Jaziqui tisticu cjican, nii puntu weraral chiyasača. ³³Jesucristuqui jacatatžcu, Yooz Ejpž žew latuquiz walja honorchiz cjissiča, Yooz Ejpžtan chica mantiñi. Nižaza Yooz Epiž tuquita chiita tawklararu Jesucristuqui Espiritu Santo žoñinacžquiz cuchanžquichiča arajpachquiztan. Nii Espiritu Santuž tjonchiž cjen tii ančucaž chertanacami nonztanacami watchiča. ³⁴Davidqui persun puntuquiztan ana chiichiča. Davidča tsewc arajpachquin ana ojkhiqui, Yooztan mantizjapa. Davidpachača tuž cjichiqui:

“Wejt Yooz Ejp Jiliriqui wejt Yooz Majch Jiliržquiz chiichiča:

‘Honorchiz cjisjapa, wejt žew latuquiz julzna wejtan chica mantizjapa. ³⁵Tsjii noojiqui am quintr žoñinaca k'ala atipžtaž cjequiča. Am kjojch koztan tjecžtažtakaz cjequiča. Jalla nii oracama wejt žew latuquiz julzna’ ”.

³⁶‘Ančhucqui Jesucristo cruzquiz ch'awccchinčhucča. Pero anziqiu Yooz Ejpqui tii Jesusa tsjan chawc jiliri utchiča žoñinaca liwriizjapa. Jalla nuž intintiñi waquizila tjapa Israel wajtchiz žoñinacaqui. Ultim werarača tii takuqui. —Nuž cjican Pedruqui paljaychiča.

³⁷Jalla nuž nonžcu nii žoñinacaqui persun kuzquiz ancha zint'ichiča. Jalla nižtiquiztan Pedružquizimi parti apostolonacžquizimi pewcziča, tuž cjican:

—Jilanaca, čkjažt cjisnaqui? Ččhjulut wejrnac paaqui?

³⁸Nekztanaqui Pedruqui kjaaziča, tuž cjican:

—Ančhucqui persun uj pajžcu, kuz campiya. Nekztanaqui Jesucristuž tjuuquiz bautistaž cjee. Jalla nekztanaqui ančuca ujnaca pertuntaž cjequiča. Nižaza Yooz Espiritu Santuqui ančuca kuzquiz nužukaz luzaquiča. ³⁹Nii compromitta Espiritu Santuqui tjaataž cjequiča ančucaquizimi ančuca maatinacžquizimi, ažkquin wajtchiz žoñinacžquizimi, nižaza tjapa učum Yooz Jiliriž kjawžta žoñinacžquizimi. Jalla ninacžquizimi Yooz Espiritu Santo tjaataž cjequiča. —Jalla nuž kjaaziča Pedruqui.

⁴⁰Wacchi takunacžtan Pedruqui ninacžquiz chiižinchiča, tuž cjican:

—Liwriita cjis waquiziča, Cristuž quintr uj paañi žoñinacžtan anacasticta cjisjapa.

⁴¹ Jalla nekztanaqui walja žoñinacaqui Pedruž chiita taku tjapa kuztan catokchiča. Jalla nuž catoktiquiztan tjapa ninaca bautistaž cjissiča. Nii noojiqui tsjii čhjep warank žoñinacaqui yapžquichiča parti Yoozquin criichi žoñinacžquin. Jalla nuž mirchiča. ⁴² Tjapa nii criichi žoñinacaqui apostolonacaž tjaajintanacžquiz walja tjapa kuztača. Ninacaqui tsjii kuzzizpan cjissiča. Chica juntasñitača Yoozquin mayizizjapa, nižaza čhjeri lujljapa.

CRIICHI ŽOÑINACŽ KAMTA

⁴³ Apostolonacaqui walja milajrunacami siñalanacami paachiča. Jalla nuž paatiquiztan tjapa žoñinacaqui ispantichiča. ⁴⁴ Tjapa Yoozquin criichinacaqui juntú kamchiča. Nižaza tjapa ninacž cusasami tsjiquiz junťapñitača, zapa maynižquiz tojunzjapa. ⁴⁵ Parti cusasa tuyčzu, nii paaz tojunñitača, ana želinčiz žoñinacžquiz. ⁴⁶ Zapuru timpluquiz ajcžñipantača Yoozquin sirwizjapa. Nižaza criichi žoñinacž kjuyquiztan kjuya okatča,untu čhjeri lujljapa. Humilde kuzziz zuma cuntintu lujlñipantača. ⁴⁷ Nižaza Yoozquin honora tjaañipantača. Jalla nuž nii criichinacaž zuma kamťiquiztan parti žoñinacaqui ninaca zuma rispitiñitača. Zapuru žoñinacaqui criichiča, liwriita cjisjapa. Nekztan parti criichi žoñinacžquiz juntassiča. Jaziqui Jesucristo Jiliriqui criichi žoñinaca mirkatchiča.

ZUCH ŽOÑI ČHJETINTA

3 ¹ Tsjii noojiqui majñakak ora, Pedružtan Juanžtan pucultan timplu kjutñi yawchiča. Nii oraqui Yoozquin mayiziz oratača. ² Nicju

tsjii zuch žoñi želatča. Zucha nassipantača. Zapuru timpluquin chjitztatača. Hermosa cjita timplu zanquiz žejlñitača, timplu luzñi žoñinacžquiztan paaz tomangzjapa. ³ Nii zuch žoñiqui Pedružtan Juanžtan timplu luzñi cherčzu, paaz tomangziča. ⁴ Nekztanaqui Pedružtan Juanžtan nii zuch žoñž kjutñi cherziča. Nekztanaqui Pedruqui cjichiča:

—Wejnaca kjutñi cherčza.

⁵ Jalla nuž chiitiquiztan nii zuch žoñiqui “Paaz onaá” cjan cherziča. ⁶ Pedruqui cjichiča nekztanaqui:

—Anaž wejta paaz žejlča. Antis wejta Jesucristuž azi žejlča, jalla nižtan yanapasacha. Jesucristo cjita Nazaret wajťchiz žoñž aztan amquiz cjiwča, tsijtsna. Oka.

⁷ Nižaza Pedruqui nii zuch žoñž žew kjarcu tančzu, tsijťskatchiča. Nii tsijťskatan nii orapacha niž kjochanacaqui tsijťsñi cjissiča. ⁸ Jalla nekztanaqui nii zuch žoñiqui layčzu tsijťsiča, nižaza ojklayñi cjissiča. Nekztanaqui Pedružtan Juanžtan chica timplu luzziča, ojkan, laylaycan, nižaza Yooz tjuu alawazcan. ⁹ Tjapa timpluquiz žejlñi žoñinacaqui nii zuch žoñi ojklayñi cherchiča, nižaza Yooz tjuu alawazñi nonziča. ¹⁰ Nekž žejlñi žoñinacaqui nii žoñi pajchiča. Nii žoñipacha zapuru Hermosa cjita timplu zanquiz žejlñitača, paaz tomtomangžcan. Nii čhjetinta žoñi cherčzu ispantichi cjissiča.

PEDRUŽ PALJAYTA

¹¹ Nii čhjetinta žoñiqui Pedružquiztan Juanžquiztan anaž eclawk cjetča. Ninaca Portal de Salomón cjita timplu kjuyquiz želatča. Jalla nijčchuc tjapa nii timpluquiz žejlñi žoñinacaqui zati

pariju juntassiċha. Ispantichiċha.

¹²Nekztanaqui Pedruqui nii juntasquiñi žoñinaca cheržcu, ninacžquiz paljaychiċha, tuž cjican:

—Israel wajtquiz žoñinaca, ċkjažtiquiztan anċhucqui ispantiya? ċKjažtiquiztan anċhucqui wejrnaca chekžjo? Wejrnacpacha anaċha tii žoñi ċhjetinchintqui. Anal wejtnaca aztan ojklayskati atchinċha. Nižaza wejrnacaž persuna zuma kamtiquiztan anal tii žoñi ċhjetinchinċha. ¹³Antiz Yoozkaz tii žoñi ċhjetinchiqui. Nii Yoozqui uċhum tuquita ejpnacž Yoozza, Abraham, Isaac, Jacobo, ninacž Yoozza. Jalla nii Yoozpacha niiž Majch Jesusižquiz pajk honorchiz cjiskatchiċha. Nii Jesusaž cjen, tii žoñic žejtchiċha. Anċhuczti jilirinacžquiz nii Jesusa intirjichinċhucċha. Nekztanaqui Pilatuž cutz tantižtan, anċhucqui ana cutskatz pecchinċhucċha. “Tiiqui anapanċha Yooziž cuchanžquitaqui” cjican chiichinċhucċha. ¹⁴Jesusaqui ana ċhjul ujchizza. Yooz Ejpž kuzcama kamñiċha. Nii Jesusa cuts cjenpacha, anċhucqui tsjii pajk ujchiz žoñi cutskatz pecchinċhucċha. ¹⁵Jalla nuž nii žeti tjaañi Jesucristo conchinċhucċha anċhucqui. Yooz Ejpžti Jesusa ticztiquiztan jacatatskatchiċha. Jalla nii puntuquiztanaqui wejrnacpachaċha cherchintqui. Jaziqui nii puntu zuma werara chiyasaċha. ¹⁶Tii Jesucristuċha azzizqui. Jesucristužquiz tjapa kuztan cjican, wejrnacqui Jesucristuž aztan tii anċhucaž pajta žoñi ċhjetinchinċha. Jesucristužquin tjapa kuzziz cjen tii žoñiqui zumpacha žejtchiċha. Jalla nuž anċhucqui tjappachaž cheržcu, nayaquiċha.

¹⁷Jaziqui jilanaca, anċhucmi anċhuca jilirinacami Jesusa conchinċhucċha. Jalla nii ora

anċhucqui ċhjulut paatċhaja anaž zizatċha. ¹⁸Jalla nuž cjenami Yoozqui niiž persun taku cumpliskatchiċha. Tuquiqui Yoozqui tjapa niiž taku chiiñi profetanacžquiz chiikatchiċha, tuž cjican, “Yooz cuchanžquita Cristuqui sufristanċha”. Nii takuqui cumplissiċha. ¹⁹Jaziqui anċhucqui Yoozquin kuzziz cjee, persun uj pajžcu. Yoozquin quejpžca, anċhuca ujnaca pertunta cjisjapa. Jalla nekztanaqui Yooz Jiliriqui anċhuca kuznaca cuntintu cjiskataquiċha. ²⁰Nižaza Yooz Jiliriqui wilta cuchanžcaquiċha Jesucristo anċhucalta uċhta liwriiñiqui. ²¹Ima Jesucristuž wilta tjonan Yooz Ejpqui tjappacha azquichaquiċha, jaknužt tuquita zuma kuzziz Yooz taku chiiñi žoñinacaž mazinċhaja, jalla niicama cumpliskataquiċha. Jalla nii cumplis oracama Jesucristužlaqui tsewc arajpachquin kamspanċha. ²²Moisesqui uċhum tuquita ejpnacžquiz cjichiċha: “Yooz Jiliriqui anċhucaquiz tsjii Yooz taku chiiñi profeta cuchanžcaquiċha. Nii žoñiqui anċhuca wajtchiz žoñinacžquiztanpacha ulnaquiċha. Jaknužt Yooz Ejpqui wejr cuchanžquitċhaja, jalla nužzakaz tsjii cuchanžcaquiċha. Anċhucqui nii Yooz Epiž cuchanžquita žoñž taku tjapa kuztan nonžna, ċhjulut chiyaċhaja, jalla nii. ²³Jakziltat ana niiž taku nonznawk cjeċhaj niiqui, Israel wajtchiz žoñinacžquiztan pjaltaž cjequiċha. Nižaza walja castictaž cjequiċha”. Nuž cjiċha Moisesqui. ²⁴Nižaza tii timpu puntuquiztan tjapa Yooz taku chiiñi profetanacqui parlichipanċha Samuelžquiztanpacha jecchuc. ²⁵Nii profetanacž taku Yooz Ejpqui anċhucaltajapa chiikatchiċha. Anċhucaltazakaz Yooz Ejpqui tsjii zuma taku tjaachiċha uċhum tuquita ejpnacžquiz. Jalla tuž cjican, Yoozqui

Abrahamžquiz taku tjaachiča: “Am majchmaatiž cjen, tjapa tii muntuquiz žejlñi žoñinacžtajapa favora paa-ača wejrqui”. ²⁶Yooz Ejpqui niiz Majch jacatatskatžcu, ančhucaquiz primira cuchanžquichiča, favora paacan. Jazic tjapa ančhuc anawali paaznaca apatatspanča.

PEDRUŽTAN JUANŽTAN

4 ¹Pedružtan Juanžtan jalla nuž parlan, timplu jilirinacauqui, timplu zultatž jiliržtan saduceo parti žoñinacžtan tjonchiča. ²Pedružtan Juanžtan žoñinaca tjaajnatča, tuž cjican:

—Jesusaqui ticziquiztan jacatatchiča. Jalla nuž kjanapacha tjeeža, tjapa ticzi žoñinacauqui jacatataquiča, jalla nuž. —Jalla nižta chiitiquiztan ancha žawjchiča nii jilirinacauqui. ³Jalla nekztanaqui Pedružtan Juanžtan preso chjitžtatača. Nižaza carsilquiz majctatača, jakatažcama. Nii oraqui zeziqueyatača. ⁴Jalla nuž Pedružtan Juanžtan Yooz puntu chiichiichiž cjen, tama nonžni žoñinacauqui tjapa kuztan Yoozquin criichiča. Luctak criichi žoñinacakaz tsjii pjijska warankatača.

⁵Jakatažuqui Jerusalén wajtquin ajczitača wajt jilirinacami, timplu jilirinacami lii tjaajiñinacami. ⁶Nii oraqui timplu chawc jiliritiča Anasqui. Niimi ajczitača, nižaza Caifastan, Juanžtan, Alejandružtan. Nižaza tjapa timplu chawc jilirinacž famillanacami ajczitača. ⁷Jalla nuž ajcziž cjen Pedružtan Juanžtan zjiykatchiča. Nekztanaqui nii jilirinacž taypiquiz apantiskatžcu pewcziča, tuž cjican:

—Ančhucui, čjakzilta jiliriž mantitaž cjen nižta ančhuc paajo?

⁸Jalla nekztanaqui Espíritu Santuqui Pedružquiz tuž chiikatchiča:

—Israel wajtchiz jilirinaca, timplu jilirinaca, ⁹wejrnacqui ančhucaž yujcquiz zijjctača, tsjii wali paata zumpacha zizajo. Jaknužt tii zuch žoñi žejtchižlaja, jalla nii ziz pecaquiz niiqui, niil quint'asača. ¹⁰Wejrnacqui ančhuca yujcquiz weralar chiyača, ančhuc nii quintu zumpacha zizajo; nižaza tjapa Israel wajtchiz žoñinaca zumpacha zizajo. Jesucristuž aztan tii žoñi čhjetinta žejlča tjapa ančhuca yujcquiz tsijtchi. Ančhucui nii Nazaret wajtchiz Jesucristo cruzquiz ch'awcchinčhucča. Nekztanaqui Yoozqui niipacha ticziquiztan jacatatskatchiča. ¹¹Ančhucui kjuy pirkiñinacažtakaz nii zuma maz tjojtchiča, “Ana cusa” cjican. Jalla nii tjojtta mazqui Jesusapanča. Nii tjojtta maztti ancha cusala, isquiquiz nonžta maz irata cjissiča. Yoozqui cjichiča, “Tii mazza tsjan juc'ant chekanaqui”.

¹²Jesucristupankazza Liwriiñiqui. Yooz Ejpqui anaž iya jakziltami utchiča liwriiñi cjisjapa. Tii muntuquiz žejlñi žoñinacžquiztan ana iya liwriiñi žoñi žejlča. Jesucristupankaz učhum liwriiñi atasacha.

¹³Jalla nuž Pedruqui chiichiča Juanžtan. Nii pucultanaqui ana istutiñitača, campuquin kamñi žoñikazza. Jalla nuž cjenami Pedružtan Juanžtan tjup kuzziz chiichiča, ana ekscan. Jalla nii nayžcu nii jilirinacauqui ispantichiča. Nižaza pajchipan cjissiča, nii pucultanaqui Jesusižtan chica ojklachitača, jalla nii. ¹⁴Nekz chica nii čhjetinta žoñimi tsijtchi želatča. Jalla nižtiquiztan ana čjul quintrami chii atchiča. ¹⁵Jalla nekztanaqui nii čhjepultan žoñinaca ajczquiztan ulanskatchiča. Ninacaž ulantan, nii jilirinacauqui ninacpora zmali parlasiča, ¹⁶tuž cjican:

—ĈĤjul uĉum tii ŝoĥinacĝtan paaquejo? Tjapa Jerusalen ŝoĥinacaqui tinacaĝ paata milajru zizkalala. Tinacaqui pajk siĥala tjeeziĉha. Anaĉha nicchuca uĉumqui. ¹⁷Tii chiitaqui ana iya zizta cjisjapa, uĉumqui ninacĝquiz mantiz waquiziĉha, ana iya Jesusiĝ puntu parlajo. “Niĝta parlaquiĝ niiqui, anĉhucqui casticta cjequiĉha” jalla nuĝ chiizinz waquiziĉha.

¹⁸Nekztanaqui nuĝ parli ŝerĝcu, nii jilirinacaqui Pedruĝtan Juanĝtan kjawziĉha. Nekztan tuĝ chiizinchicĉha:

—Jaziqui anĉhucqui anaĝ iya parlaquiĉha nii Jesusiĝ tjuuĝtan. Niĝaza anaĝ jecĝquizimi tjaajnaquiĉha Jesusiĝ puntuquiztan. —Jalla nuĝ mantichicĉha.

¹⁹Jalla nuĝ mantitiquiztan Pedruĝtan Juanĝtan kjaaziĉha, tuĝ cjican:

—Anĉhucpachaĝ tantiyasa. ĈĤjulut walikaz Yooz yujcquiziya? ĈAnĉhucacĝ mantita caz wali cjesaya? uĝ ĈYooz mantita caz wali cjesaja?

²⁰Wejrnacqui anal weriĝ chertanacami nonĝtanacami parlis jaytasacĉha. Jalla nuĝ parlispacĉha wejrnacqui.

²¹Jalla nekztanaqui nii jilirinacaqui Pedruĝquiz Juanĝquiz zuma ch'aanchicĉha. Pero niĝtami ninacaqui cutztataĉha. Jalla nuĝquiz nii jilirinacaqui ana castiqui atchicĉha. Parti ŝoĥinacami Yoozquin alawazziĉha, niĝaza Yoozquin honora tjaachicĉha jalla nii milajru paatiquiztan. ²²Nii ĉĤjetinta ŝoĥiqui pusi tunc wata jilchiztaĉha.

CRIICHI ŜOĤINACAQUI MAYIZICĤICĤA

²³Nekztanaqui Pedruĝtan Juanĝtan carsilquiztan cutztiquiztan niĝ mazinacĝquin ojkcĉicĉha. Tjapa ninacĝ ojklaitanaca quint'icĉicĉha, jaknuĝt nii timplu jilirinacami wajt jilirinacami

chiitĉhaja, jalla nii liwĝ quint'icĉicĉha.

²⁴Jalla nuĝ quint'itiquiztan, tjapa ninacaqui tsĝii kuzziz Yoozquin mayizicĉicĉha, tuĝ cjican:

—Yooz Jiliri, tjapa mantiĝi Jiliri. Amqui arajpachami yokami, kot kjazmi, niĝaza tjappacha paachamĉha. ²⁵Amtan Espiritu Santuĝtan am David cjita sirwiĝi tuĝ chiikatchamĉha:

“ĈKjaĝtiquiztan Yooz quintra ŝawĝĉi chiicĉii nacionanacĉiz ŝoĥinacaqui? ĈKjaĝtiquiztan tii muntu ŝoĥinaca ana zuma tantii? ²⁶Niĝaza tii muntuquiz chawc jilirinacaqui Yooz quintra tsĝitsa, niĝaza chawc jilirinacaqui Yooz Jilirĝ quintra niĝaza niĝ uĉta Jesucristuĝ quintra parlizjapa juntassa”.

Nuĝ cjican cjirĉicĉha Davidqui. ²⁷Jalla tiĝta weraraĉha. Herodestan, Poncio Pilatuĝtan, Israel wajtĉiz ŝoĥinacĝtan, yekja wajtĉiz ŝoĥinacĝtan, jalla tjapa ninacaqui tii wajtquin juntassicĉha wali zuma Jesusiĝ quintra paazjapa. Pero am Majĉ utchamĉha, tsjan chawc jiliri cjisjapa. ²⁸Jalla nuĝ juntascu ninacaqui am kuzquiz pinsitacama cumplissicĉha. Nuĝquiz cjissicĉha. Amiĝ tuquitan pinsita jaru, jalla nuĝpacha watchicĉha. ²⁹Anziqui, Yooz Jiliri, wejtnaca quintra ch'aanita taku am zizza. Jaziqui wejtnacaquiz, amiĝ mantita ojkcĉi ŝoĥinacĝquiz, zuma tjup kuz tjaaĝcalla, ana eksan am taku parlajo. ³⁰Niĝaza am azi tjaaĝcalla, laa ŝoĥinaca ĉĤjetinzjapa, niĝaza zuma obranacami, niĝaza siĥalanacami, niĝaza milajrunacami paazjapa, am zuma Majĉ aztan. —Jalla nuĝ chiican Yoozquin mayizicĉicĉha.

³¹Jalla nekztanaqui Yoozquin mayiziz ŝerĝtan jakziquin ajczitaĝlaja, jalla nii kjuya ĉĤekjinchicĉha. Niĝaza tjapa ninacaqui Espiritu Santuĝ azi

tanziča ninacž kuzquiz. Jalla nižtiquiztan walja tjurt'iñi kuzziz Yooz taku parličičha.

CRIICHI ŽOÑINACŽ KAMTA

³²Tjapa nii wacchi criichinacaqui tsjii kuzziztača. Nižaza ninacž pinsamintuqui tsjiipanikaztača. Jakzilta žoñit cusasanacchiz želatčhaja, nii žoñinacaqui ana cusasquiztan chiiñitača, “Wejt cusasaž tiic” cjicanaqui. Antis tjapa ninacž cusasanacaqui tsjiiztakaz želatčha, tjapa criichi žoñinacžtajapa. ³³Nii Jesusiž illzta apostolonacaqui Jesús Jiliriž jacatatp puntuquiztan tirapan paljayñitača, zuma atipñi tawkžtan. Zuma wali azziz tawkžtan atipñipantača. Nižaza Yoozqui ninaca walja yanapchiča. ³⁴Ninacžquiztan anaž tsjii t'akjir žoñi želatčha. Jakzilta criichi žoñizlaja yokchizimi kjuychizimi, jalla ninacaqui nii tuyžcu paaz zijcñipanikazza. ³⁵Nii paaz zijcžcu apostolonacžquin intirjiñipanikaztača. Nižaza ninacaqui nii paazqui chicata tojñitača ana želinchiz žoñinacžquiz. ³⁶Nižaza tsjii José cjita levita t'akquiztan žoñi želatčha, Chipre cjita isla yokchiz žoñi. Nii José cjita criichi žoñiqui yekja tjuuchizkaztača Bernabé cjita. Jalla nuž tjuuskatchičha apostolonacaqui. Nii Bernabé tjuuqui tuž cjiča, “Zuma Kuzji”, jalla nii. ³⁷Nii Bernabé cjita žoñiqui tsjii yokchiztača. Nekztanaqui nii yoka tuychiča. Nii yoka tuyžcu, paaz zijecchiča. Nekztanaqui apostolonacžquin nii paaz intirjichiča.

ANANIAS, NIŽAZA SAFIRA UJ PAACHIČHA

5 ¹Yekja žoñi želatčha, Ananías cjita. Safira cjiti tjunchiztača. Ninacaqui persun

yoka tuychizakazza. ²Nii yok tuyta paazqui t'ecžcu, persunaltajapa parti čhjojchiča. Partillakaz chjitchičha apostolonacžquin, jalla nužuñ yoka tuychižtakaz. Niiž tjunqui nii t'ecžta paaz zizatčha. ³Jalla nekztanaqui Pedruqui cjichiča:

—Ananías, čkjažtiquiztan am kuzquiz Satanás luzzita? ČEspíritu Santužquiz tižta k'otsjapaqui? Nii yok tuyta paazqui t'ecsamčha. ⁴Ima tuycan nii yokaqui amtapantakaya, čana jaa? Tuyžcu, nii yoka tuyta paazqui amtazakaztaž, čana jaa? ČKjažtiquiztan tižta ana wali pinsichamtajo? Amqui Yoozquiz k'otchamčha; ana žoñžquiz k'otchamčha.

⁵Pedruž nuž chiitiquiztan, Ananiasqui ticzi tjojtsičha. Jalla nižtiquiztan nii quintu nonchi žoñinacaqui ancha eksñi cjissičha. ⁶Jalla nuž ticstan, tsjii kjažt tjtjowanacaqui macjatchičha, Ananías ticzi curpu murtajzjapa. Nekztan nii tjtjowanacaqui tjati chjitchičha.

⁷Tsjii čhjep orquiztan, Ananías tjunqui tjonchinča. Naaža lucu ticzi quintu ana zizatčha. ⁸Nekztanaqui Pedruqui naaquiz pewcziča, tuž cjican:

—Wejtquiz maznalla. ČAnčuca yoka tuyta paaz nužullakazkaya?

Nekztanaqui naaqui kjaaziča, tuž cjican:

—Jesalla, nužullapanča.

⁹Nekztanaqui Pedruqui naaquiz cjichiča:

—Ančhucqui Yooz Espiritu Santo incallz pecatčha. ČKjažtiquiztan ančhucqui pucultan nuž kaasjo? Nii zancučž tjončha nii am lucu tjažžquiñinacaqui. Nižaza anziqi amzakaz chjichaquiča.

¹⁰Nii orapacha Pedruž kjojchquiz tjojtžcu ticzinča. Nii tjtjowanacaqui

kjuya luzcu naa ticzin cherchiča. Nižaza jwezcu tjati chjitchiča naaža lucž latuquin. ¹¹Jalla nižtiquiztan tjapa nii iclizziz žoñinacami, nižaza nii quintu nonchi žoñinacami ancha eksñi cjissiča.

MILAJRUNACA PAATA

¹²Nii tjuñinacqui apostolonacqui walja siñalanacami milajrunacami paañitača žoñinacž cheran. Nižaza tjapa criichinacqui Portal de Salomón cjita kjuyquiz ajczñitača. ¹³Ana jakzilta ana criichi žoñinacami criichinacžtan mazi pajas, ancha eksnatča. Jalla nuž cjenami žoñinacqui walja rispitchiča criichinacžquiz. ¹⁴Nižaza tsjan tsjan žoñinacqui Yooz Jiliržquin kuzziz cjissiča, luctaka cjiñi maataka cjiñi. Walja žoñinacqui Yoozquin criichiča. ¹⁵Nižaza laa žoñinacami callquin jweztatača. Callquin tjajz zquti chjinžcu, t'apžtatača. Nižaza camillquiz zakaz nonžtatača. Jalla nuž nonžta žejlcan Pedruž tjonz tjewziča, tsjii kjažta čhjetinta cjeyajo. Pedruž siwsallamekaj laa žoñinacž juntuñ wat jaa, cjiñitača. ¹⁶Nižaza nii wajt vicin watjanacquiztan walja žoñinacqui tjontjonatča Jerusalenquin. Laanacami zajraž tantanacami zjič zjičatča. Nižaza tjapa laa žoñinacqui čhjetintatača.

PEDRUŽTAN JUANŽTAN CARSILQUIZ CHAWJCTA

¹⁷Jalla nižtiquiztanaqui timplu chawc jiliriqui saduceo parti žoñinacžtan ancha inžizichiča. ¹⁸Jalla nuž inžizicu, apostolonaca preso tanchiča, carsilquiz chawjczjapa. ¹⁹Jalla nuž carsilquiz chawjctaj cjen ween tsjii Yooz Jilirž anjilaqui tjonchiča. Nižaza carsil zan chawjcz

cjetsiča. Cjetžcu, apostolonaca jwessiča tuž cjican:

²⁰—Timpluquin oka. Jalla nicju tsjitsna. Jesucristuž kamaña puntuquiztan tjapa žoñinacžquiz paljayaquiča.

²¹Jalla nii anjilaž čiita jaru, jakatažuqui wentanalla timplu ojkičiča. Timpluquin luzcu, tjaajñi kallantichiča. Jalla nii orazakaz timplu chawc jiliriqui niž mazinacžtan parliz kjuyquiz ajczčiča. Tjapa Israel wajtchiz jilirinaca kjawziča. Nižaza zultatunaca mantichiča, nii chawjcta apostolonaca zjičajo. ²²Jalla nuž carsilquin irantižcu, nii cuchanta zultatunacqui ana čhjulumi wajtchiča. Quejpžcu quint'ichiča, ²³tuž cjican:

—Wejrnacqui carsilquin irantižcu, zuma chawjcta zalchinča. Nižaza ichñi zultatunacqui želatča carsil zawnctan. Nekztanaqui carsila cjetžcu, luzzinča. Nii kjuyltanaqui cherassinča anaž zinta pres žoñi želatča.

²⁴Jalla nii quintu nonžcu timplu chawc jilirimi timplu zultatž jilirimi nižaza parti timplu jilirinacami, jalla tjappacha ninacqui zuma kuz turwayzi cjissiča, ¿Kjažt cjequejo? cjican. ²⁵Jalla nii orazakaz tsjii žoñiqui irantižquichiča, tuž cjican:

—Ančucaž carsilquiz chawjcta žoñinacqui timpluquin žoñinacžquiz tjaajinča. —Nuž cjican quint'ichiča.

²⁶Nekztanaqui nii guardiñi zultatž jiliriqui ojkičiča zultatunacžtan. Nekztan apostolonaca zjiččiča, ana chjojritžcu. “Chjojritžtaž cjesaž niiqui, parti žoñinacqui wejrnacž maztan čhjacasaka”, jalla nuž pinsichiča nii zultatunacqui. ²⁷Jalla nuž zjičžcu, nii parliz kjuyquin tsjjskatchiča chawc jilirinacž yujcquiz. Jalla nuž želan nii

timplu chawc jiliriqui chiižinchiča, tuž cjan:

²⁸—Wejrnacqui ančhucaquiz ana iya parlay cjichintala. Nižaza nii žoňž puntuquiztanaqui ana iya tjaajnaj cjichintala. Jaziqui, ěhjulupaachinčhuctajo? Ančhucqui tjapa tii Jerusalén watja chjiypchinčhucča ančhuca tjaajintižtan. Nižaza nii žoňi contiquiztan wejtnacaquiz uj tjojtunz pecchinčhucča.

²⁹Jalla nekztanaqui Pedružtan parti apostolonacžtan kjaaziča, tuž cjan:

—Primiraqui wejrnacqui Yooz castanča. Niž jarukaz žoňimi cazasača. ³⁰Ančhucqui cruzquiz ch'awcžu Jesusa conchinčhucča. Nekztan učhum tuquita atchi ejpž Yooz tii Jesusa jacatatskatchiča. ³¹Jacatatskatžcu Yoozqui nii Jesusa pajk honorchiz cjiskatchiča. Niž žew latuquiz želan, Yooz Ejpmqui mantis poder tjaachiča, Jesusa tsjan chawc jiliri cjisjapa. Nižaza Jesusača Liwriiñiqui, tii Israel wajtchiz žoňinaca kuz campiiskatajo, ninacž uj pertunta cjejajo. ³²Jalla tii puntunacquiztan wejrnacqui zizuča. Nižaza tisticu cjan wejrnacqui nii chiyučha Espřitu Santužtanpacha. Yoozqui nii Espřitu Santo tjaača niž kuzcama kamñi žoňinacžquiz. —Nuž cjan cjičiča Pedruqui.

³³Jalla nii nonžcuqui, nii jilirinacqui apostolonacžjapa ancha žawjchiča. Conz pecatča. ³⁴Pero nii jilirinacžquiztan tsjii Gamaliel cjita fariseo želatča. Nižaza lii tjaajiñi maestrutača niiqui. Tjapa žoňinacqui nižquiz walja rispitiñitača. Jalla nii Gamaliel cjita žoňiqui tsijtsiča. Nuž tsijtsu mantichiča apostolonaca zancu jwescajo tsjii ratu. ³⁵Nekztan parti jilirinacžquiz tuž cjičiča:

—Israel wajtchiz žoňinaca, ančhucqui tii žoňinacžquiztan cwitazaquiča.

Anaž ěhjulumi paaz waquiziča.

³⁶Ančhucž cjuñzna, tsjii tuquiqui Teudas cjita žoňiqui jecžquichiča. Nii žoňiqui “Wejrtča chekan žoňtqui”, tuž cjan ojklaychiča. Jalla nekztanaqui pajcpic patac žoňinacqui nii apziča. Pero nii Teudasqui contatača. Nekztanaqui nii apžñi žoňinacqui wichanziča. Nužquiz niž tjaajintauki tjanantatača. ³⁷Niž wiruñ censo tjuñinacžquiz tsjii Judas cjita žoňiqui jecžquichiča. Galilea wajtchiztača. Žoňinacqui nii apzquichiča. Ultimquiziqui contazakaztača. Nekztanaqui niž apžñinacqui wichanzi cjišsiča. ³⁸Jalla nižtiquiztan niža wattanaca cjuñžcu, tii žoňinacž quintranača ěhjulumi paa. Ana tinacžquiz mitis waquiziča. Tii žoňinacqui persun kuzcamakat paačhaja, nuž cjenacqui anaž tjurasacha. Orallaž kataquiča. ³⁹Yooz kuzcamat tii žoňinacqui paačhaja, jalla nekziqi tinacqui anaž tjananchuca cjesača. Tinacqui Yooz parti žoňinacžlaja, jalla nii quintrapaasaž niiqui, Yooz quintraz cjesača. Jalla nižtiquiztan tii žoňinacž quintranač paala. —Jalla nuž cjan nii žoňinacžquin chiižinchiča Gamaliel cjita žoňiqui.

⁴⁰Nižtiquiztanaqui tjapa jilirinacqui naazi cjišsiča. Jalla nekztanaqui kjawziča apostolonaca. Kjawžcu, ninaca wajtchiča. Nižaza chiižinchiča ana iya parlajo nii Jesusiž puntuquiztan. Nekztan ninacqui cutztatača. ⁴¹Jalla nuž cutztan, jilirinacž yujcquiztan ulanchiča. Yoozqui jalla nuž munchiča, Jesusiž laycu sufrichi ninacqui, jalla nuž. Jalla nuž cjenacqui ancha cuntintutača apostolonacqui. ⁴²Nekztanaqui zapuru Jesucristuž puntuquiztan tira tjaajnatča, nižaza tiraž paljayatča timpluquinami kjuyquinami,

“Jesusaqui Yooz cuchanžquita Cristučha” cjiñitača.

**PAKALLAK CRIICHI
JILANACA ILLZTA**

6 ¹Nii timpuquiz Yoozquin criichinacaqui waljaž yapatča. Nuž yaptiquiztan tsjii quija željčiča. Griego taku chiiñi judionacaqui hebreo taku chiiñi judionacž quintru quijziča, tuž cjican:

—Wejtnaca žew maatakanaca ana cusa atintitača. Zapuru čjheri tojzquiz upa čjheri onantača.

²Jalla nuž quijtiquiztan nii tuncapan apostolonacaqui tjapa Yoozquin criichinaca kjawziča. Nekztanaqui tjappacha juntjapžcu ninacžquiz cjichiča:

—Wejrnacqui Yooz taku parli apatatsqui anaž waquiziča, čjherikaz atintisjapaqui. ³Jilanaca, pakallak žoñinaca ančhucaquiztan kjurzna. Zuma kuzziz žoñi, nižaza Yooz Espíritu Santuž irpita žoñi, jalla nižaza zuma intintazzi žoñi, nižta žoñinaca kjurzna. Nekztan ninacaqui tii čjheri atintiz puestuquin uchta cjequičha.

⁴Wejrnacžti Yoozquin mayiziz, nižaza Yooz taku tjaažinz tiral atintača. Nii langzquiz tiral kuz tjaa-ača.

⁵Jalla nii parlita jaru tjappacha asiptichiča. Nekztanaqui pakallak zuma žoñinaca illztatača, čjheri atintisjapa. Primeruqui Esteban illztatača. Estebanaqui Yoozquin tjapa kuzziztača, nižaza Yooz Espíritu Santuž irpita kamñitača. Nižaza illztatača Felipežtan, Procoružtan, Nicanoržtan, Timonžtan, Parmenastan, nižaza Nicolastan. Nicolasqui Antioquía wajtchiz žoñitača. Ima Jesucristužquiz kuzziz cjican Nicolasqui judío cuzturumpichiztača, ana judío žoñi cjenami. ⁶Jalla

nuž illzcu nii pakallak žoñinaca apostolonacžquin chjichtatača. Nekztanaqui apostolonacaqui ninacžta mayizichiča, nižaza ninacž achquiz kjaržtan lanziča, nii puestuquiz cjeayo.

⁷Jalla nekztanaqui Yooz taku paljayta cjen, Jerusalén wajtquin criichi žoñinacaqui anchaž miratča. Nižaza wacchi judiuž templu jilirinacami tjapa kuztan Yooz taku catokchiča.

ESTEBAN PRESO TANTA

⁸Estebanaqui walja Yooz aztantača, nižaza Yooziž yanaptatača. Jalla nižtiquiztan walja milajrunacami siñalanacami paachiča žoñinacž cheran. ⁹Tsjii noož tsjii kjaž judío cuzturumpi paañi žoñinacaqui Estebanžtan ch'aasi kallantichiča. Nii judío cuzturumpi paañi žoñinacaqui “Liwriita žoñi” cjitatača. Ninacžtan, tsjii kjaž Cirene wajtchiz žoñinacžtan, nižaza Alejandría wajtchiz žoñinacžtan, nižaza Cilicia wajtchiz žoñinacžtan, nižaza Asia yokquin kamñi žoñinacžtan, jalla nii žoñinacaqui Estebanžtan ch'aassiča. ¹⁰Jalla nuž ch'aascan, Estebanžquiz ana atipi atchiča. Estebanqui Espíritu Santuž tjaažinta taku chiiñipantača. ¹¹Jalla nižtiquiztan nii quintru žoñinacaqui toscar tisticunacž taku kjaychiča, tuž chiican k'otajo:

—Tii Estebanqui ana wali tawkžtan Moisés quintrami nižaza Yooz quintrami chiichiča. Wejrnacqui nuž chiyanacqui nonzinpanča. —Jalla nii takunacžtan tisticunacžquiz tjaažziča.

¹²Jalla nekztanaqui nii Estebanž quintru žoñinacaqui parti žoñinacžquiz walja žawjkatchiča. Žoñinacami, wajt jilirinacami, nižaza judío lii tjaažiñi maestruncami, tjapa ninacaqui

żawjchi cjissičha. Nuż żawjchi cjiscu Esteban tanchičha. Nekztanaqui Esteban tanżcu, pajk parliz kjuya chjitchičha. ¹³Niżaza toscar tisticunaca apantiżquichičha. Nii toscar tisticunacaqui tuż cjichičha:

—Tii żoņiqui tirapan tii Yooz timplu quintra chiiņičha, niżaza Yooz lii quintra chiiņičha. Nużupanż parliņičha.

¹⁴Niżaza wejrnacqui nonzinčha, “Nii Jesús cjita Nazaret wajtchiz żoņiqui tii timplu pajlznacuichă”, nuż cjican tiiqui chiiņičha. Niżaza tiiqui cjiņičha, “Nii Jesusaqui Moisés tjaata cuztumpurinaca campiyaquichă”. Nuż cjiņičha tiiqui.

¹⁵Jalla nekztanaqui tjapa nii julzi jilirinacami Estebanż kjutņi cherzičha. Nii oraqui Estebanż yujcqui anjilż yujcztakaz cherzičha.

ESTEBANQUI TJURT'ICHİCHĂ

7 ¹Nekztanaqui timplu chawc jiliriqui Estebanżquiz pewczičha, tuż cjican:

—¿Ultimu nużupanza amya?

²Nekztanaqui Estebanqui kjaazičha, tuż cjican:

—Wejt jilanaca, ejpnaca, jilirinaca, nonżna. Učhum zuma honorchiz Yoozqui učhum tuquita atchi ejp Abraham cjita żoņżquiz persuna tjeezičha. Nii oraqui Abrahamqui Mesopotamia yokquin kamņitačha. Imaż Harán yokquin kami okatčha. ³Nii oraqui Yoozqui Abrahamżquiz cjichičha: “Am yoka eca, niżaza am parintinacami eca. Jakzi yokquinam okačhaja, jalla nicju am tjaajznačha”.

⁴Jalla niżtiquiztan Abrahamqui Caldea yokquiztan ulanchičha, Harán yokquin kami ojkcichă. Nekz kaman Abrahamż ejpqui ticzičha. Nekztanaqui tekzi tii učhumż kamz yokquiz Abraham tjonchichă. Yoozza

nii irpichiqui. ⁵Jalla tekz kaman, Yoozqui ana čhjul yok irinsami tjaachichă. Abrahamżtajapa persun yoka ana želatčha. Jalla nuż cjenami Yoozqui taku ecchichă, tuż cjican: “Tii yoka amtapanż cjequichă. Niżaza am ticztanaqui tii yokaqui am maatinacaż tanznacuichă”. Jalla nuż cjican Yoozqui Abrahamżquiz taku tjaachichă.

Nii oraqui Abraham ana ocjalchiz cjenami, Yoozqui nuż chiičichă.

⁶Niżaza Yoozqui niżżquiz cjichichă, “Wiruņaqui am majchmaatinacaqui yekja yokquin kamaquichă, nacjuņta żoņinacażtakaz. Nekziqui pusi patac wata kamaquichă. Jalla nii yokquin am majchmaatinacaqui yekja żoņż mantakaz paaquichă. Niżaza sufrican kamaquichă”. ⁷Niżaza Yoozqui cjichichă: “Am majchmaatinaca sufriskatchiż cjenauki, wejrqui nii sufriskatņi żoņinaca casticačha. Nekztanaqui am majchmaatinacaqui

nii yokquiztan ulanżcaquichă. Ulanżcu tii yokquiz wejr sirwaquichă”.

⁸Niżaza Yooz Ejpqui tsjii compromiso paachichă Abrahamżtan. Nii compromis jaru Abrahamqui persun janchiquiz chimpuskatchichă. Niżaza quinsakal tjuņquiztan Isaac majch nastan, Abrahamqui niżż persun majchquiz chimpuchičha. Wiruņaqui Isaacqui niżż majch Jacobżquiz chimpuchičha. Wiruņaqui niżazakaz Jacobqui niżż tuncapan lucmajch maatinacżquiz chimpuchičha. Jacobż lucmajch maatinacżquiztan tjonchichă učhum tuncapan t'akanaca.

⁹Nii Jacobż majchnacaqui učhum tuquita atchi ejpnacatačha. Ninacaqui José cjita lajkż quintra iņiziņitačha. Jalla niżtiquiztan ninacż lajk tuychichă. Nekztanaqui nii tuyta lajkqui Egipto yokquin chjichtačha. Pero Yooz Ejpqui Josiżtan chicapachatačha nii oraqui.

¹⁰Nekztan sufrichi želan Yoozqui José liwriichiča. Nižaza walja zizni cjišiča. Jalla nuž cjen Faraón chawc jiliriqui Josižtan cuntintutača. Nekztanaqui Faraonqui José utchiča, Egipto wajtchiz žoñinaca mantiñijapa, nižaza Faraonž kjuychiz žoñinaca mantiñijapa.

¹¹Wiruñ tsjii kjaž watquiztan tsjii mach'a željchiča, ancha sufrichiča tjapa Egipto yokquin kamni žoñinacami, nižaza tjapa Canaán yokquin kamni žoñinacami. Jalla nuž cjen učhum tuquita ejpnacaqui ana čjulu lujlsmi nii timpunacac wachatča. ¹²Pero Jacobqui tsjii quintu nonchiča, Egipto yokquin trigo željchi. Nuž nonžcu niž majchnaca cuchanchiča. Niiž majchnacaqui učhum tuquita ejpnacatača. Jalla niitača primer ojkaqui Egipto yokquinaqui. ¹³Nekztanaqui pizc wila ojkcū, Josequi niž jilanacžquiz pajkatchiča. Jalla nižtiquiztan Egipto chawc jiliriqui Josiž familia pajchiča. ¹⁴Jalla nekztanaqui Josequi mantichiča niž ejp Jacobo zijicajo, nižaza tjapa familianacžtanpacha. Ninacaqui pakallak tunca pjijskani žoñitača. ¹⁵Jalla nekztanaqui Jacobqui kami ojkcichiča Egipto yokquin. Nekzi ticziča Jacobqui. Nii yokquin ticzizakazza učhum tuquita atchi ejpnacaqui. ¹⁶Wiruñaquii nii atchi ejpnacž tsjijnaca chjichtatača Siquem cjita yokquin. Nicju tjattatača Abrahamž kjayta yokquin. Abrahamqui nii Siquem yoka paaztan kjaychiča Hamor cjita maatinacžquiztan.

¹⁷Tuquitan juramintužtan Yoozqui Abrahamžquiz taku tjaachiča, tuž cjican: “Am majchmaatinacžquiz tii yoka tjaača”. Nii tjaata taku cumplis ora žcatžinžcan Israel wajtchiz žoñinacaqui waljaž miratča Egipto

yokquinaqui. ¹⁸Nii oranaca Egipto yokquinaqui tsjii chawc jiliriqui mantiz kallantichiča, ana José pajni. ¹⁹Nii jiliriqui učhum wajtchiz žoñž quintrapinsichiča. Nekztan anawal quintrapaachiča učhum tuquita atchi ejpnacžquiz. Nii jiliriqui mantichiča, Israel lucmajch maatinaca majttan zawnc uchla, ticzi cjisjapa. ²⁰Jalla nii timpu Moisesqui majttatača. Ancha c'achja wawatača niiqui. Yoozqui nii wawžtan wali cuntintutača. Niiž maa ejpqui čhjep jiiz kjuyquiz mantiñičiča. ²¹Ana iya nii wawa čhoj čhoji atčcu, kjuyquiztan chjitchiča. Nekztanaqui Egipto chawc jilirž persun majtqui nii Moisés wawa wajtchinča. Jalla nuž wajtčcu, persun maatižtakaz uywazzinča. ²²Jalla nižtiquiztan Moisesqui tjapa nii Egipto žoñinacž tjaajintanaca zizni cjišiča. Nižaza zuma paatiquiztanami nižaza zuma chiitiquiztanami walja rispittatača Moisesqui.

²³Niž pusi tunc watchiz cjican Moisesqui parti Israel žoñinacžquin tsjii tjonžni ojkc pecchiča. ²⁴Jalla nuž tjonžni ojkcū cherchiča, tsjii Egipto žoñiqui tsjii Israel žoñi wjajtatča, jalla nii cherchiča. Nii Israel žoñžtan cjatčcu kijtchiča. Nekztan nii Egipto wjajtni žoñžquiz ayni tjepuncan conchiča. ²⁵Nekztanaqui Moisesqui kuzquiz zizziča, Yoozqui nii utchiča, Israel žoñinaca Egipto žoñinacž mantuquiztan liwriizjapa, jalla nii. Nižaza Moisesqui pinsichiča, Israel žoñinacaqui nižtazakaz zizziča. Pero nii Israel žoñinacazti ana nižta naaziča, Moisesqui Yooz uchta liwriiñi, jalla nii. ²⁶Jaka tažquii Moisesqui tsjii pucultan Israel žoñinacžtan ch'aasni zalchiča. Jalla nuž zalčcu, pertunaskats pecchiča, tuž cjican: “Jilanaca, pucultan ančhucqui

Israel žoñinacčhucča. ¿Kjažtiquiztan ančhucpora ch'aasjo?" ²⁷ Nekztanaqui ana wal uj paañi žoñiqui Moisés tewkziča, tuž cjican: "¿Ject am jiliri utchejo, wejrnac mantiñijapajo?" ²⁸ Zeczu Egipto žoñi conchamča. ¿Jazic wejrzam konz pecjo?" ²⁹ Jalla nii nonžcu Moisesqui atipassiča Madián yokquin. Jalla nicju kamchiča nacjuñta žoñi cjenaqui. Nicju tjunatan zalzcu, pucultan ocjalchiz cjissiča, nii yokquin kaman.

³⁰ Pusi tunc watquiztan nekztan tsjii ch'ekti yokquintača Moisesqui, Sinaí cjita cur žcati. Jalla nekz želan, tsjii anjilaqui niižquin jecžquichiča, tsjii kalu ujžtan taaztažtakaz, nii taypiquiz. ³¹ Jalla nii cheržcu, Moisesqui ispantichiča. Jalla nii uj cheri macjatcan, nonziča Yooz Jilirž jora. Nii joraqui tuž cjichiča: ³² "Wejrqui am tuquita atchi ejpnacž Yooztča. Abrahamž Yooztča, nižaza Isaacž Yooztča, nižaza Jacobž Yooztča". Nekztanaqui Moisesqui tsucchi kjarcati kallantichiča. Iya ana cheržni atchiča. ³³ Nekztanaqui Yooz Jiliriqui cjichiča: "Am čhjata chjojknazna. Tii amiž tecžta yokaqui wejt yokača. ³⁴ Wejrqui weriž illzta žoñinacž sufriñi cherchinča nii Egipto yokquin kamñi. Nižaza ninacž llaquizan ninaca kjawñi nonzinča. Jalla nižtiquiztan ninaca liwrii chjijwžquichinča. Picha, ninaca liwriizjapa am cuchnača Egipto yokquin".

³⁵ Tuqui Israel wajtchiz žoñinacaqui Moisesquiz ana rispitchiča. Niižquiz cjichiča: "¿Ject am jiliri utchejo, wejrnac mantiñijapajo?" Jalla nuž cjenami Yoozqui nii Moisespacha jiliri utchiča, Israel žoñinaca liwriyajo. Israel žoñinaca liwriizjapa, nii taazta kalquiz jecžquichi anjilaqui

Moisesquiz yanapaquiča. ³⁶ Jalla nekztanaqui Moisesqui učum tuquita atchi ejpnaca jwessiča nii Egipto yokquiztan. Ima nii yokquiztan ulanskatan milajrunacami Yooz siñalanacami paachiča, nižaza Ljoc cjita kot taypiquiz tjakziča, jalla nuž milajru paachiča. Nekztan pusi tunc wata ch'ekti yokquin ojklaycan milajrunacami Yooz siñalanacami paachiča. ³⁷ Jalla tii Moisespacha Israel wajtchiz žoñinacžquiz cjichiča: "Yoozqui wejr cuchanžquichiča ančhuc liwriizjapa. Jalla nižta irata Yoozqui Israel žoñinacžquiztan yekja liwriiñi profeta cuchanžcaquiča. Jalla niiž tjontan ančhucqui niižquiz caza". Jalla nuž cjichiča Moisesqui. ³⁸ Nižaza Moisesqui Israel žoñinacžtan ch'ekti yokquin žejlchiča, Sinaí cjita cur latuquiz. Jalla nekz tsjii anjilžtan parlichichiča. Nižaza učum tuquita atchi ejpnacžquiz palt'ižinchiča. Jalla nižtiquiztan Yooz taku tanzichiča, tjurñi Yooz taku. Učumnacaltajapa nii tanzichiča. Nižaza učumnacaquiz nii taku tjaajinchiča.

³⁹ Učum tuquita ejpnacaqui Moisesquiz ana caz pecchiča. Ana pajz pecatča, Yooziž uchta jiliri, jalla nii. Egipto yokquinpanž quejps pecatča. ⁴⁰ Jalla nekztanaqui učum tuquita ejpnacaqui Aaronžquiz paljaychiča, tuž cjican: "Yooznaca paažinalla, wejtnaca tucquin chjichñijapa. Nii Moisesaqui wejrnaca ulanskatchiča Egipto yokquiztan. Pero anziqi anal zizi atuča, čjulukat niižquiz watčani. Cunamit curquiztan ana quejpžcačhani". ⁴¹ Jalla nekztanaqui nii žoñinacaqui korquiztan tsjii wac chul turu paakatchiča ninacžtajapa, tsjii yooz cjisjapa. Nekztan nii paata yoozquiz wilana conchiča. Nižaza

ninacaz paata yoozquiztan ancha cuntintutača. ⁴²Jalla nižtiquiztan Yoozqui ninaca jaytichiča, ninacz persun kuzcamakaz kamajo. Jalla nižtiquiztan persun kuzcama cjcjican arajpach tjuñimi, jiizimi, warawaranacami sirwichiča. Jalla nii puntuquiztan Yooz taku chiiñi profetanacaz cjiirta liwruquiz tuž cjiirtatača:

“Israel žoñinaca, ančhucqui pusi tunc wata ch'ekti yokquin kamcan, wilana conchinčhucča. ¿Wejtquin sirwisjapa nižta paachinčhucjo? ⁴³Anapanča. Antis Moloc cjita žoñiž paata yoozquin jawkchinčhucča nii wilananaca. Nižaza Renfán cjita warawara yooztakaz cherchinčhucča. Jalla nii warawar yoozquin rispitchinčhucča wilana tjaacan. Nižaza ančhuca tuqui nii žoñiž paata yooznaca chjitskatiñchuctača. Ančhucpachaz nižta yooznaca paachinčhucqui, neks sirwizjapa. Jalla nižtiquiztan ančhuc jwsača ančhuca kamz yokquiztan. Jalla nuž jwescu Babilonia cjita yokquiztan nawjctuñtan chjichača”.

Jalla nuž Yooz tawk liwruquiz cjiirtatača.

⁴⁴Ch'ekti yokquin ojklaycan učum tuquita ejpnacaqui zkiz timpluchiztača. Yoozqui Moisesquiz nii timplu plano tjeeziča. Nekztanaqui Yooz mantita plan jaru, nii timpluqui paatatača. Nekziqui Yoozqui sirwitatača. ⁴⁵Nii zkiz timplu učum tuquita ejpnacaqui tanzicha irinsažtakaz. Josuež irpita, učum tuquita ejpnacaqui nii timplu chjitchiča, Canaán yokquin

luzcan. Nekz žejlñi žoñinaczquiztan nii yoka tanzicha. Yooz pacha nii žoñinaca chjatkatachiča, učum tuquita ejpnaczquiz tjaazjapa. Nii yoka tanžcu jalla neks kamchiča Davidž kamtacama. ⁴⁶David cjita jiliriqui Yooziž ancha okžtatača. Jalla nižtiquiztan Davidqui tsjii timplu kjuya kjuyz pecatča Yooz sirwizjapa. Niiž tuquita ejp Jacobqui nii Yooz sirwichizakazza. ⁴⁷Pero ultimquiziqui Salomón cjita Davidž majch, niiča Yooz timplu cjican kjuychiqui. ⁴⁸Jalla nuž timplu kjuyta cjenami, werar Yoozqui anaž žoñiž kjuyta kjuyquiz želasača. Jalla nuž cjichizakazza tsjii Yooz taku chiiñi profet žoñiqui. Yooz puntuquiztan jalla tuž cjiirchiča nii profet žoñiqui:

⁴⁹“Wejt mantis julzza arajpachaqui. Tii yokaqui wejt kjojcha jeejzkatzjapažtakazza. ¿Chjuluž cheechi kjuya ančhucqui wejtajapa kjuyasajo? Jalla nuž cjiča Yooz Jiliriqui. ¿Jakziquint wejt jeejz yoka žejljo? ⁵⁰Wejrtča tjappacha paachintqui”.

Jalla nuž Yooz puntuquiztan cjiirtatača.

⁵¹Nižaza Estebanqui tira chiichiča, tuž cjican:

—Ančhucqui ancha chojru kuzzizčhucpanča, ana Yoozquin kuzzizčhucča. Cjuñchizčhucča pero ana Yooz taku nonzinčhucča. Nižaza ančhucqui Yooz Espiritu Santužquiz anapan caziñchucča. Tuquita ejpž nižtazakazza ančhucqui. ⁵²Ančhuca tuquita ejpnacaqui Yooz taku chiiñi profetanaczquiz ana rispitchipanča. Antis sufriskatchipanča. Nii profetanacaqui tsjii tsjan zuma žoñiž tjonz mazinchiča. Ančhuca tuquita ejpnacazti ninaca conchiča. Jaziqui

nii zuma žoñiqui tjonchiča. Ančhuczi nii žoñi preso tankatchinčhucča, y nižaza conkatchinčhucča.

⁵³ Anjilanaquai ančucaquiz Yooz lii tjaachiča. Jalla nii tjaata lii ana cazziñchucča. —Jalla nuž Estebanqui paljaychiča.

ESTEBAN CONTA

⁵⁴ Estebanž chiita taku nonžcu, ancha žawjchiča. Nižaza Estebanž quintrā ižke jojchiča, ninacāž žawjchi tjeezjapa. ⁵⁵ Estebanžti Espíritu Santuž irpitapankaztača. Nekztanaquai Estebanqui arajpach kjutñi cherziča. Nekztan Yoozquiztan walja c'ajžquini cherchiča. Nižaza Yooz Ejpž žew latuquiz Jesusa tsijtsi cherchizakazza.

⁵⁶ Nekztan Estebanqui cjichiča:

—iArjapach kjutñi cheržna!

Arjapacha cjetzil cheruča. Nižaza Yooz Ejpž žew latuquiz tsijtsi žejlča Jesusa Yooz Maatiqui.

⁵⁷ Ninacazti ana nonžni yujcchiča. Cjuñi chawcziča. Nižaza altu joržtan kjawcan apura zalchiča tanzjapa.

⁵⁸ Jalla nuž tanžcu, wajtquiztan jwessiča. Nekztan wajtž tjiiquin, maztan čhajcchiča. Nii maz čhajcñi žoñinacaquai tsjii Saulo cjita tjowžquiz ninacž zquiti cwiťizinajo ecchiča.

⁵⁹ Jalla nuž maztan čhajcan, Estebanqui Yoozquin mayizichiča, tuž cjican:

—Wejt Yooz Jesús Jiliri, wejt animu chjichalla.

⁶⁰ Jalla nekztanaquai Estebanqui quillziča. Altu joržtan kjawchiča, tuž cjican:

—Wejt Yooz Jiliri, tii žoñinaca tii ujquiztan pertunalla amqui.

Jalla nuž kjawžcu, ticziča.

CRICHI ŽOÑINACA WICHANZI

8

¹ Nekztanaquai nii Saulo cjita tjowaquai Esteban

conzjapaquai tjapa kuztača. Jalla nii noojpacha Yoozquin criichinacž quintrā juc'anti juc'anti sufriskati kallantichiča Jerusalén wajtquiz. Jalla nižtiquiztanaquai tjapa criichi žoñinacaquai wichanziča tjapa Judea yokaran nižaza Samaria yokaran. Nii Jesusiž apostolonacazti ana wichanziča. ² Tsjii kjažultan Yoozquin zuma sirwiñinacaquai Estebanž curpu tjatziča. Nižaza ancha kaachiča nižquiztan. ³ Nekztan nii Saulo cjita žoñiqui criichinacž quintrā ancha anawali paachiča. K'ala tjanž pecchiča. Nižaza kjuyquiztan kjuya ojklaychiča luctaka cjiñi maataka cjiñi tanzjapa, nižaza carsilquiz chawjckatsjapa.

SAMARIA WAJTQUIN YOOZ TAKU PALJAYTA

⁴ Jakziquin nii wichanzi criichinacaquai ojktčhaja, jalla nicju liwriñi Yooz taku paljayñitača. ⁵ Tsjii wichanzi žoñiqui Felipe cjitatača. Jalla nii žoñiqui tsjii Samaria yokquiz žejlñi watja ojkičiča. Jalla nicju Cristuž puntuquiztan paljayi kallantichizakazza. ⁶ Jalla nuž paljayan žoñinacaquai walja ajcziča. Tjapa nii žoñinacaquai Felipiž paljayta taku tjapa kuztan nonznatča. Nižaza Felipiž paata milajrunaca cheržcu, niž chiita taku tjapa kuztan catokchiča. ⁷ Walja zajraž tanta žoñinacaquai čhetintatača. Nii laa žoñinacžquiztan zajraqi kjawcan ulanchiča. Nižaza walja zuch žoñimi cojumi čhetintazakaztača. ⁸ Jalla nižtiquiztan tjapa nii wajtchiz žoñinacaquai cuntintutača.

⁹ Jalla nii wajtquiz tsjii Simón cjita wayt'ir žoñi želatča. Tuqitanpacha wayt'iri ojklayñi žoñitača, nii Samaria wajtchiz žoñinaca incallcan.

—Wejrtča chekan žoñtqui —cjican ojklayñitača.

¹⁰ Jalla niiž taku walja nonz pecñitača. Nižaza kolta cjiñimi pakji cjiñimi tuž cjiñitača:

—Tii žoñiča walja Yooz aztanaqui. Yooztakazza tiiqui. —Nuž cjican cjiñitača.

¹¹ Ažk watanaca nii wayt'ir žoñiqui žoñinaca incallžcu, walja cazkatñitača.

¹² Jalla nekztanaqui Felipiqui tjonchiča Yooz taku paljayi. Yooz Epiž mantiz puntuquiztan nižaza Jesucristuž puntuquiztan jalla nuž paljaychiča. Jalla nuž paljaytiquiztan walja luctaka cjiñi maataka cjiñi tjapa kuztan criichiča Yooz Ejpžquin. Nekztan criitiquiztan bautistatača. ¹³ Nižaza Simonpachača criichiqui, nižaza bautistatača. Jalla nekztanaqui Felipžquiz cumpanti kallantichiča. Felipž milajrunaca paan, walja ispantichiča nii Simonaqui.

¹⁴ Nekztanaqui Jerusalenquin žejlñi apostolonacaqui quintu nonchiča, Samaria wajtchiz žoñinaca Yooz taku catokchiča, jalla nii. Jalla nuž nonžcu nicju tsjii pucultan cuchanžquichiča, Pedružtan Juanžtan. ¹⁵ Jalla nuž irantižcuqui, nii pucultanaqui Samaria wajtchiz criichinacžtajapa Yoozquin mayizichiča, Espiritu Santu tanznajo.

¹⁶ Tuquiqui anaž jakziltižquizimi Espiritu Santuqui luztkalča. Jesucristuž tjuužtan alajakaz bautistatakalča. ¹⁷ Jalla nekztanaqui Pedružtan Juanžtan ninacž juntuñ kjaržtan lanziča. Jalla nižtiquiztan Espiritu Santuqui ninacžquiz luzziča.

¹⁸ Jalla nuž kjaržtan lanztiquiztan Espiritu Santuž luzñi cheržcu, Simonaqui paaz tirziča, ¹⁹ tuž cjican: —Wejtquin zakaz nii am azi tjaalla. Jalla nekztanaqui wejrzakaz kjaržtan lanžcu žoñinacžquiz Espiritu Santo luzkatača.

²⁰ Jalla nekztanaqui Pedruqui Simonžquiz cjichiča:

—Am paazmi amtanpacha k'ala katžla. Yooz onanta Espiritu Santo anaž kjayasača paaztan. ¿Kjažtiquiztan nižta am pinsejo? ²¹ Amqui tii langzquiz anaž mitisiz waquiziča. Tii Yooztajapa langzquiz anaž amta cjesača. Yooz yujcquiziqui am kuzqui anača zuma. ²² Jalla nii am anawali pinsisnaca jayta, nižaza apatata.

“Wejrqui anawali pinsichinpanča” cjican Yoozquin rocaza, am kuz pinsitanaca pertunta cjisjapa. Nekztan cunami pertunta cjis atčhani. ²³ Amqui ana zuma kuzzizzamča. Anawali pinsiskaz am kuzquiz tjonča. Wejrqui am ana wali int'iskatča.

²⁴ Jalla nekztanaqui Simonaqui kjaaziča, tuž cjican:

—Wejtajapa Yooz Jiliržquin mayiziñalla, ana čjulumi tii amiž chiita takunacquiztan wejtquiz watajo.

²⁵ Nekztanaqui nii apóstol žoñinacaqui Jesucristo Jilirž puntuquiztan zuma chiichiča, nižaza Yooz taku zuma parličiča. Jalla nekztanaqui Samaria yokquiz wacchi kolta watjaran liwriñi Yooz taku paljayñi ojklaychiča. Jalla nuž ojklayžcu quejpchiča Jerusalén watja.

FELIPŽTAN ETIOPIA

WAJTCHIZ ŽOŇŽTAN

²⁶ Niiž wiruñ tsjii Yooz anjalaqui Felipžquiz cjichiča:

—Žaažna. Jerusalén wajtquiztan warchuc oka, Gaza ojkiñi jiczquin.

Ch'ekti yoka nuž watča nii jiczqui.

²⁷ Nekztanaqui Felipiqui žaažcu, ojkičiča. Nii jiczquiz ojkan tsjii Etiopía wajtchiz žoñžtan zalčiča. Nii žoñiqui eunucutača. Nižaza jilirž cusasanaca cwiitiñi žoñitača. Candace cjita žonqui tsjan chawc jiliritača Etiopía wajtquin. Jalla naa chawc jilirž mantuquiztača nii cusasanaca cwiitiñi

žoniui. Nii žoniui Jerusalén watja ojkhitača werar Yooz rispitsjapa.

²⁸ Jaziqui persun watja quepi ojkhicha.

Niiz persun cawall autuquiz julzi želatča, Isaias cjiirta Yooz taku liican. Isaiastača tuquita Yooz taku chiiñi profetaqui. ²⁹ Jalla nekztanaqui Espíritu Santuqui Felipižquiz cjichiča: —Nii cawall autuquiz macjata.

³⁰ Jalla nuž macjatžcu Felipiqui nonziča, nii žoniui Isaias cjiirta Yooz taku liiñi, jalla nii. Jalla nuž nonžcu Felipiqui pewcziča, tuž cjan:

—¿Nii Yooz taku am intintiya?

³¹ Nii žoniui kjaaziča, tuž cjan: —Anaž wejtquiz jec tjaajiñimi žejlča. ¿Jaknužt wejr intintasajo?

Nekztanaqui nii žoniui Felipe kjawziča, nii autu juntun yawzcajo, niizquiz julzinžcajo.

³² Jalla nii cjiirta Yooz taku tuž cjetča:

“Uzažtakaz coni chjichtaž cjequiča. Uzaqui ch'ujukaz žejlpanča tsjii chjiipñi žožžquiziqui, jalla nižta conz oraqui ch'ujuž cjequiča niui. Anaž chiyaučiča.

³³ Zuma kamañchiz cjenami ombrawillta cjequiča. Ana čjul justiciami wataquiča. Niiž majchmaatquiztan, čjequit tii puntu watchinaca quint'izjapa želas? Tii muntuquiz niiz kamz wira tucuzinznaučiča”.

³⁴ Jalla nii ližcu nii jiliriqui Felipžquiz pewcziča tuž cjan:

—¿Jecž puntuquiztan tii profetaž cjiirta chiijo? ¿Niiz persun puntuquiztankaya? už čyekja žožž puntuquiztan, jaa?

³⁵ Jalla nekztanaqui Felipiqui nii liita Yooz taku puntuquiztan tjaajñi kallantichiča. Jesucristuž puntuquiztan niui chiyatča. Jalla

nii zuma liwriiñi taku tjaajziča.

³⁶ Jalla nekztanaqui tsjii wijiña macjatcan, nii jiliriqui cjichiča:

—Tekz kjaz žejlča. ¿Anaj tii kjazquiz bautista cjesaya?

³⁷ Felipiqui kjaaziča, tuž cjan:

—Am persun tjapa kuztan criyaquiz niui, bautistam cjesača.

Nii jiliriqui kjaaziča tuž cjan:

—Jesucristuqui Yooz Majchča, jalla nii tjapa kuztan criyuča.

FELIPIQUI YOOZ TAKU KJANZT'ICHIČA

³⁸ Jalla nekztanaqui nii cawall autu tsijtskatchiča. Nekztanaqui pucultan chjiwžquichiča kjaz kjutñi. Nekztanaqui Felipiqui nii jiliri bautissiča. ³⁹ Kjazquiztan ulnan, Yooz Espíritu Santuqui Felipe chjitchiča. Felipiqui ana iya tjenchiča nii jiliržquiz. Jalla nuž cjenami nii jiliriqui tira ojkhicha cuntintu. ⁴⁰ Felipizti Azoto cjita wajtquin chjichtatača. Nižaza wajtquiztan watja ojklaycan, liwriiñi Yooz taku paljayñi ojkhicha, Cesarea cjita watja irantiscama.

SAULO JESUCRISTUŽTAN ZALCHIČA

9 ¹ Jalla nuž Felipe ojklayanaqui Sauluqui Yoozquin criichi žoñinaca tanzjapa nižaza conzjapa tirapan kuz tjaatča. Anapanž jaytiz pecatča. Nekztanaqui timplu chawc jiliri cheržñi ojkhicha. ² Nii chawc jiliržquiztan ortina maychiča. Damasco cjita watja ojz pecatča. Jalla nicju ajcz kjuyaran ojklaz pecatča, Yooz jiczquiz luzñi žoñinaca kjurzjapa, criichi luctaka cjiñi maataka cjiñi kjurzjapa. Nii criichinaca wajtžcu preso tanz pecatča, Jerusalenquin chjitzjapa. Jalla nižta ojklazjapa ortina maychiča. ³ Ortina jwescu,

ojkchiċha Damasco cjita wajt kjutñi. Damasco žcatilla cjen, tiripintit tsjii wali pajk kjanaqui muzpa kjanžquichiċha niiz muytata. ⁴Sauluqui yokquiz tjojtsiċha. Jalla nuž tjojtzcu tsjii jora nonziċha, tuž cjiñi:

—Saulo, Saulo, ċkjažtiquiztan am wejt quintramjo?

⁵Nekztanaqui Sauluqui pewcziċha, tuž cjican:

—Wejt Jiliri, ċject amya?

Nii tsewtan chiiñi joraqui kjaaziċha, tuž cjican:

—Wejrtċha Jesusitqui. Amqui wejt quintram paaċha. Nuž paacan, ampacham quintra paaċha. Tsjii wacaqui ar parž quintra llawkžcu, persun janchiž quintraž paaċha. Jalla niža irata am persun quintram paaċha.

⁶Nekztanaqui Sauluqui tsuczcu cjaminzka tjonziċha niiz curpuqui. Nekztanaqui cjichiċha:

—Wejt Jiliri, ċhjuulu wejr paajum cjee amya?

Yooz Jiliriqui cjichiċha:

—Žaažna. Watja luzna. Jalla nicju amquiz kjana chiita cjequiċha ċhjulut paasalaja, jalla nii.

⁷Saulužtan chicapacha ojklajñi žoñinacaqui ancha tsucchiċha. Ninacaqui nonzizakazza nii jora chiižquini. Pero ana cherchiċha jecmi. ⁸Jalla nekztanaqui Sauluqui žaaziċha yokquiztan. Jalla nuž žaažcu ċhjujiqui cjetziċha, pero ana wira cheri atchiċha. Jalla nižtiquiztan Sauluž kjarcu tanžcu Damasco watja ċhjitchiċha nižtan chica ojklajñi žoñinacaqui. ⁹Jalla nii wajtquin ċhjep maj ana cherñi žejlchiċha. Nižaza ana ċheri lujlñi anaza kjaz licñi žejlchiċha.

¹⁰Jalla Damasco wajtquin tsjii Ananías cjita Yoozquin criichi žoñi želatċha. Nii Ananiasquiz Yooz Jiliriqui jeczquichiċha wiiquin, tuž cjican:

—iAnanías!

Jalla niiqui kjaaziċha, tuž cjican:

—Wejt Jiliri, tekziċha wejrqui.

¹¹Nekztanaqui Yooz Jiliriqui cjichiċha:

—Žaažna. Sok'o cjita call kjutñi oka. Nekztan Judas kjuyquiz pewcžna, tuž cjican: “ċSaulo, Tarso wajtchiz žoñi anaj žejlya?” Jalla nuž pewcznaquiċha. Nii Sauluqui Yoozquin mayizican želaquiċha. ¹²Tsjii wiiquin ċhjuužcan, tižta cherchiċha Sauluqui. Tsjii Ananías cjita žoñiqui niizquiz luzziċha. Jalla nuž luzcu kjaržtan niizuntuñ lanziċha wilta cherajo. ċhjuužcan Sauluqui jalla nuž cherchiċha.

¹³Jalla nuž nonžcu, Ananías cjichiċha:

—Wejt Jiliri, tii žoñžquiztan wacchi quintunaca nonchinċha. Jerusalén wajtquiz juc'anti anawali paachiċha amquin criichinacžquiz. ¹⁴Anziqui tekzpacha tjonzizakazza. Timplu ċhawc jiliriž tjaata ortinchiz tjonchiċha, tjapa amquin rispitñi žoñinaca tanžcu preso ċhjitsjapa.

¹⁵Pero Jesucristo Jiliriqui cjichiċha:

—Oka amqui. Wejrqui tii žoñi illzinċha, wejt puntuquiztan parlajo. Yekja nacionchiz žoñinacžquizimi nižaza ninacž jilirinacžquizimi nižaza Israel nacionchiz žoñinacžquizimi, jalla nuž wejt puntuquiztan parlaquiċha tiiqui. ¹⁶Jalla niiqui wejt puntuquiztan parliñiž cjen ancha sufraquiċha. Wejrqui niizquiz intintiskataċha jalla niiz sufris puntuquiztan.

¹⁷Jalla nekztanaqui Ananiasqui ojkiċha jakziquin Saulo želatċhaja, jalla nicju. Saulužquin luzcu, kjaržtan niizuntuñ lanziċha, tuž cjican:

—Saulo, jila, amiž jiczquiz tekz tjonan Jesusa Jiliriqui amtan zalchiċha. Jalla nii Jesusa Jiliriqui wejtquin mantižquichiċha, am wilta ċherkatajo,

nižaza Espíritu Santuž am kuzquiz luzajo.

¹⁸Nii orapacha Sauluž čhujcquiztan ch'iz cjaipažtakaz tjojtsiċha. Nekztan wilta cherñi cjiſsiċha. Nekztanaqui Sauluqui žaaziċha, nižaza bautista cjiſsiċha. ¹⁹Jalla nekztanaqui čhjeri lujlžcu, wilta azi tanziċha. Nekztan tsjii kjaž maj Damasco cjita wajtquin kamċiċha Yoozquin criichinacžtan.

SAULUQUI JESUSIŽ PUNTUQUIZTAN PALJAYCHIĊHA

²⁰Jalla nuž kamcan Sauluqui ajcz kjuyanacquiziqui Jesusiž puntuquiztan paljayi kallantichiċha tuž cjican:

—Jesusaqui werar Yooz Majchpanċha.

²¹Nii nonžñi žoñinacaqui ispantichiċha, tuž cjican:

—Tii žoñiqui Jerusalén wajtquin ojklayċiċha Jesucristužquin rispitñi žoñinaca tani. Tekzizakaz tjonċiċha Jesucristužquin criichinaca tanažlani. Nižaza preso ċhċhažlani, timplu jilirinacžquin intirjizjapa. Jalla nii žoñipanċha, žana jaa?

²²Pero Sauluzti juc'anti tjup kuzziz Yooz taku parliċiċha. Juc'anti juc'anti atipñi takunacžtan parliċiċha. Zuma kjana intintiskatċiċha, Jesusa Yooziž cuċhanžquita Cristuċha, jalla nii. Jalla nuž intintiskatan, nii Damasco wajtquin kamñi judionacami kuz inakaz turwaysi quirċiċha.

SAULUQUI ATIPCHIĊHA

²³Tsjii kjaž majquiztan nii žejlñi judío žoñinacaqui palt'ichiċha Saulo conzjapa. ²⁴Nii žoñinacaz conz palt'ita zizziċha Sauluqui. Majiñami weenami wajtž zana tjewsnatċha, čhjulorat wajtquiztan ulnaċhaja, jalla nii ora Saulo conzjapa. ²⁵Pero tsjii ween nii wajtċhiz criichinacaqui tsjii pajk canastiquiz yaažcu, Saulo

ċhjijunžquichiċha. Tsjii pajk alto murallaž muyuntitataċha nii watjaqui. Jalla nii juntun ċhjijunchiċha zawncchuc. Jalla nuž atipassiċha Sauluqui.

SAULUQUI JERUSALENQUIN QUEJPCHIĊHA

²⁶Sauluqui Jerusalén watja quejpžcu Yoozquin criichi žoñinacžtan ajcz pecatċha. Nii criichinacazti Saulužtan ajcz eksiċha. “Ana ultimu Yoozquin criichižcaa” cjican kuzquiz pinsichiċha. ²⁷Jalla nuž cjenami Bernabé cjita jilaqui Saulo ċhjitchiċha, apostolonacžtan zalzjapa. Nekztanaqui Bernabequi apostolonacžquin mazziċha, jaknužt Saulo jiczquiz ojkecan Jesucristo Jiliržtan zaltċhaja, jalla nii. Nižaza jaknužt Jesucristo Jiliriqui Saulužquiz paljayċiċhalaja, nii mazñi. Nižaza jaknužt Damascuquin Sauluqui Jesucristo puntuquiztan tjup kuzziz parliċhaja, jalla nii mazzizakazza. ²⁸Nekztanaqui Sauluqui Jerusalén wajtquin ojklayċiċha; nižaza hermanonacžtan kamċiċha. ²⁹Jalla nuž žejlcan Sauluqui Jesucristuž puntuquiztan tjup kuzziz paljayċiċha. Nižaza griego taku ċhiñi judionacžtan ċh'aascan parliċiċha. Nii žoñinacaqui Saulo conz pecatċha. ³⁰Jalla nii quinto zizcu, nii parti criichinacaqui Saulo ċhjitchiċha Cesarea cjita wajtquin. Jalla niwjctan Tarso cjita watja cuċhanchiċha.

³¹Jalla nekztanaqui nii timpuqui walikaz želatċha iclizanacami, Judea yokquin žejlñi iclizanacami, Galilea yokquin žejlñi iclizanacami, Samaria yokquin žejlñi iclizanacami. Jalla nuž tjappacha walipantaċha. Yoozquin criichinacami Yooz Jiliri walja tjapa kuzziz cjisnatċha. Rispitñi kuzziztaċha.

Nižaza Espíritu Santuqui ninaca kuzñitača, cuntintu kamajo. Jalla nižtiquiztan walja yapchiča Yoozquin criichinacaqui.

ENEAS ČHJETINTA

³²Nižaza Pedruqui criichi žoñžquiztan žoñi tjonťjonžcan ojklayatča. Nižaza Lida wajtchiz Yooz parti žoñinacžquiz tjonžñi ojkičiča.

³³Jalla nicju Eneas cjita žoñžtan zalčiča. Eneasqui quinsakal wata laa zuchu želatča, tjajz ajpžquiz želatča.

³⁴Nekztanaqui Pedruqui nižquiz cjichiča:

—Eneas, Jesucristuqui am čhjetnaquiča. Žaažna. Am tjajz zquiti zumpacha chjinžna.

Nii orapacha Eneasqui žaaziča.

³⁵Nekztanaqui nii Lida wajtquiz kamñi žoñinacami nižaza Sarón wajtquiz kamñi žoñinacami nii zuch žoñi čhjetinta cherchiča. Nekztanaqui niž tuquita ejpnacž cuzturumpinaca eccu, Yooz Ejp Jiliržquin criichiča. Nižaza Yooz kamañchiz cijsiča.

DORCAS CJITI ŽON JACATATSKATTA

³⁶Jalla nii timpuzakaz Jope cjita wajtquin tsjaa Yoozquin criichi žon želatča, Tabita cjiti. Griego tawkquiz Dorcas cjiti tjuuchiztača. Naa maatak žon zuma paatanaca paacan zuma kamiñpantača, nižaza t'akjir žoñinaca okzniñtača. ³⁷Jalla nii timpu Dorcas cjiti žonqui laa cjiscu, ticzinča. Ima tjatcan naaža curpu awjžcu, tsjii kjuyquiz tseweta pisuquin chjichtatača. ³⁸Jope watjaqui Lida žcatillatača. Jalla nii Lida wajtquin Pedruqui želatča. Jalla nuž zizcu nii Jope wajtchiz hermanonacaqui pucultan žoñinaca cuchanchiča Pedružquin rocajo, tuž cjican:

—Apuraj tjonla, ana enenžcu.

³⁹Nekztanaqui Pedruqui tsjitscu ninacžtan ojkičiča. Jalla nicju irantižcu nekztan Pedruqui chjichtatača, Dorcas curpu majčža kjuyquin. Nii kjuyquin Pedružtan chica žejlcan žew maatakanacaqui kaatča. Nižaza ninacaqui Pedružquiz tjeeziča Dorcas paata zquitinaca, nii. ⁴⁰Jalla nekztanaqui Pedruqui tjappacha nii parti žoñinaca ulanskatchiča. Ninacž ulantiquiztan quillžcu Yoozquin mayizichiča. Naa ticzin žona curpu kjutñi cheržcu chiichiča, tuž cjican: —Tabita, žaažna.

Jalla nižtiquiztanaqui naa ticzin žonqui čhjujcu cjetzinča. Nekztanaqui Pedro cheržcu, julzinča. ⁴¹Pedruqui naaža kjarcu tanzicha, nekztan tsjitskatchiča. Nuž tsjitskatzcu Pedruqui parti jilanacami nižaza žew maatakanacami kjawziča. Nekztan Dorcas žejtchin tjeeziča. ⁴²Tjapa nii Jope wajtchiz žoñinacaqui nii quintu zizziča. Jalla nižtiquiztan walja Yoozquin criichiča. ⁴³Pedruqui tsjii kjaž maj nii wajtquiz kamchiča, Simón cjita žoñž kjuyquiz. Nii Simonaqui zkizinaca koñž langžñitača.

PEDRUŽTAN CORNELIUŽTAN

10 ¹Cesarea wajtquiz tsjii Cornelio cjita žoñi želatča. Niiqui zultatž jiliritača, Italian cjita regimientoquiztan. ²Jalla nii jiliriqui niž žamilanacžtanpacha arajpach Yooz rispitiñitača. Nižaza Yoozquin mayiziñitača. Nižaza pori judío žoñinacžquiz walja paaztan yanapt'ichiča. ³Tsjii noojiqui majñakak ora chjuužtažokaz tsjii Yooz anjila cheržiča, kjanapacha. Nii anjilaqui nižquin tjonžquichiča tuž cjican:

—iCornelio!

⁴Corneliuzti tsucchi anjilž kjutñi cherziča. Nekztan pewcziča:

—Wejt Jiliri, ¿čhjulutaya? —cjican.

Nekztanaqui nii anjilaqui kjaaziča, tuž cjican:

—Amqui Yooz Ejpžquin mayiziñamča. Nuž naychiča Yooz Ejpqui. Nižaza am t'akjir žoñinacžquiz yanaptanaca naychiča. Jalla nuž nayžcu, Yooz Ejpqui cuntintuča. Nižaza am cjuñža. ⁵Jaziqui Jope wajtquin žoñinaca cuchanžca, Simona kjawzjapa. Nii Simonaqui Pedro cjitazakazza. ⁶Pedruqui yekja Simonžtan alujtača. Nii yekja Simonaqui zkizi koñž langžñi žoñiča. Niiž kjuya pajk kot žcati žejlča. Nii Pedruž amquiz chyaquiča, čhjulut am paas cječhaja, jalla nii. —Jalla nuž chiichiča nii anjilaqui.

⁷Nii anjilaž ojktanaqui, Corneliuqui pucultan piyunanaca kjawziča. Nižaza atintiñi zultatunacžquiztan tsjii zuma cumpliñi zultatu kjawziča. Nii zultatuqui Yoozquin kuzzizzakaztača. ⁸Nekztanaqui Corneliuqui nii kjawžta žoñinacžquiz tjapa quint'ichiča. Jalla nekztan Jope wajtquin cuchanchiča.

⁹Niiž jaka tažuqui nii čhjepultan cuchanta žoñinaca Jope kjutñi ojkičiča. Jope watja žcatiž cjen, nii oraqui Pedruqui kjuy juntuñta patiuquin yawchiča Yoozquin mayizi. Nii oraqui taypurutača. ¹⁰Jaziqui Pedruqui ancha čheri eeskatatča, lujlž pecatča. Jalla nuž čheri kisan, Pedruqui nii tsewcta patiuquin tsjii chjuužtažokaz cherziča. ¹¹Jalla tuž cherziča: arajpacha cjetzi tsjii pajk mantilažtakaz chjiwžquichiča yokquin. Nii mantilaqui pajkpic punta žcucžintača. ¹²Jalla nii mantiliquiz tjapaman pajkpic kjojchanacchiz animalanacami, zkoranacami,

wežlanacami želatča. ¹³Nekztanaqui Pedruqui tsjii jora nonziča, tuž cjican:

—Pedru, tsjitsna. Conžna. Lujlžna.

¹⁴Pedruzti kjaaziča, tuž cjican:

—Wejt Jiliri, nižta anal paasača.

Nii punta animalanaca ana lulasača. Lii quintrača. Jaziqui nižta anal lulasača wejrcui.

¹⁵Jalla nuž kjaaztiquiztanaqui nii joraqui wilta chižquichiča, tuž cjican:

—Yoozqui amquiz chiichiča,

“Zumača niiqui, lujlžjapa” cjican. Jalla nii Yooziž chiita taku anam amqui nicasača, “Ana zumača lujlžjapa. Lii quintrača” cjicanaqui.

¹⁶Jalla tižta čhjep wilta watchiča. Nekztanaqui nii mantilaqui arajpach kjutñi waytitatača. ¹⁷Nekztanaqui Pedruž kuzquiz pinsichiča, tuž cjican: “Nii chjuužtakaz cherta čjaknužt cji? ¿Čhjulut Yoozqui wejtquiz intintiskatž pec?” Nii orapacha Simonž kjuya pewcpewcziča Corneliuž cuchanžquita žoñinacaqui. Nekztanaqui Simonž kjuy zanquin irantichiča. ¹⁸Irantižcu, nii žoñinacaqui altu joržtan pewcziča, tuž cjican:

—¿Simón anaj tekz alujya? Simonž tsjii tjuuqui Pedro cjitača.

¹⁹Pedruqui tirapanž pinsatča nii chjuužta puntuquiztan. Jalla nuž pinsan, Espíritu Santuqui niiž kuzquiz cjichiča:

—Cheržca, Pedro. Čhjepultan žoñinaca am kjurča. ²⁰Tsjitsna. Chjiwžca. Ana paysnakan ninacžtan oka. Wejrtča ninaca cuchanžquichintqui.

²¹Jalla nekztanaqui Pedruqui chjiwžquichiča, nii Corneliuž cuchanžquita žoñinacžtan zali. Ninacžquiz cjichiča:

—Ančhucqui tsjii žoñi kjurča. Wejrtča niitqui. ¿Čhjulquin ančhucqui tjonchinčhuctay?

²²Nekztan ninacaqui kjaaziča, tuž cjican:

—Cornelio cjita zultatž jiliriz cuchanžquita tjonuča wejrnacqui. Niiqui walja rispitta žoñiča. Nižaza niiqui Yooz rispitičiča. Tjapa judío žoñinacaqui niiz zuma kamañ wira quint'iñiča. Tsji Yooz anjilaqui niizquin mantichiča, tuž cjican:

“Žoñinaca cuchna, Pedro cjitaqui tekz am kjuyquiz kjawzjapa. Pedruž chiita taku nonžna amqui”. Jalla nuž Corneliužquiz cjichiča nii Yooz anjilaqui.

²³Nekztanaqui Pedruqui kjuyquiz kjawziča atintita cjisjapa. Tsji arama nekz tajžinchiča. Jaka tažuqui Pedruqui ninacžtan ojkchiča. Nižaza tsji kjaž Jope wajtchiz hermanonacaqui niiztan chica ojkchiča.

²⁴Niiz kat tažu Cesarea watja irantichiča, Corneliuž kjuyquin. Jalla nieju Corneliuqui tjewznatča niiz parintinacžtan, nižaza tsji zuma mazinacžtan. Corneliuqui ninaca kjawziča, ninacazakaz Pedruž taku nonzjapa. ²⁵Pedruž kjuyquin luztan Corneliuqui niiztan zalchiča. Nekztan Pedruž yujcquiz quillziča, nii amzjapa. ²⁶Pedruzti tsjtskatchiča, tuž cjican:

—Tsijtsna amqui. Wejrmi am irat žoñizakaztča. Anača Yooztakaztča.

²⁷Jalla pucultan parlican, luzziča. Nii kjuyquin walja ajczy žoñinaca zalchiča. ²⁸Pedruqui ninacžquiz cjichiča:

—Ančhucqui zizza. Tsji judío žoñiqui yekja wajtchiz žoñžtan anaž mazi cjisnasača, anaž ninacžtan ajcznasača. Nižaza yekja wajtchiz žoñž kjuyquin anaž tjonznasača. Jalla nuž judiož lii cjiča. Pero Yoozqui wejr intintiskatchiča. Anziqiu čjul

žoñimi Yooz partiquiz cjesača, nii. Jalla nižtiquiztan wejrqui anal chiiz waquizuča, “Nii žoñiqui ana Yooz partiquiz cjesača” cjicanaqui. ²⁹Nekztan amiž kjawžtiquiztan wejrqui ana kjaž chiižcu tjonchinča; judionacž lii quintr cjenami ana nicchinča. Pero ziz pecuča, čkjažtiquiztan wejr kjawzinchucta ančhucqui?

³⁰Jalla nekztanaqui Corneliuqui kjaaziča tuž cjican:

—Ažk pajkpic tjuñi wattan tii majñakak ora wejrqui kjuyquiz želatuča, Yoozquin mayizican, nižaza ayunazcan. Jalla nuž želan, tsji walja llijñi zquitchiz žoñiqui wejtquiz jeczquichiča. ³¹Nižaza wejtquiz cjichiča: “Cornelio, Yoozqui am mayizita nonziča. Nižaza amiž t'akjir žoñinacžquiz okztanaca cjuñziča. ³²Jaziqui Jope wajtquin žoñinaca cuchna, Simona zjijcajo. Nižaza niiz tsji tjuuqui Pedro cjitača. Yekja Simonž kjuyquiz alujazi žejlpachača, pajk kot žcati. Nii yekja Simonaqui zkizi koñž langžñi žoñiča. Nii Pedruqui tjonžcu, amtanž parlaquiča”. Jalla nuž wejtquiz chiichiča nii anjilaqui. ³³Jalla nuž nii chiita tawk jaru, apura cuchanchinča am kjuri. Walim tjonchamča. Jaziqui tekzi tjappacha wejrnacqui Yooz Ejž yujcquiz žejlča. Jaknužt Yoozqui wejrnacalta amquiz cjitčhaja, jalla nii tjappacha nonz pecasuča wejrnacqui.

PEDRUŽ PALJAYTA TAKUNACA

³⁴Jalla nekztanaqui Pedruqui paljayi kallantichiča, tuž cjican:

—Jaziqui intintazuča. Ultim weraraž, Yoozqui tii muntuquiz žejlñi žoñinaca anaž yekja yekja illillza. ³⁵Yoozquin rispitznaquiz niiqui, nižaza Yooz kuzcama kamaquiz niiqui, Yoozqui jakzilta čjul wajtchiz

žonžquizimi asiptasača. Anziqui jalla nuž intintazuča. ³⁶Yooz Ejpmqui Israel žoninacžquiz amigo pajassiča. Nekztan niž zuma kamañ puntu zizkatchičha. Jesucristuž cjen zuma cuntintu kuzziz cjisñi atasača, jalla nii. Jesucristučha čjulquiztanami chekan Jiliriqui, wali azziz. ³⁷Ančhucqui zumapanž zizza, jaknužt judfo yokquiz watčhaja, jalla nii. Primero Juanqui Yooz taku mazmazziča. Nižaza žoninaca bautissiča. Nekztanaqui Jesucristuqui niž persun Galilea yokquiz obranaca tjeezñi kallantichiča. ³⁸Jesusaqui Nazaret wajtchiz žonitača. Yooz Ejpmqui nižquiz walja Espiritu Santuž azi tjaachiča. Jalla nižtiquiztan ojklaychiča, walinaca paacan, nižaza zajraž tanta žoninaca liwriican. Jalla nuž paachiča, Yooz Ejpmžtan nižtan chicapahaž nuž cjen. ³⁹Tjapa Jesusaž ojklaytanacami paatanacami cheržcu, jalla nii maznasacha wejrnacqui, Judea yokaran ojklaytanacami, nižaza Jerusalén watjaran ojklaytanacami. Wiruñauqui Jesusaqui cruzquiz ch'awctiquiztan conta ticziča. ⁴⁰Jalla nuž contiquiztan čhjep majquiztan Yooz Ejpmqui Jesusa jacatatskatchičha. Jacatatskatžcu Yoozqui wejtnacaquiz parizizkatchičha. ⁴¹Jesusaqui parti žoninacžquiziqui ana parizichiča. Antiz wejtnacaquiz alaja parizichiča. Nižaza jecnacat Yooz Ejp illztčhaja, jalla ninacžquiz parizichiča Jesusaqui. Nižaza wejrnacmi Jesusaž jacatattiquiztan nižtan juntululassinča, nižaza kjazmi juntulicassinča. ⁴²Nekztanaqui Yooz Ejpmqui tii Jesusapacha wali Juez Jiliržquin utchiča. Juez cjen nii Jesús chawc Jiliriqui žejtni žonimi ticzi žonimi juzjizaquičha. Jalla nii mazmazñijapa wejrnac cuchanžquichiča Jesusaqui.

⁴³Nižaza tuquitanpacha Yooz taku parliñinacaqui Jesusiž puntuquiztan parlichipanča, tuž cjan: “Jakziltat nii Jesusižquiz tjapa kuztan criyačhaj niiqui ujnacquiztan pertuntaž cjequičha”.

ESPIRITU SANTUŽ LUZTA

⁴⁴Jalla nuž Pedruž chiyan, Espiritu Santuqui tjapa niž chiita taku nonžni žoninacžquiz luzziča. ⁴⁵Jalla nuž cjen nii Pedružtan tjonchi judfo žoninacaqui isphantichi quirchiča, Espiritu Santuqui tjaatazakaztača ana judfo žoninacžquiziqui. ⁴⁶Espiritu Santo tanžcu, nii žoninacaqui yekja ana pajta taku chiichiyatča. Nižaza Yoozquin waljaž alawatča. Jalla nižtiquiztan isphantichi cjissiča nii žejlñi judionacaqui. ⁴⁷Nekztanaqui Pedruqui cjichiča:

—Wejtnacaquiz Espiritu Santo tjaatača. Nižaza tinacžquiz Espiritu Santo tjaatazakazza. Jaziqui tinaca bautista cjisjapa, čjec žonit atajas?

⁴⁸Jalla nekztanaqui Pedruqui mantichiča, Jesucristuž tjuuquiz tinaca bautista cjeajo. Nekztanaqui nii žoninacaqui Pedružquiz rocchiča tsjii kjaž maj ninacžquiz kamt'ajo.

PEDRUŽ JUDIO ŽONINACŽQUIZ MAZTA

11 ¹Nii Judea yokaran žejlñi illzta apostolonacami, jilanacami, jalla ninacaqui quintu nonchiča, yekja wajtchiz žoninacaqui Yooz taku catokchiča, jalla nii. ²Pedruqui Jerusalén watja quejpžquichiča. Jalla nuž quejptan parti judfo criichinacaqui Pedruž quintra chuchchiča, ³tuž cjan:

—ČKjažtiquiztan učhum lii quintra amqui yekja wajtchiz žoninacžquin tjonžni ojkehamtajo? ČKjažtiquiztan

uĉhum lii quintrá ninac̣žtan
lujlchamtajo?

⁴ Nekztanaqui Pedruqui nii parti
judionac̣žquiz quint'ichiĉha, jaknužt
watĉhaja primerquiztanpacha
Corneliuž puntu, jalla nii. Tuž cjican,
quint'ichiĉha:

⁵ —Wejrqui Jope wajtquin
želatuĉha. Yoozquin mayizican, tsjii
chjuužtažoka cherchinĉha, jalla
tižta. Tsjii pajk mantilažtakaz
tsewctan chjiwžquichiĉha. Niiž
pajkpic puntuiztan žcuc̣žintataĉha.
Jakziquiztažlaj wejrqui, jalla nekz
wejr tirichuc irantižquichiĉha. ⁶ Jalla
nuž irantižquitanaqui zumpacha
cherzinĉha, ĉhjulut nii kjuyltan žejl,
cjican. Jalla nuž wejrqui cherchinĉha
tjapaman pajkpic kojchchiz
animalanaca, k'it animalanacami,
zoranacami, wežlanacami, jalla
nuž cherchinĉha. ⁷ Nii orazakaz
tsewctan tsjii žoñž joražtakaz
nonzinĉha. Wejtquin chiižquichiĉha
tuž cjican: “Pedro, tsijtsna. Conžna.
Nižaza lujlna”. ⁸ Wejrzi kjaazinĉha,
tuž cjican: “Wejt Jiliri, nižta anal
paasaĉha. Nii punta animala ana luli
atašaĉha, am lii quintráha. Jaziqui
nižta anal paasaĉha wejrqui”. ⁹ Jalla
nuž kjaaztquiztanaqui nii joraqui
wiltazakaz chiižquichiĉha, tuž cjican:
“Yoozqui chiichiĉha, ‘Zumaž tiiqui
lujljapa’ cjican. Nii Yooz zuma
cjitaqui ana amqui ‘Ana lulasaž’
cjeella. Yooziž chiita taku anam
nicz waquiziĉha, ‘Ana lulasaž. Lii
quintráha’ cjicanaqui”. ¹⁰ Jalla nuž
ĉhjep wilta watchiĉha, nekztanaqui
nii mantilaqui waytitataĉha
tsewchucpacha. ¹¹ Nekztanaqui
ĉhjepultan žoñinacaqui weriž alujta
kjuyquiz irantižquichiĉha. Cesarea
wajtquiztan cuchantataĉha wejr
kjuri. ¹² Nižaza Espiritu Santuqui wejr

mantichiĉha ninac̣žtan ana paysnakan
okajo. Nižaza sojtaltan jilanacaqui
wejtтан chica ojĉkchiĉha. Jalla nicju
irantižcu, tjappacha wejrnacqui tsjii
žoñž kjuyquiz luzazzinĉha. ¹³ Nižaza
nii kjuychiz žoñiqui wejtnacaquiz
quint'ichiĉha, jaknužt niiž kjuyquiz
tsjii anjila chertĉhaja, jalla nii. Nii
anjila tsijtsi cherchiquiĉha. Nižaza nii
anjilaqui niižquiz tuž cjichiquiĉha:
“Jope wajtquin žoñinaca cuchanžca,
Simona kjawznajo. Niiž tsjii tjuuqui
Pedro cjitaĉha. ¹⁴ Jalla niiqui amquiz
chiyaquiĉha, jaknužt ammi nižaza
tjapa am familianacami liwriita
cjeĉhaja, jalla nuž”. ¹⁵ Nekztanaqui
wejrqui ninac̣žquiz parli kallantitan,
Espiritu Santuqui ninac̣žquiz luzziĉha,
jaknužt tuquiqui uĉhumnacaquiz
lutzĉhaja, jalla nuž. ¹⁶ Jalla
nekztanaqui wejrqui Jesusaž niiž tuqui
chiita taku cjuñzinĉha. Jesucristo
Jiliriqui cjichiĉha, “Juanqui kjaztan
bautisñipantaĉha. Anĉhucqui antis
Espiritu Santužtan bautistaž cjequiĉha”.
¹⁷ Jesucristo Jiliržquiz criichiž cjen
Yoozqui uĉhumnacaquiz Espiritu Santo
tjaachiĉha. Nižta iratapacha Yoozqui
ninac̣žquiz Espiritu Santo tjaachiĉha.
Jaziqui wejrqui anal Yooz quintrá
cjesaĉha. —Nuž quint'ichiĉha Pedruqui.
¹⁸ Jalla nii quintu nonztiquiztan nii
Jerusalén wajtchiz criichinacaqui ana
iya chutchiĉha. Nužquiz ch'ujquichiĉha.
Yoozquin alawazziĉha, tuž cjican:
—Nižazakaz yekja wajtchiz
žoñinacaqui persun ujnaca pajžcu,
nižaza persun kuznaca campiižcu, jalla
nekztan ninacaqui persun ujnacquiztan
pertuntazakaz cjequiĉha. Nižaza
wiñaya Yooztan kamaquiĉha.

CRIICHI ŽOÑINACA WICHANZI

¹⁹ Esteban conžcuqui, yekja Yoozquin
criichinaca zakaz walja tanzquin

cjissičha. Jalla nuž cjen criichinacaqui yekja watjanacquin atipassičha. Fenicia, Chipre, Antioquía, jalla nii yokanac kjutñi wichanžičha. Jalla nicju liwriñi Yooz takunaca parlichičha. Judío žoñinacžquiz alaja parlichičha, ana yekja žoñinacžquiziqui.

²⁰Yekjapa criichi jilanacaqui Chipre yokquiztan nižaza Cirene yokquiztan ojkchičha. Nekztanaqui nii yokanacquiztan Antioquía watja irantichičha. Nekztan Antioquía wajtquin yekjapa criichinacaqui ana judío žoñinacžquiz parlichizakazza Liwriñi Jesucristo Jilirž puntu takunacquiztan. ²¹Jesucristo Jilirž aziqui ninacžquiztačha. Nižaza nii parlitiquiztanaqui walja žoñinacaqui tuquita cuzturumpinaca jaytižcu, Jesucristo Jiliržquin tjapa kuztan criichičha.

²²Nekztanaqui Jerusalén iclizziz criichinacaqui nii quintu nonchičha. Jalla nii quintu nonžcu, Bernabé cjita žoñi cuchanchičha Antioquía watja.

²³Jalla nicju irantižcu, Bernabequi cherchičha, jaknužt Yoozqui neks žejlñi criichinacžquiz okztčhaja, jalla nii. Nii criichinacaqui walja cuntintutačha. Jaziqui Bernabequi tjappachquiz chiižinchičha, tuž cjican:

—Yoozquin criichinaca, zuma tjapa kuztan Yooz jiczquiz kamaquičha.

²⁴Nižaza Bernabequi wali zuma žoñitačha. Niiqui Espíritu Santužtan tsjii kuzziztačha. Nižaza Yoozquin tjapa kuzziztačha. Jalla nuž zuma kamcan walja žoñinaca Yoozquin macjatskatžquichičha Bernabequi.

²⁵Jalla nekztanaqui Bernabequi Tarso watja ojkchičha Saulo kjuri. Saulo wajtžcu Antioquía chjitchičha.

²⁶Jalla nicju tsjii wata intiru criichinacžtan žejlchičha. Tama žoñinacžquiz Yooz taku tjaajinchičha.

Antioquía wajtquiziqui criichinacaqui cristiano tjuuchiz cjissičha. Tuquiqui nižta tjuuchiz ana želatčha.

²⁷Jalla nii timpuqui tsjii kjažultan Yooz taku parliñi žoñinacaqui Jerusalén wajtquiztan Antioquía ojkchičha. ²⁸Tsjiiqui Agabo cjitatačha. Niiqui nii ajczñi criichinacž taypizquiz tsijtsičha. Tsijtsican Yooz Espíritu Santuqui nii Agabo chiikatchičha, tuž cjican:

—Tjapa tii yokquiz wali čhjer mach'a želaquičha.

Jalla tižta watchičha, Claudio cjita chawc jiliriz mantiz timpuqui. ²⁹Jalla nižtiquiztan nii Antioquía wajtchiz criichinacaqui acuerdo luzzičha Judea wajtchiz jilanacžquin tsjii yanapñi cuchanzjapa. Zapa mayniqui jaknužt onanchucažlaja jalla nuž onanchičha, nii Judea wajtchiz criichi jilanacžquin yanapzjapa. ³⁰Nižaza nii onantanaca apaychičha Judea wajtchiz icliz jilirinacžquin. Bernabežtan Saulužtan nii apayanacaqui chjitchičha.

JACOBO CJITA APOSTOL CONTAČHA

12 ¹Jalla nii timpu Herodes cjita chawc jiliriqui yekjap Yoozquin criichi žoñinaca tanchičha. ²Nižaza Herodesqui Jacobo conkatchičha pajk cuchillžtan. Jacobqui Juanž jilatačha. ³Jalla nuž contiquiztanaqui judío žoñinacaqui muzpa chipchipchičha. Jalla nuž nayžcu Herodesqui Pedro preso tanchizakazza. Jalla nii oraqui ana liwaturchiz t'anta lujlz pijjstatačha. ⁴Pedro preso tantiquiztan, carsilquiz chawctatačha. Carsilquiz pajkplic t'ak zultatunaca wijilñi uchtatačha. Zapa t'akaqui pajkplic zultatuchiztačha. Pascua pijjsta pastanalla Herodesqui Pedro jwes pinsichičha, nii Jerusalén wajtchiz žoñinacžquiz tjeezjapa. ⁵Nuž

Pedruqui tirakaz carsilquiz chawcta želatčha, zultatuž cwitita. Nii parti Yoozquin criichi jilanaca cullaquinaca niiztajapa walja tjapa kuztan Yoozquin mayizatčha.

PEDRO CARSILQUIZTAN LIWRIITA

⁶Jaka tažuqui Herodesqui Pedro jwes pecatčha žoñinacžquiz tjeezjapa. Ima jwesani ween Pedruqui tjajatčha, carinžtan čhejlta pucultani zultatž taypiquiz. Yekja zultatunacaqui carsil zanquiz wijilatčha. ⁷Jalla nii weenpacha tiripintit Yooz anjilaqui tjonchičha. Nižaza nii carsil kjuyltan muzpa waljaž kjanchičha. Nekztanaqui nii anjilaqui Pedruž latuquiztan lanzičha. Nuž lanžcu tjaji wajtskatchičha. Nekztanaqui Pedružquiz paljaychičha:

—Uri žaažna, —cjican.

Jalla nii orapacha Pedruž kjara čhejlta carinaqui jutztoka tjojtsičha.

⁸Nižaza nii anjilaqui cjichičha:

—Cinturuna zumpacha yajkzna.

Nižaza am čhjata čhjatzna.

Jalla nuž Pedruž paan, nii anjilaqui cjichičha:

—Am irs irsna. Wejt wirquiz apžca.

⁹Nekztanaqui Pedruqui anjilž wirquizpacha ulanchičha carsilquiztan. Nii ora Pedruqui werara ana werara, ana zuma zizi atchičha. “Chjuuznoka wejrqui” cjican pinsatčha. ¹⁰Jalla nekztanaqui primera wijilni zultatu watchičha. Nekztanaqui nii jaru wijilni zultatu watchizakazza. Nekztanaqui carsil zanquin irantichičha. Nekztan carsil jir chawjczqui jutztoka cjetsičha. Jalla nekztanaqui callquinpacha ulanchičha, nižaza ojkchičha. Jalla nuž cjen yekja callquin zina ectačha. Anjilaqui nužquiz juzztokaz katchičha.

¹¹Pedruqui nekztan zumpacha naazičha, carsilquiztan liwriita, nii. Nekztanaqui cjichičha:

—Ultim werara liwriitaž wejrqui. Anal chjuuznukalala. Wejt Yooz Ejp Jiliriqui niiž anjila cuchanžquichičha wejr liwriizjapa Herodes kjarquiztan, nižaza nii anawali paaz pecni judio žoñinacž kjarquiztan.

¹²Jalla nuž pinsican, Pedruqui María kjuya ojkchičha. Naa Mariiqui Juanž maatačha. Juanž tsjii tjuuqui Marcos cjitazakaztačha. Jalla naaž kjuyquin walja Yoozquin criichi žoñinacaqui ajczitačha, nii ora Yoozquin mayizatčha. ¹³Pedruž kjuy patio zana t'okt'okan, tsjaa tur cullaqui Rode cjeti ulanžquichinčha, ject tjonchi, cjican. ¹⁴Pedruž jora čhajzcu, ancha cuntintu zajtchinčha partinacžquin mazni, Pedručha tjonchi, cjican. Tjatzintačha, nii patio zana cjetzinz. ¹⁵Nii quintu nonžcu, criichi žoñinacaqui cjichičha: —iAmqui lucuratamčha!

Jalla nuž chiyani, naaqui werarapančha cjichinčha. Nii partinacazti cjichičha:

—Anaž nii cjesačha. Niiž animužlani anjilažlaj.

¹⁶Pedruzti tira zanquiz t'okžinchičha. Nekztan chawjcz cjetžinchičha. Pedro cheržcu, walja tsucchi cjissičha. ¹⁷Pero Pedruqui kjaržtan siñala utchičha nii ajczi žoñinaca ch'uj cjeajajo. Jalla nekztanaqui Pedruqui quint'ichičha, jaknužt Yoozqui nii carsilquiztan liwriitčhaja, jalla nii. Nižaza cjichičha: —Anchucqui nužuzakaz quint'aquičha Jacob jilžquin nižaza parti criichinacžquin. Wejr okaž, —cjichičha.

Jalla nekztanaqui Pedruqui ulanchičha, yekja kjutni ojkzjapa.

¹⁸Tjuñiž tewjctanalla, Pedro ana žejlni cheržcuqui, nii wijilni zultatunacaqui ancha tsucchičha, nižaza kuz turwayskatchičha. Pedruqui jaknužt ulantčhaja, jalla nii ana wira

jaknuž zizi atchiča. ¹⁹Nekztanaqui Herodesqui Pedro kjuri cuchanchiča. Ana wachi atchiča. Jalla nekztanaqui Herodesqui nii wijilni zultatunacžquiz zumpacha pewcpewcziča. Jalla nuž pewc pewcžcu, nii zultatunaca conajo mantichiča. Jalla niž wiruñ Herodesqui Judea yokquiztan ojkchiča, Cesarea wajtquin želi.

HERODES TICZIČHA

²⁰Herodesqui žawjchiča Tiro Sidón wajtchiz žoñinacž quintra. Jalla nižtiquiztanaqui ninacaqui acuerdo palt'ichiča Herodes yujcquiz prisintisjapa. Nii Tiro Sidón watjanacchiz žoñinacaqui Herodes tjaata čheržtan kamñitakalča. Nižaza tsjii Blasto cjita žoñi želatča. Niiqui Herodes secretariotača. Jalla nii žoñinacaqui Blasto cjita secretario roct'ichiča ninacžta favora tjurt'ižinajo, Herodes ana quintra cjeyajo. ²¹Herodesqui tsjii tjuñi citchiča ninaca nekzi prisinti cjeyajo. Jalla nii cita tjuñquiziqui Herodesqui niž wali jilir zquiti cujtsiča audiencia watzjapa. Jalla nuž zquiti cujtžcu, niž mantiñi sillquin julziča. Nekztanaqui tsjii kjaž takunaca chiichiča. ²²Jalla nuž chiitiquiztanaqui nii nonžni žoñinacaqui kjawi kallantichiča, tuž cjican:

—Tii chiiñi žoñiqui anača ina žoñi. iAntis yoozpanča!

²³Jalla nuž kjawtiquiztan Herodesqui cuntintutača, nii žoñinacž kjawta taku ana nicz pecatča, “Anača wejrqui Yooztqui” cjicanaqui. Ana werar Yooz Ejpžquin honora tjaachiča. Jalla nižtiquiztan nii orapacha Yooz Ejp Jiliriqui niž anjila cuchanžquichiča, Herodes chawc laa cjisnajo. Jalla nekztanaqui nuž laacjžcu Herodesqui lak'už liwj mirta ticziča.

²⁴Pero nii liwriñi Yooz takuqui tjapa kjutni parlita cjissiča. Nekztanaqui tsjan tsjan žoñinacaqui tjapa kuztan nii parlita Yooz taku criichiča.

²⁵Bernabežtan Saulužtan nii pucultanaqui apayta onantanaca intirjžcu, Jerusalén wajtquiztan Antioquía quejpchiča. Nižaza Juan chjichcu ojkchiča. Juanqui niž tsjii tjuuqui Marcos cjitazakaztača.

BERNABEŽTAN SAULUŽTAN CUCHANTA

13 ¹Antioquía wajtchiz Yoozquin criichi žoñinacžquiztan Yooz puntu tjaajiñinaca, nižaza Yooz taku chiiñi profetanaca želatča. Jalla tinacatača: Bernabé, Saulo, Simón (Negro cjitazakaztača), Lucio (Cirene wajtchiz žoñitača), nižaza Manaén (niiqui junto pajkchiča Herodestan. Herodesqui Galilea kjuttan mantiñitača). ²Tsjii nooj Yoozquin alawazjapa ajczitača, nižaza nii ora ayunasatkalča. Jalla nuž cjen Espiritu Santuqui ninacžquiz cjichiča:

—Ančhuqu Bernabé nižaza Saulo yekja t'akžina, weriž munta trabajo paañijapa.

³Jalla nekztanaqui Yoozquin mayiziccu, nižaza ayunascu, nii Yoozquin criichinacaqui Bernabežtan Saulužtan ninacž juntuñ kjaržtan lanziča. Nekztanaqui nii pucultanaqui cuchanchiča, Yooz trabajo trabajžcajo.

BERNABEŽTAN SAULUŽTAN CHIPRE YOKQUIN OJKTA

⁴Nekztanaqui Espiritu Santuž cuchanžquitan Bernabežtan Saulužtan ojkchiča Seleucia cjita watja. Jalla nicju warcu zalchiča Chipre cjita yoka ojkzjapa. ⁵Jalla nicju irantižcu Salamina cjita watja luzziča. Jalla

nicju judionacž ajcz kjuyanacquiz
 Yooz taku parli kallantichiča. Juan
 Marcos ojkhizakazza ninaca yanapi.
 6Tjapa nii Chipre cjita yokaran
 ojklaychiča. Nižtami Pafos cjita
 watja irantichiča. Jalla nicju tsjii
 judío žoňžtan zalchiča. Nii žoňiqui
 Barjesús cjitatača. Nii žoňiqui
 laykatalálča. Nižaza toscara
 chiiñitakálča, “Wejrqui Yooz taku
 chiichiyuča” cjiñitakálča. 7Jalla
 nii layka žoňiqui chawc jiliri Sergio
 Paulo cjita nižtan chicatakálča. Jalla
 nii jiliriqui cusa zizñi žoňitača. Nii
 žoňiqui Yooz taku nonz pecatča.
 Jalla nižtiquiztan Bernabežtan
 Saulužtan kjawskati cuchanchiča.
 8Nii layka žoňiqui ninacž quintra
 chiichiča, nii jiliriqui ana Yooz taku
 nonznajo, nižaza Yoozquin ana kuzziz
 cjejajo. Nii layka žoňž tsjii tjuuqui
 Elimas cjitazakaztača. 9Nižaza Sauluž
 tsjii tjuuqui Pablo cjitazakaztača.
 Nii Pabluqui Espíritu Santuž
 irpitapantača. Nii layka žoňž Yooz
 tawk quintra chiitiquiztan, Pabluqui
 nii žoňž kjutñi zumpacha cherziča,
 10tuž cjan:

—Amqui anawalimča.
 Incallñamča. Amqui zajriž
 maatimča. Nižaza Yooz kuz
 quintramča. Amqui Yooz Ejpž taku
 tsjii kjutñi tintiskatz pecñampanča.
 ¿Kjažtiquiztan nižta amjo? 11Jaziqui
 Yooz Ejp Jiliriqui am casticaquiča.
 Zuram cjequiča. Tsjii kjaž maj tii tjuñ
 sii anam cheraquiča.

Jalla nii orapacha zura cjissiča,
 zumchiquizpan. Ana zinta cheri atžcu,
 nii layka žoňiqui tsjii žoňi kjurchiča
 nižž kjaru tanžcu chjichñijapa. 12Jalla
 nižta cheržcu, nii chawc jiliriqui
 Yoozquin criichiča. Yooz taku puntu
 tjaajintiquiztan walja ispantichi
 quirchiča nii jiliriqui.

ANTIOQUIA OJKTA

13Jalla nekztanaqui Pabluqui niiž
 mazinacžtan warcu zalchiča Pafos
 wajtquiztan ojczjapa. Nekztan Perge
 cjita watja irantichiča. Perge watjaqui
 Panfilia yokquintača. Nekztan
 Juanqui ninaca ecchiča, Jerusalén
 watja quejpžquichiča. 14Nekztanaqui
 ninacaqui Pergequiztan watchiča
 Antioquía watja. Antioquía watjaqui
 Pisidia yokquintača. Jalla nicju tsjii
 jeejz tjuñquiz luzziča tsjii judionacž
 ajcz kjuyquiz. Nekztanaqui luzcu,
 julziča. 15Jalla nuž želan cijjrta Yooz
 tawk liwruqui liitatača, Moisés cijjrta
 Yooz takumi, nižaza Yooz cuntiquiztan
 chiiñi profetanacž cijjrta takumi, jalla
 nii liitatača. Jalla nuž liižcu ajcz kjuy
 jilirinacaqui Bernabežquiz Pablužquiz
 chiyajo nuž cjichiča, tuž cjan:

—Jilanaca, ančhucalta tsjii zuma
 taku želanaqui, anzpachaz chiya.

16Nekztanaqui Pabluqui tsjitsiča.
 Nižaza kjara waytižcu ch'uj
 cjiskatchiča. Jalla nuž ch'uju želan,
 paljaychiča tuž cjan:

—Israel wajtchiz žoňinaca, nonžna.
 Nižaza werar Yooz rispiti žoňinaca,
 nonžna. 17Israel wajtchiz žoňinacž
 Yoozza werar Yoozqui. Jalla nii
 Yoozqui učum tuquita atchi ejpnaca
 illziča niižquin sirwajo. Nii timpuquin
 Egipto yokquin tirapan kamchiča
 yekja wajtchiz žoňinacžtakaz.
 Jalla nižta želanami Yoozqui walja
 mirkatchiča. Wiruñauqui Yooz Ejpqui
 niiž azi tjeezcan jwezquichiča nii
 yokquiztan. 18Pusi tunc watanaca
 ch'ekti yokaran ojklayan, Yoozqui
 ninacž anawali kamzquiztan
 awantichiča. 19Nii timpupacha
 pakallak nacionanacaqui Canaán
 yokquin žejlñitača. Jalla tjappacha
 nii yokquiz žejlñinaca tjatanchiča

Yoozqui, nižaza ninacž yoka tjaachiča učum tuquita atchi ejpnacžquiz, tsjii irinsažtakaz. ²⁰Nekztanaqui pusi patac pjijska tuncan watanaca juezanaca utchiča učum ejpnacžquiz mantiñjapa, Samuelž timpu irantisquizcama. Samuelqui Yooz cuntiquiztan chiiñi profetatača. ²¹Jalla nii Samuelž timpuquiz učum ejpnacaqui tsjii pajk jiliri maychiča ninaca irpiñjapa. Jalla nuž maytiquiztan Yoozqui Saúl illziča ninaca mantiñjapa. Nii Saúlqui Cis majchtača, nižaza Benjamín t'akquiztantača. Nii Saúlqui pusi tunc watajapa mantiñitača. ²²Nekztanaqui Yoozqui niž puestuquiztan Saúl jwessiča. Jalla nekztanaqui nii rey puestuquin David utchiča. Davidž puntuquiztan Yoozpachača tuž cjichiqui: “Wejrqui tii David cjita žoñi nayuča Isafž majchča. Tii žoñiž cjen ancha cuntintutča. Wejt kuzcamapanikaz kamñipanča tiiqui”. Jalla nuž cjichiča Yoozqui. ²³Tsjii Davidžquiztan majchmaati ojkniqui Jesusa cjitača. Tuquiqui Yoozqui taku ecchiča Israel wajtchiz žoñinaca liwriizjapa. Jalla nii taku cumplisjapa, Yoozqui tii Jesusa cuchanžquichiča Israel žoñinacžquiz. ²⁴Ima Jesusaž Yooz langz kalltan, Juanqui tjapa Israel žoñinacžquiz parliñitača, tuž cjican: “Ančhucqui persun ujnaca pajžcu, kuznacaž campiya, nekztan bautistaž cjesača”. ²⁵Juanž ticz tjuñi žcatžinzcan, Juanqui cjichiča: “Ančhucqui jaknužt wejt puntuquiztan pinsiçhaja, niiqui anača niit wejrqui. Wejt wirquin tjonča tsjiiqui, wejtquiztan juc'ant jiliriča. Nii atintizjapa, anal waquizuča, nižaza wejrqui inakaztča.”

²⁶Jilanaca, Abrahamž majchmaatinaca, nižaza Yooz

rispitsñinaca, ančhucqui nonžna. Ančhucaltajapaž tii liwriiñi Yooz taku žejlča. ²⁷Jalla nii Jerusalén wajtquiz kamñi žoñinacami, nižaza niž jilirinacami, jecçhalaja Jesusaqui, nii ana zizatča. Zapa jeejz tjuñquiz judionacž ajcz kjuyquin tuquita profetanacž cjijrta taku liiñipanča. Jalla nuž liyanami nii taku anaž intintazñipantača. Nii žoñinacapachača tuquita Yooz taku cumpliskatchiqui, Jesusa conta cjiskatchiča, nuž. ²⁸Nii Jesusižquiz ana čjul ujmi watchiča, nii conzjapaqui. Jalla nuž cjenami ninacaqui Pilato chawc jiliržquiztan maychiča, nii Jesusa conzjapa. ²⁹Nekztanaqui Jesusiž puntuquiztan jaknužt tuquitanpacha Yooz tawk liwruquiz cjijrtatažlaja, jalla tjapa nii cjijrta takunaca cumplisçiča. Nii taku cumplistiquiztan Jesusiž curpu cruzquiztan apakchiča. Nekztanaqui niž curpu tjattatača. ³⁰Yooz Ejpzti Jesusa ticziquiztan jacatatskatchiča. ³¹Nekztanaqui tsjii kjaž majquiztan Jesusaqui niž mazinacžquiz tjontjonziča. Niž mazinacaqui nižtan chica ojkičiča Galilea yokquiztan Jerusalén watja. Nižaza ninacaqui anziqiu žoñinacžquiz niž puntuquiztan tiraž parliča.

³²Jaziqui Yoozqui učum tuquita atchi ejpnacžquiz taku ecchiča. Wejrnacqui nii cumplista takunaca zjiçcinča ančhucaquiz mazjapa. Jalla nii zuma mazta ančhucaquiz parluča. Yoozqui učum ejpnacžquiz taku ecchiča. ³³Učumqui nii tuquita atchi ejpnacžquiztan tjonchinča. Učumnacalta Yoozqui niž ecta taku cumplisçiča, Jesusa jacatatskatchiqui, nii. Nižaza nižtapacha segundo salmuquiz cjijrtatača tuž cjican: “Amqui wejt maatimča. Tonj tjuñi

žejtkatchinča”. ³⁴ Nižaza Yooz Ejpqui niž jachatatz puntuquiztan chiichiča, tuž cjican: “Ticziquiztan am curpu jachatatskatača, ana wira sipulturquiz mojkzjapa”. Jalla nii puntuquiztan chiichiča cjiŕta Yooz takuqui, tuž cjican: “Yoozqui Davidžquiz taku ecchiča, jalla nii tawk jaru ančucaquiz zuma fava paasača Yoozqui”. ³⁵ Jalla nužpan chiichiča tsjii salmuquiziqui, tuž cjican: “Am zuma sirwiñiž curpu ana ecta cjesača mokajo”. ³⁶ Jalla nuž werarača. Davidqui niž timpu žejlñi žoñinacžquiz yanapchiča, jaknužt Yooz mantičhaja, jalla niicama. Nekztanaqui Davidqui ticziča niž ejpnaca irata. Nekztan niž ticzi curpu tjattiquiztan mojkchiča. ³⁷ Jesucristuzti Yooziž jachatatskatchiča. Niiž curpužti ana mojkchiča. ³⁸ Jilanaca, ančhucqui tuž ziz waquiziča. Jesusiž cjen ujnaca pertuntaž cjesača. Jalla nii zuma taku ančucaquiz parluča. ³⁹ Moisés mantita lii jaru kamcanami, ana pertunta cjisni atča. Jesusižquiz macjatchi cjenauqui jalla nižtakaz tjapa ujnacami pertuntaž cjesača. ⁴⁰ Jaziqui ančhucqui cwiŕt'aza, ana nii tuquita cjiŕta casticu sufrijsapa. Tuquitan Yooz taku parliñi profetanacuqui cjiŕrchiča, tuž cjican:

⁴¹ “Nonžna, Yooztan quintrazñinaca, azzucaž ančhucqui, nižaza chjatkatchucaž ančhucqui. Wejrqui Yooz Ejptča. Ančuca kamz timpuquiz wali pajk obranaca paachinča. Jalla nuž ančucaquiz quint'ichi cjenami ančhucqui ana criyasača. Jalla nižtiquiztan ispanichi cjisna, nižaza casticta cjequiča, ančhucqui Yooz quintratjasñinaca”.

⁴² Nuž chiižcu Pabluqui niž mazinacžtan judionacž ajcz kjuyquiztan ulanchiča. Yekjap ana

judionacž ejpchiz žoñinaca želatča. Jalla ninacuqui roct'azziča, tuž cjican:

—Tii jar jeejz tjuñquiz tii puntunacuiztan wejtnacuquiz wilta tjaaznalla.

⁴³ Nii ajcz kjuyquiz nii cultu žeržcu walja judío žoñinaca, nižaza judiož cuzturumpi paañinaca, jalla ninacuqui Pablužtan Bernabežtan chica apziča. Nii pucultanaqui zuma taku tjaachiča, tuž cjican:

—Ančhucqui Yoozquin tjapa kuztanž cjee. Nižaza tjurt'iñi kuzziz cjee.

⁴⁴ Jalla nii wiruñta jeejz tjuñquiziqui joz tjapa nii wajtchiz žoñinacuqui ajcziča Yooz taku nonzjapa.

⁴⁵ Jalla nuž ajczi cheržcu, nii judío žoñinacuqui iñizichiča. Nekztanaqui Pabluž quintrachiichiča, niiž taku ana walkatzjapa. Nižaza Pablo iñarchiča. ⁴⁶ Nekztanaqui Pablužtan Bernabežtan ana ekskucchiichiča, tuž cjican:

—Ančhucqui judío žoñinacžhucča. Nižtiquiztan ančucaquiz primeraqui tii liwriiñi Yooz taku chiistanča. Ančhuczi tii Yooz taku anaž nonz pecča. Nižaza Yooziž tjaata wiñaya žeti anaž risiwz pecča, jalla nuž tantiichinčhucča ančhucqui. Jalla nižtiquiztan anziqiu ana judío ejpchiz žoñinacžquiz tii Yooz taku paljayača. ⁴⁷ Jalla nuž mantichiča Yooz Ejp Jiliriqui, tuž cjican:

“Wejrqui ančucaquiz utchinča, tjapa nacionanacquin žoñinacžquiz wejt puntu kjanzt'ajo. Ančucaž cjen tjapa kjuttan tii muntuquiz yok tjiiquin kamñi žoñinacami liwriitaž cjequiča”.

⁴⁸ Jalla nuž nonžcu, nii ana judío ejpchiz žoñinacuqui ancha chipchiča. Nižaza Yooz tawk puntuquiztan, tuž cjichiča: “Tii

Yooz takuqui zumapanča”. Jakziltat arajpachquin wiñaya kamzjapa Yoozqui illzaja, tjapa ninacaqui nii parlita Yooz taku criichiča. ⁴⁹Tjapa yokaran Jesucristo Jilirž puntuqui parlitatača. ⁵⁰Judío žoñinacazti quintra aptazziča. Nekztan ninacaqui tsjii kjaž rispitta judío cuzturumpi paañi maatakanacžtan, nižaza tsjii kjaž wali zuma rispitta wajt jilirinacžtan palt'ichiča. Nii judío žoñinacaz cjen ninacaqui Pabluž nižaza Bernabež quintra aptazzizakazza, nii yokquiztan chjatkatzcama. ⁵¹Jalla nižtiquiztan Pablužtan Bernabežtan ninacž kjojchquiztan zcachi pulpu tsajtsiča. Jalla nii tsajtstaqui tsjii siñalažtakaztača nii wajtchiz žoñinacž quintrajapa. Nii yokquiztan ulanžcu, Iconio cjita watja ojkečiča. ⁵²Pero nii Yooz taku catokñi žoñinacaqui ancha cuntintutača. Nižaza Espiritu Santuž irpitapanž cjissiča.

ICONIO WATJA OJKTA

14 ¹Iconio cjita wajtquin kamcan Pablužtan Bernabežtan luzziča nii judionacž ajcz kjuyquin. Nekztan Jesucristuž puntuquiztan parlitiquiztan, walja judío žoñinacžtan, nižaza ana judío žoñinacžtan, walja ninacaqui Yoozquin criichiča. ²Pero nii ana criichi judío žoñinacazti ana criiz pecchipantača. Nekztan ninacaqui parti žoñinaca Yoozquin criichinacž quintra aptazziča, nižaza criichinacž quintra pinsiskatchiča, “Nii Yoozquin criichi žoñinacaqui anawalipanča” cjicanaqui. ³Jalla nižtiquiztan Pablužtan Bernabežtan ažk tjuñi kamčiča nii wajtquin. Nižaza zuma tjurt'iñi kuzziz paljayčiča. Nižaza Jesucristo Jiliržquin tjapa kuzziztača. Jalla nižtiquiztan Jesucristuqui azi tjaachiča, siñalanacami

milajrunacami paajo. Jalla nuž paatiquiztan kjanapacha tježtatača, Yooz okzñi takuqui werarača, jalla nii. ⁴Nii wajtchiz žoñinacaqui pizc partiquin t'akziča. Parti žoñinacazti judío žoñinacžquin apuyčiča. Parti žoñinacazti apostolonacžquin apuyčiča. ⁵Jalla nekztanaqui judío žoñinacaqui parti žoñinacžtan, nižaza nii wajt jilirinacžtan, tsjii parla asiptichiča Pablo Bernabé ch'aanizjapa, nižaza ninaca maztan čhajczjapa. ⁶Pablužtan Bernabežtan jalla nii quintu zizcu, atipassiča. Listra wajt kjutñi ojkečiča. Nižaza Derbe wajt kjutñi ojkechizakazza. Nii pizc watjanacaqui Licaonia cjita yokquintača. ⁷Tjapa nii Licaonia yokaran zuma liwriiñi Yooz taku parličiča.

PABLO MAZTAN ČHAJCTA

⁸Nii Listra wajtquin tsjii zuch žoñi želatča. Majttiquiztanpacha nižtapantača, wira ana ojklajñitača. Jalla nicju julzi želatča. ⁹Nii zuch žoñiqui Pabluž čhiita taku nonziča. Nii žoñiqui “Pabluqui wejr čhjetnasaž jaz” cjican pinsičiča. Nižaza Pabluqui niž kuzquiz nayčiča, Yoozquin tjapa kuzziz cjeta, jalla nii. ¹⁰Jalla nižtiquiztan Pabluqui nižquiz zuma chekžcu, altu joržtan čhižzinčiča, tuž cjican:

—Sok'opacha tsjitsna, am persun kjojchtan.

Jalla nižta čhiitiquiztanaqui nii zuch žoñiqui tsjii layzcu tsjitsiča, nekztan ojklayi kallantichiča. ¹¹Jalla nii Pabluž paata cheržcu, žoñinacaqui walja kjawi kallantichiča. Licaonia tawquiztan kjawčiča tuž cjican:

—Yooznacaqui žoñižtakaz tsewctan chjiwžquichiča učumnacaquiz.

¹²Nii žoñinacaqui cjetča, Bernabequi Júpiter cjita yoozza.

Pabluqui parliñipantača, jalla nuž cjen nii žoñinacaqui cjichiča, Pabluqui Mercurio cjita yoozza. ¹³Wajt tjliquin Júpiter yooz timpluquiz želatča. Nii timplu fabriqueruqui wac turunaca nižaza pjajkjallanaca zjijecchiča, wajt zanquiz, jalla nekz. Nii fabriqueržtan nii wajtchiz žoñinacžtan Pablužquiz Bernabežquiz sirwiz pecatča Yooztakaz. Wac turunacžtan wilana ljokt'iz pecatča. ¹⁴Nekztanaqui Pablužtan Bernabežtan jalla ninacaqui nižta paa-awc cjen naaziča. Jalla nuž naažcu persun zqiti wjajrsiča, anal nii pecuča cjican. Nižaza nii žoñinacž taypiquin kjawcan luzcu, altu joržtan chiichiča, tuž cjican:

¹⁵—Žoñinaca, ěkjažtiquiztan wejtnacaltajapa tižta paajo? Wejrnacqui ančhuca irata žoñizakaztča. Ančhucaqui jalla tižta paaz cuzturumpinaca jaytiz waquiziča. Inapanikazza tii ančhuc cuzturumpinacaqui. Werar žejtñi Yoozza tjapa kuztanqui sirwizqui. Jalla nuž cjican ančhucaquiz mazñi tjonchinča. Nii werar Yoozqui paachiča arajpacha, yokanaca, kotanaca, nižaza tjapa žejlñinaca paachiča. ¹⁶Tuqui timpuqui žoñinacaqui persun kuzcama ojklajñitača. Jalla nuž ojklayan Yoozqui ana kjaž cjiñitača. ¹⁷Yoozqui chijñi apayžquiča, zuma zkala pookajo. Nižaza Yooz cjen wali čheri žejlča, učhumnaca lujlžjapami, nižaza cuntintu kamzjapami. Jalla nuž zumanaca tjaacha Yoozqui. Nižtiquiztan žoñinacaqui Yooz pajz waquiziča.

¹⁸Jalla nuž chianami nii wajtchiz žoñinacaqui tira wilana conawkkaz cjetča, Pablužquiz Bernabežquiz sirwizjapa. Ch'aman

tii custurumpinacquiztan apatatskatchiča. Ultimquiziqui nižtami ana wilana conchiča.

¹⁹Jalla nekztanaqui tsjii kjaž judionacaqui tjonchiča Antioquía wajtquiztan, nižaza Iconio wajtquiztan. Jalla nii tjonchi žoñinacaqui nii wajtchiz žoñinacžquiz kazzinchiča Pabluž quintra. Nekztanaqui maztan Pablo muzpa čhajcchiča. Nekztan nii čhajcñi žoñinacaqui, “Ticziča” cjican Pablo wajtž tjiya joochiča. ²⁰Wajtž tjiiquin ectaž cjen jalla nekzi criichinacaqui ajcziča Pabluž muytata. Jalla nuž želan, Pabluqui žaaziča. Nekztan wajtquin wila luzziča. Nekztanaqui jaka tažuqui Bernabežtan Pablužtan ojkičiča Derbe cjita wajt kjutñi.

²¹Jalla nicju zuma liwriñi Yooz taku paljaychiča. Jalla nuž paljayan walja žoñinacaqui Yooz taku criichiča. Nekztanaqui Lистра Iconio Antioquía nii watjanac kjutñi quejpchiča. ²²Jalla nii watjanacquin Pablužtan Bernabežtan Yoozquin criichi žoñinaca tjurt'iñi kuzziz cjisjapa walja chiižinchiča, tuž cjican:

—Yoozquin kuzzizpankaz tira kamaquiča. Yooz mantuquiz kamchiž cjen, tii muntuquiz ancha sufrispanča učhumnacaqui.

²³Nižaza zapa iclizquin jilirinaca nombrichiča. Nekztanaqui Yoozquin mayizizcu ayunazcu Pabluqui nii nombritanaca Yoozquin cumpjiichiča. Nii nombrita jilirinacaqui Yoozquin tjapa kuzziztača.

PABLUŽTAN BERNABEŽTAN ANTIOQUIA QUEJPCHIČA

²⁴Jalla nekztanaqui Pabluqui Bernabežtan Pisidia cjita yokaran watchiča. Nekztanaqui Panfilia cjita yokquin irantichiča. ²⁵Jalla

nicju Perge wajtquin Yooz taku paljaychiċha. Nekztanaqui Atalia cjita wajt kjutñi ojkcċhiċha. ²⁶Jalla nicju warcu zalchiċha, Antioquía ojczjapa. Tuquiqui ima okan, Antioquía wajtchiz criichinacauqui Pablužtan Bernabežtan, nii pucultan Yoozquin cumpjiichiċha Yooz taku paljayajo. Jalla nuž Yooz taku paljayz trabajo žeržcu, Antioquía watja quejpcċhiċha. ²⁷Jalla nicju irantižcu, Pabluqui Bernabežtan nii wajtchiz criichinaca juntaskatchiċha. Nekztan nii criichinacžquiz quint'ichiċha, tjapa Yooz aztan paatanaca. Nižaza quint'ichiċha, jaknužt yekja wajtchiz žoñinacauqui Yoozquin criichiċha; nižaza Yooz jiczquiz luzziċha. ²⁸Nižaza ažk tjuñinaca Pablužtan Bernabežtan nicju žejlchiċha criichinacžtan.

JERUSALENQUIN AJCZTA PUNTU

15 ¹Jalla nii timpuqui tsjii kjaž žoñinacauqui Judeaquiztan Antioquía ojkcċhiċha. Jalla nicju ninacauqui Yoozquin criichinacžquin tjaajñi kallantichiċha, tuž cjican:

—Moisés mantita cuzturumpinaca paastanċha, liwriita cjisjapa.

²Pablužtan Bernabežtan nižta tjaajñi žoñinacžtan walja ch'ayi ch'ayi parlicċhiċha nii cuzturumpi paaz puntuquiztan. Ultimquiziqui Pablužtan Bernabežtan yekjap criichinacžtan nombrita cjissiċha, Jerusalén watja ojczjapa. Jalla nicju nii parlita puntuquiztan wilta parlaquičha apostolonacžtan nižaza icliz jilirinacžtan.

³Jalla nijapa nii Antioquía criichinacauqui ninaca cuchanchiċha. Jalla nuž ojkan, Fenicia yokaran Samaria yokaran watchiċha. Jalla nuž wajtcan Pablužtan Bernabežtan quint'ichiċha, jaknužt yekja

nacionchiz žoñinacauqui ninacž tuquita cuzturumpinaca jaytiċhaja, nižaza jaknužt Yoozquin kuzziz cjistċhaja, jalla nii quint'ichiċha. Jalla nii quinto nonžcu žoñinacauqui “Ancha cuzala” cjican cjichiċha.

⁴Pablužtan Bernabežtan Jerusalén watja irantitan, nii wajtchiz criichinacami apostolonacami nii icliz jilirinacami tjapauntu Pablužtan Bernabežtan risiwchiċha. Jalla nekztanaqui Pabluqui Bernabežtan quint'ichiċha jaknužt ninacauqui Yooz aztan paatċhaja, jalla nii.

⁵Nekztanaqui yekjap fariseo partiquiztan criichinacauqui tsijtsiċha, tuž cjican:

—Nii yekja nacionchiz criichinacauqui judionacž chimpuz custurumpi jalla nii paastanċha. Nižaza Moisés mantita liicama kamla.

⁶Jalla nekztanaqui apostolonacami icliz jilirinacami ajcziċha jalla nii puntu parlizjapa. ⁷Jalla nuž ažkpacha ch'ayi ch'ayi parližcu, Pedruqui tsijtsiċha, tuž cjican:

—Jilanaca, anċhucqui tižta zizza.

Tuquiqui Yoozqui anċhucacauzitan wejr illzipanla, yekja nacionchiz žoñinacžquiz nii zuma liwriiñi Yooz taku paljayajo, ninaca nii liwriiñi taku criyajo. ⁸Nižaza Yooz Ejppui tjapa žoñinacž kuz zuma zizza. Nii yekja nacionchiz žoñinaca criiñi kuzziz cjen, Yoozqui ninacžquiz Espiritu Santo luzkatchiċha. Jaknužt uċhumnacauquiz Espiritu Santo luzkattċhaja jalla nužuzakaz. Nižaza Espiritu Santo tjaacan, Yoozqui tjeeziċha, yekja nacionchiz criichinaca persun maati cunta ricujchizakazza, jalla nii. ⁹Yoozqui ninacžtan uċhumnacatan ana pjalpjalziċha. Yoozquin tjapa kuz cjen ninacauqui kuz campiichiċha. Nižaza Yoozqui

ninaca pertunchiĉha, zuma kuzziz cjeajajo. ¹⁰Jaziqui Yooz Ejpqui niĉta munchiĉha. Anĉhucqui Yooz quintra cjequiz niiqui, casticta cjequiĉha. Anĉhucqui nii yekja wajtchiz criichinaca uĉhum cuzturumpi tjuz pecĉha, tsjii liczi kuziĉtakaz. Uĉhumpachaĉz nii cuzturumpinaca ana tjapa payi atchiĉha, niĉaza uĉhum tuquita atchi ejpnacĉquiztanpacha ana tjapa payi atchiĉha. Jaziqui, ĉkjaĉtquiztan niĉta ninaca paakat pecjo? ¹¹Nii cuzturumpi paañiz cjen anaĉ jakziltami ujnacquiztan liwriita cjesaĉha. Jesucristo Jiliriqui okzñi kuzziz cjen Źoñinacĉz laycu ticziĉha. Jalla niĉtquiztan Jesucristuĉquin criichiĉz cjen uĉhumnacami ninacami ujnacquiztan liwriita cjesaĉha.

¹²Jalla nuĉ Pedruĉz ĉiitquiztan tjappacha ĉh'uju cjiŝiĉha. Nekztanaqui Pabluĉtan Bernabeĉtan ninaca quint'ichiĉha, jaknuĉt yekja nacionanacaran ojklaycan Yooz aztan ŝiñalanacami milajrunacami paatĉhaja, jalla nii. ¹³Jalla nuĉ quint'i Źerĉtan, Jacoboqui cjichiĉha:

—Jilanaca, nonĉna. ¹⁴Simón Pedruĉqui uĉhumnacaquiz quint'ichiĉha jaknuĉt tuquiqui Yoozqui persun maati cunta ana judío Źoñinaca ricujchiĉzlaja, jalla nii. ¹⁵Niĉaza Yooz taku parliñi profetanacĉz cijjrta tawk jaruĉha niiqui. Cijjrta Yooz takuqui tuĉ cjiĉha:

¹⁶“Tii wattanaqui quejpĉcaĉha.

Davidĉz kjuyquiztan ojķñi Źoñinacaqui pajlzi kjuyaĉtakaz Ĺejlĉha. Jaziqui Davidĉz pajlzi kjuyaqui wiltal kjuyaĉha. Wiltal waytaĉha, ew Źoñinaca cjisjapa.

¹⁷Jalla nekztanaqui tjapaman nacionchiz Źoñinacaqui Yooz Ejp Jilirĉz kamaña pecaquiĉha. Jakziltat Yooz kjawztaĉzlaja, jalla nii Źoñinacaqui Yoozquin

tjonaquiĉha. ¹⁸Jalla nuĉ cjichiĉha Yooz Jiliriqui tuqui timpuquiztanpacha, Źoñinacaĉz zizajo”.

¹⁹“Jalla niĉtquiztan wejr cjiwĉha.

Nii ana judío Źoñinacaqui ana molistis waquiziĉha. Ninacaqui ninacĉz tuquita cuzturumpinaca jaytichiĉha, Yooz kuzcama kamzjapa. Jalla nuĉ cjenauqui ana kjaĉz cjis waquiziĉha, nii uĉhum cuzturumpinaca paaz puntuquiztan. ²⁰Tiikaz uĉhumqui ninacĉzquin cijjrasaĉha, tuĉ cjan: “Źoñiĉ paata yoozquin wilana jawkta ĉhjizwi anaĉha lujlsqui. Niĉaza anaĉha adulteriuquiz ojklayzqui. Niĉaza jora zkenzcu conta animal ĉhjizwimi anaĉha lujlsqui. Niĉaza ĉhjul animal ljocmi anaĉha lujlsqui”. Jalla niikaz cumplistanĉha nii yekja wajtchiz criichinacaqui.

²¹Tuquitanpacha zapa wajtquiziqui Moisés liiqui parlitataĉha. Niĉaza zapa ajcz kjuyquiz liitataĉha zapa jeejz tjuñquiziqui.

²²Jalla nekztanaqui apostolonacami icliz jilirinacĉtan niĉaza tjapa criichinacĉtan palt'ichiĉha, tsjii tsjii ninacĉquiztan illzjapa. Nekztan Judas illztataĉha, niĉz tsjii tjuuqui Barsabás cjitazakaztaĉha. Niĉaza Silas illztazakaztaĉha. Jalla nii pucultanaqui walja zuma jilanaca cjitataĉha niĉz mazi jilanacĉquiztan. Nekztanaqui nii illzta Źoñinacaqui Pabluĉtan Bernabeĉtan cuchantataĉha Antioquía wajtquin, nii cuzturumpi paaz parlita puntu mazjapa. ²³Jalla ninacĉtan tsjii carta apayĉhiĉha. Nii cartiquiz tuĉ cjichiĉha:

“Wejtnaca jilanaca, wejrnacqui Jesusiĉz illzta apostolonacĉha, niĉaza icliz jilirinacĉta, niĉaza Yoozquin criichinacĉta. Wejrnacqui anĉhucaquin tsaanznuĉha. Anĉhucqui ana judío Źoñinacĉhucĉha. Antioquía

wajtchiz žoñchucċha, niżaza Siria yokquin kamiñchucċha, niżaza Cilicia yokquin kaminċhuczakazza. ²⁴Wejrnacqui tsjii quintu zizzinċha. Tekztan tsjii kjaž žoñinacqui anċhucaquin ojktkalċha, ana jec jiliriž mantita ojkchiċha. Jalla ninacaž chiita taku anċhuca kuz turwayskatċhani. Ninacqui cjiċhani, “Judionacž chimpuz cuzturumpi paastanċha. Niżaza tjapa Moisés liiqui cumplistanċha”. Jalla nuž chiižcu, paysnakñi kuzziz cjiissinċhucċlani. ²⁵Jalla nii quintu zizcu, nii puntuquiztan wejrnacqui zuma palt'ichinċha. Nekztanaqui wejrnacqui kazzinċha, tsjii pucultan wejtnacauquiztan illzjapa. Nii pucultanaqui illztataċha anċhuc cherzñi okajo. Ninacqui Pablužtan Bernabežtan chica okaquiċha. Nii Pablo Bernabé, jalla ninacqui ancha zuma pecta jilanacaċha. ²⁶Nii Pablužtan Bernabežtan Jesucristo Jilirž mantita ojklaycan joz conkatchiċha. ²⁷Nižtiquiztan wejrnacqui Judastan niżaza Silžtan cuchanchinċha, anċhucatan tii puntu parljzjapa. Niżaza anċhucaquiz tjapa tii puntuquiztan paljayaquiċha. ²⁸Wejtnacquizimi Espíritu Santužquizimi walikaztaċha tinacqui. Wejrnacqui anċhucaquiz anaž tsjii liczi kuzi tjuz waquizasaċha, anaž wejtnac liczi cuzturumpi paakatiz waquizasaċha. Jalla tiikaz paakatiz waquiziċha. ²⁹Žoñiž paata yoozquiz wilana jawkta chjizwi anaċha lujlsqui. Niżaza ċhjul animal ljocmi anaċha lujlsqui. Niżaza jora zkenzcu conta animal chjizwimi anaċha lujlsqui. Anaċha adulteriuquiz ojklayzqui, luctaka cjiñimi maataka cjiñimi. Zuma lucutiñipan kamsa. Jalla nuž kamaquiz niiqui, walikaz cjequiċha anċhucqui. iZumakaz ojklaya!” Jalla nuž cjiirtataċha nii cartauqui.

³⁰Nekztanaqui nii cuchanta žoñinacauqui cartižtan ojkchiċha Antioquía watja. Jalla nicju irantižcu, tjapa nii wajtchiz criichi žoñinaca juntazziċha. Nekztan nii carta intirjichiċha. ³¹Jalla nii carta liižcu, nii jilanacauqui walja chipchiċha, nii zuma takunaca cjiiržquitaž cjen. ³²Niżaza nii Judastan Silžtan Yooz taku paljayñitaċha. Jalla nuž paljaycan walja žoñinacžquiz kuzziċha. Niżaza nii criichinacauqui tjurt'iñi kuzziz cjiskatchiċha ninacž tawkžtan. ³³Jalla tsjii kjaž tjuñinaca nicju kamchiċha, Judastan Silžtan. Nekztanaqui ninaca cuchanžquiñi jilanacžquin quejz pecatċha. Jalla nuž peccan parti criichinacauqui cjiichiċha:
—Yooz Ejpžtan anċhucqui zumakaz okalla.

³⁴Jalla nekztanaqui Judasqui ojkchiċha. Ultimquiziqui Silasqui eclis tantiichiċha. ³⁵Niżaza Pabluqui Bernabežtan Antioquía wajtquin eclichizakazza. Nekztanaqui parti jilanacžtan Yooz taku walja tjaañnatċha ana criichi žoñinacžquiz, niżaza liwriñi Yooz taku paljayatċha.

PABLUQUI WILTA YOOZ TAKU PALJAYI OJKĊHA

³⁶Jalla niiž wiruñ Pabluqui Bernabežquiz paljaychiċha, tuž cjan: —Witaž jaziqui ojklalla. Jakzi watjanacquin uċhumqui liwriñi Yooz taku parlitažlaja, jalla nii jilanacžquin tjontjonžquilalla. Jaknužt kamċhaja jalla niiċhum cheržquilalla.

³⁷Bernabequi Juan ċhjitz pecatċha. Juanž tsjii tjuuqui Marcos cjitazakaztaċha. ³⁸Niiž tuquiqui Panfilia wajtquin žejlcan, Marcosaqui Pablužquiztan Bernabežquiztan quepi zarakchiċha. Ana iya chica ojklaychiċha Yooz taku parlican.

Jaziqui Pabluqui Marcos ana chjitz pecatĉha. ³⁹Jalla niĉtiquiztan Pabluĉtan Bernabeĉtan ch'aassiĉha. Nekztanaqui jaljtichiĉha. Bernabequi Marcos chjitzcu tsjii warcu luzziĉha Chipre kjutĉni ojkszjapa. ⁴⁰Pabluzti Silas cjita Źoĉni illziĉha niĉĉtan chica ojknĉjapa. Nii Źejlĉni jilanacaqui Pabluĉtan Silĉtan Yoozquin cumpjiichiĉha, Yooz zuma yanapajo. ⁴¹Nekztan ninaca Siria yok kjutĉni ojkcichiĉha. Siria yokaran niĉaza Cilicia yokaran ojklaychiĉha, iclizquiztan icliza ojklaychiĉha, criichi jilanaca tjurt'iĉni kuzziz cjeajajo.

TIMOTEOQUI PABLO CUMPANT'ICHIĉHA

16 ¹Nekztanaqui Pabluĉtan Silĉtan irantiĉquichiĉha Derbe Listra cjita watjanacquiz. Jalla niĉju tsjii Yoozquin criichi Źoĉĉquiz zalchiĉha, Timoteo cjita. Niiĉ maaqui judĉo Źontaĉha, Yoozquin criiĉtaĉha. Niiĉ ejpqui griego Źoĉitaĉha. ²Niĉaza Listra wajtchiz criichi Źoĉinacami Timoteo rispitchiĉha. Iconio wajtchiz Źoĉinacaqui Timoteo rispitchizakazza. ³Nekztanaqui Pabluqui Timoteo kjutzĉni pecatĉha. Jalla niĉtiquiztan Pabluqui judionacĉ cuzturumpi jaru Timoteo chimpuskatchiĉha, nii yokaran kamĉi judionacaĉ ana quintrachiyajo. Timoteoĉ ejpqui griego Źoĉitaĉha, anataĉha judĉo. Jalla nuĉ cjen Timoteoqui ana chimpuchiztaĉha, judionacaĉ irata. Jalla nii zizziĉha nii yokaran kamĉi judionacaqui. ⁴Nekztanaqui tjapa watjanaca ojklaycan, Pabluqui niĉ mazinacĉtan Jerusalĉn parlita quintu mazziĉha. Apostolonacami Jerusalĉn icliz jilirinacami, jalla ninacaĉ chiita taku quint'ichiĉha tjapa Yoozquin criichi jilanacĉquiz. ⁵Jalla niĉtiquiztanaqui

niiran Źejlĉni criichinacaqui Yoozquin walja tjapa kuzziz cjissiĉha. Niĉaza zapuru Yooz jiczquiz luzatĉha iya Źoĉinacaqui. Jalla niĉtiquiztan tsjanĉ yapatĉha Yoozquin criichi jilanacaqui.

PABLUĉ CHJUUĉTA

⁶Jalla nekztanaqui Espĉritu Santuqui Pabluĉquizimi niĉ mazinacĉquizimi atajchiĉha, ana Asia yokaran Yooz taku parliĉni ojklayajo. Jalla niĉtiquiztan ninacaqui Frigia, niĉaza Galacia cjita yokanacaran ojklaychiĉha. ⁷Jalla nuĉ ojklayĉcu, Misia cjita lintiquin irantichiĉha. Jalla niwĉtan Bitinia yokquin luzquiz pecataĉha. Jalla nuĉ pinsan Jesucristuĉtan Espĉritu Santuĉtan nii yoka luz ana munchiĉha. ⁸Jalla niĉtiquiztan Bitinia yokquin ana luzziĉha. Antis Misia yokquin watĉcu, Troas cjita watja irantichiĉha. Jalla nii watjaqui pajk kot tjiquiz Źelatĉha. ⁹Jalla niĉju tsjii ween Yoozqui Pablo chjuuzkatchiĉha. Chjuuzcan jalla tuĉ Pabluqui cherchiĉha, tsjii Macedonia wajtchiz Źoĉi cherchiĉha. Tsjitsi Źelatĉha. Niĉaza rocatĉha, tuĉ cjan: "Macedonia yok kjutĉni kajĉĉcalla amqui. Yanapt'alla". ¹⁰Jalla nuĉ wiiquin chjuuĉcuqui Pabluqui tjacziĉha Macedonia ojkszjapa. Niĉazakaz wejrnaĉmi tjaczinĉha Pabluĉtan ojkszjapa. Ultimupanĉ Yoozqui wejrnaĉa kjawziĉha, nawjk ojklayajo liwriiĉni taku paljayajo.

PABLUĉTAN SILĉTAN FILIPOS CJITA WAJTQUIN OJKTA

¹¹Jalla nekztanaqui Troas wajtquin tsjii warcu zalazzinĉha. Nekz luzcu ojkcchinĉha. Nii pajk kot taypiquiz tsjii kolta yoka Źelatĉha, Samotracia cjita. Jalla nii tirichuc ojkcchinĉha. Niiĉ jaka taĉuqui Neapolis cjita watja irantichinĉha. ¹²Jalla nekztan

ojkchinča Filipos cjita watja. Nii watjaqui tuquitanpacha romano cjita wajtchiz žoñinacaz julžtatača. Jalla Macedonia yokquin nii watjaqui tsjan chekan pakjitača yekja watjanacquiztanaqui. Jalla nicju tsjii kjaž maj kamchinča. ¹³Tsjii jeejz tjuñquiz wajtquiztan ulanchinča, nižaza puj atquin. Jalla nicju žoñinacaqui ajczñitača, Yoozquin mayizi. Jalla nuž žejlcan wejrnacqui julzinča. Nekztanaqui liwriiñi Yooz taku palt'ican, nii ajczi maatakanaczquiz paljaychinča. ¹⁴Tsjaa maatakuqi Lidia cjititača. Naaqui Tiatira cjita wajtchiz žontača. Nižaza naaqui fin murat telanaca tuyiñtača. Naa žonqui Yoozquin walja kuz tjaachintača. Jalla nuž cjen, Yoozqui naaža kuzquiz Pabluž chiita taku catokskatchiča. ¹⁵Jalla nižtiquiztan naa žonqui bautistatača naaža familianacztanpacha. Nekztanaqui wejtnacaquiz roct'ichinča, tuž cjan:

—Ančhucqui ultimupan wejrqui Jesucristužquin criichinčhataqui cjičhaj niiqui, wejt kjuyquin tjonžcalla alujazjapa. —Nuž roctiquiztan naaža kjuyquiz wejrnacqui alujazzinča.

¹⁶Tsjii noojiqui wilta Yoozquin mayiziz yokquin ojkan, wejrnacqui tsjaa zajriž tanti turatan zalchinča. Naa turqui ariwiñi zizzintača. Naaqui patrunž manta payiñtača. Jalla nižtiquiztan walja paaz ganiñtača naaža patrunžjapa. ¹⁷Naa turqui Pablužquiz nižaza wejtnacaquiz apzñi kallantichinča. Jalla nuž apzcan kjawiñtača, tuž cjan:

—Tii žoñinacaqui arajpach Yooz sirwiñiča. Nižaza ančhucaquiz liwriiñi Yooz taku paljayñiča. —Jalla nuž kjawcan chiichinča.

¹⁸Zapuru nižta kjawcan wejtnacaquiz apzniñtača. Jalla

nižtiquiztan Pabluqui naažajapa tsjii zkoluc žawjznawcz cjetča. Jalla nuž cjen naaža kjutñi quejpžcu cherziča. Nižaza naa tanñi zajrižquiz chiichiča, tuž cjan:

—Zajra, Jesucristuž tjuuquiz am ulna cjiwča taa turaquiztan.

Jalla nii orapacha nii zajraqui naa turaquiztan ulanchiča.

¹⁹Jalla nižtiquiztan naa tura patrunanacaqui naaža ariwiñiquiztan ana iya paaz gani atchiča. Jalla nuž cjetča nii patrunanacaqui. Jalla nižtiquiztan ninacaqui Pablužtan Silžtan tanchiča. Nekztanaqui pajk plazquin chjitchiča nii wajt pajk jilirinacz yujcquin. ²⁰Juez jilirinaczquin prisintiskatchiča, tuž cjan:

—Tii judfo žoñinacaqui učhum žoñinaca aptjapča. ²¹Nižaza ninacz tsjemat cuzturumpinaca tjaajinča. Jalla nii cuzturumpinaca učhumqui anaž catokz waquiziča. Nižaza ana niicama kamz waquiziča. Lii quintrača. Učhumnacaqui roman žoñinaczhumča.

²²Jalla nuž chiitiquiztan nii wajtchiz žoñinacaqui Pabluž nižaza Silž quintra tjojtichiča. Nižaza nii juez jilirinacaqui mantichiča, ninacz cujtta zquiti chjojkžinajo, nekztan paržtan wjajtajo. ²³Jalla nuž walja wjajtžcu, carsilquiz chawjccchiča. Nižaza nii carsila itzñi žoñi mantichiča, ninaca zuma wijilajo. ²⁴Jalla nuž mantitiquiztan, nii carsila itzñi žoñiqui ninaca carsil kjuył majccchiča, nawjk c'utžjati. Jalla nekzi pajk mazu maderapantača. Nii maderquiz ninacz kjojcha majczinchiča.

²⁵Jalla nuž cjenami chica arama Pablužtan Silžtanaqui Yoozquin mayizican želatča. Nižaza Yooz wirsu

itscan želatčha. Jalla nuž mayizan, nuž itsan, nii parti carsilquiz chawjcta žoñinacaqui nonzičha. ²⁶Jalla nekztanaqui tiripintit tsjii tembloraž tjonchi. Nekztan nii carsil yokanacami pirkanacami liwj chekjinskatchičha. Jalla nuž chekjintiquiztanaqui tjapa nii carsil zananacami justokaz cjetsičha. Nižaza nii preso žoñinacž čhejlta carinanacami justokaz jersičha. ²⁷Jalla nižta watčcu, carsil itzñi žoñiqui tjaji wajtsičha. Nii carsil zananaca cjetsi cherčcu, “Pris žoñinacaqui atipchiž caa” nuž cjican pinsičičha. Jalla nuž pinsiscu, niž pajk cuchillu jwessičha, cuchillžtan persuna cenzapa. ²⁸Nekztanaqui Pabluqui kjawchičha, tuž cjican:

—Anam persunpacha čhjojrīchaquičha. Tjapa chawjcta pris žoñinacami tekz žejlčha.

²⁹Jalla nekztanaqui nii carsila itzñi žoñiqui micha tjeesnaj cjichičha. Nekztanaqui carsil kjutñi zati pariju luzzičha, walja tsucchi chekjincan. Nekztan Pabluž Silž kjojchquiz tuzi t'oksičha. ³⁰Nekztanaqui zancu jwescu, pewczičha, tuž cjican:

—Jilanaca, wejr liwriita cjisjapa, ččhjulut wejr paaz waquizasaya?

³¹Pablužtan Silžtanaqui kjaazičha, tuž cjican:

—Jesucristo Jiliržquiz tjapa kuztan criya. Jalla nuž cjenacami liwriita cjequičha am familianacžtanpacha.

³²Jalla nekztanaqui Pablo Silasqui nižquizimi niž kjuy familianacžquizimi Yooz taku paljaychičha. ³³Nii weenpacha nii carsila itzñi žoñiqui ninacž čhjojrī awjžinchičha. Jalla nekztanaqui niimi tjapa familianacami bautista cjissičha. ³⁴Nekztanaqui nii carsila itzñi žoñiqui Pablužtan Silžtan jalla ninaca chjitchičha persun kjuya.

Niž kjuyquin čhjeri tjaachičha. Nii žoñiqui familianacžtanpacha walja cuntintutačha Yoozquin criičcu.

³⁵Nii wenziqui juez jilirinacaqui zultat policianaca mantichičha carsilquin, Pablužtan Silžtan cutz ortinžtan cuchanchičha. ³⁶Ninacaž carsilquin irantitan, nii carsila itzñi žoñiqui Pablužquiz cjichičha:

—Nii juez jilirinacaqui wejtquin ortina apayžquichičha, ančhuc cutznajo. Nižtiquiztan ančhucqui jazic liwriiž okaquičha.

³⁷Pablužti nii zultat policianacžquiz paljaychičha, tuž cjican:

—Wejrnacqui roman parti žoñinactčha. Tjapa tii wajtquiz žejlñinacž yujcquiz wejrnaca wajtchičha, ana wejtnacaquiz zumpacha pewcžcu. Nekztanaqui inapacha wejrnac carsilquiz majcchičha. ČJaziqui ančhucqui wejrnaca chjojkaca cuts pecya? ¡Anaž cjesačha! Antiz ninacaj persuna wejrnac tii carsilquiztan jwesi tjonla.

³⁸Nekztanaqui nii policianacaqui ojkcžcu nii juez jilirinacžquiz tjapa nii puntuquiztan quint'ichičha. Pablužtan Silžtan roman parti žoñinacquiztan, jalla nii quintu zizcu, ancha tsucchi cjissičha.

³⁹Jalla nižtiquiztan pertuna mayizi ojkcchičha. Nekztanaqui nii jilirinacaqui tjonžcu jwessičha. Nekztan Pablužquizimi Silžquizimi rocchičha, tuž cjican:

—Tii wajtquiztanž ulna.

⁴⁰Jalla nekztanaqui carsilquiztan ulanžcu Pablužtan Silžtan Lidia kjuya ojkcchičha. Jalla nekztanaqui criichi jilanaca cherčcu, “Tjurt'iñi kuzziz cjee ančhucqui” cjican chiižinchičha. Nekztanaqui ojkcchičha.

ŽOÑINACAŽ APTJAPŽTA TESALONICA WAJTQUIN

17

¹ Jalla nekztanaqui wilta ojkcchičha, Pablužtan

Silžtanaqui. Anfópolis nižaza Apolonia jalla nii yokanaca watchičha.

Nekztanaqui Tesalónica cjita pakj watja irantichiča. Jalla nekzi tsjii judionacž ajcz kjuya želatičha. ²Nii wajtquin Pabluqui nii acjz kjuyquin ojkcichiča, niž cuzturumpi jaru. Tsjii čhjep jeejz tjuñinacquiziqui Pabluqui nii ajczñi žoñinacžquiz paljaychiča, nii tuquitan cijjrta Yooz tawk jaru.

³Yooz tawkquiztan tjaajinchiča Jesucristuž puntuquiztan, tuž cjican:

—Jesucristuqui sufrispantača, niž ticzcama. Niž ticziquiztan jachatatspantača. Nii Jesusapachača Yooziž cuchanžquita Cristuqui. Jalla nuž ančhucaquiz paljayučha.

⁴Jalla nii paljaytiquiztan yekjap judionacaqui Jesucristužquin criichiča. Nekztanaqui ninacaqui Pablužtan Silžtan juntu cjišičha. Nižaza walja griego parti žoñinacaqui Jesucristužquiz criichizakazza.

Tuquiqui Yooz Ejpkaz sirwichičha. Nižaza walja rispitta maatakanacaqui Jesucristužquin criichizakazza. ⁵Jalla nuž cjen ana criiñi judionacaqui ancha iñiziñi cjišičha. Nekztanaqui nii ana criiñinacaqui yekjap ñejo kuzziz žoñinaca juntjapchiča, Pabluž Silž quintra parlizjapa. Nekztanaqui ninacaqui juc'anti žoñinaca juntichiča. Nii žoñinaca junižcu, žoñinaca aptjapchiča Pabluž Silž quintra. Nekztanaqui tjapa nii quintra aptjapzñi žoñinacaqui Jasonž kjuya ojkcichiča. Jalla nuž ojkcžcu, nii kjuya muyuntichiča, Pablo Silas kjurcan. Nii pucultan žoñinaca jwes pecatčha, parti žoñinacžquiz intirjizjapa. ⁶Pero Jasonž kjuyquiz Pablo Silas ana watchičha. Nižtiquiztanaqui nii quintra žoñinaca Jasón tanchičha, nižaza yekjap nekz žejlñi jilanacžtan. Nekztanaqui nii criichinacaqui chjichtatača wajt

jilirinacž yujcquin. Nii jilirinacž yujcquiz želan, nii quintra žoñinacaqui altu joržtan chiichiča, tuž cjican:

—Tii žoñinacaqui jakziquin ojktčhaja, nekz žejlñi žoñinacž kuz turwayskatčha. Jalla tinacaqui tekz tjonchizakazza, ana wal kamaña quejpskatzjapa. ⁷Jasonqui niž kjuyquiz Pablo Silas alujchitakalčha. Nižaza tinacaqui cjiča, yekja chawc jiliri žejlčha, Jesusa cjita. Nužukaz cjiča tinacaqui. Jalla nuž cjenauqui niiqui ancha učum lii quintrača, nižaza učum roman chawc jilirž quintrača. —Nuž cjican quintra chiichiča.

⁸Jalla nuž nonžcu, tjapa nii wajtchiz žoñinacami jilirinacami walja žawjchiča. ⁹Ultimquiziqui Jasonqui niž mazinacžtanpacha tsjii wali printa tjaachiča, ninaca cutta cjeayo.

PABLUŽTAN SILŽTAN KAMTA BEREA CJITA WAJTQUIN

¹⁰Jalla nii nooj weenpacha criichi jilanacaqui Pablužquiz Silžquiz nii wajtquiztan ulanskatchičha. Nekztan Berea cjita watja ojkcichiča. Jalla nicju irantižcu, judionacž ajcz kjuya luzziča.

¹¹Jalla nii judionacaqui tsjan zuma kuzziztača nii Tesalonic wajtchiz judionacžquiztan. Tjapa kuztan Yooz taku catokñitača. Nižaza zapuru ninacaqui tuquita cijjrta Yooz taku ližcu ližcu zumpacha tantiichiča, nii Pabluž Silas chiita taku, werara ana werara, jalla nii zizjapa. ¹²Jalla nižtiquiztan walja nii judionacaqui Jesucristužquin criichiča. Nižaza walja griego parti žoñinacaqui criichizakazza, rispitta luctakanacami maatakanacami criichizakazza. ¹³Jalla nekztanaqui nii Tesalónica wajtchiz judionacaqui nonziča, Pabluqui Berea wajtquin Yooz taku paljayñi ojkcichiča. Jalla nii quintu zizcu, Berea

watja ojkcichiċha. Jalla nicju ninacaqui
 žoñinaca žawjwaž zjjcanchiċha,
 Pabluž quintru. ¹⁴Jalla nuž cjen nii
 criichi jilanacaqui ana enenskatžcu
 Pablo cuchanžquichiċha pajk kot
 kjutñi. Silžtan Timoteožtan, jalla
 ninacazti Berea wajtquiz eclichitaċha.
¹⁵Nekztanaqui Pablužtan cumpant'iñi
 žoñinacaqui Pablo chjitchiċha
 Atenas cjita watja. Jalla nekztanaqui
 quejpžquichiċha tii takunacžtan:
 “Silžtan Timoteožtan, jalla ninacaqui
 Pablužquin apura irantiz waquiziċha”,
 cjican.

PABLUŽ KAMTA ATENAS CJITA WAJTQUIN

¹⁶Nekztan Pabluqui Silas Timoteo
 tjewsnatċha. Atenas cjita wajtquiz
 žejlcan, wacchi žoñiž paata yooznaca
 cherchiċha. Nii wajtquiziqui jakzimi
 žoñiž paata yooznacapanikaz želatċha.
 Jalla nuž cheržcu niž kuzquiz ancha
 sint'ichiċha. ¹⁷Jalla nižtiquiztan
 Pabluqui judionacž ajcz kjuyquin
 paljaychiċha. Judionacžquizimi Yooz
 rispitñi žoñinacžquizimi paljaychiċha.
 Nižaza zapuru pajk plazquin
 paljaychiċha, ojklayñi žoñinacžquiz.

¹⁸Jalla nii plazquiz tsjii istutiñinaca
 želatċha. Parti nii istutiñinacaqui
 Epicúreos t'akquiztantaċha. Parti
 nii istutiñinacazti Estoicos cjita
 t'akquiztantaċha. Jalla ninacaqui
 Pablužquiz paljaychiċha. Nekztanaqui
 yekjap istutiñinacazti cjichiċha:

—¿Jaknužkat tii žoñic chiiċhani,
 waljaž chiiċha pero? ¿Ĉjulut
 intintiskatz pecjo?

Yekjap istutiñinacazti cjichiċha:

—Niċha yekja yooznacž
 puntuquiztan paljayñiqui.

Pabluqui Jesusiž puntuquiztan
 nižaza ticzquiztan jacatatz
 puntuquiztan chiiċhiċha. Jalla nuž

chiitiquiztan nii istutiñinacaqui
 nižta chiiċhiċha. ¹⁹Nekztanaqui nii
 istutiñinacaqui Pablo chjitchiċha
 tsjii Areópago cjita yokquin. Jalla
 nicju ajczñitaċha parlizjapa. Nekztan
 Pablužquiz chiiċhiċha tuž cjican:

—Nawjctan amqui tsjii ew
 tjaa jintanaca zjjcchamċha. Jalla nii ew
 taku ziz pecuċha wejrnaqui. ²⁰Amqui
 tsjemat istrañchuc takunaca chiiċha.
 Kjažt cjii nii takunacaya, jalla nii
 intintaz pecuċha wejrnaqui.

²¹Nii Atenas wajtchiz žoñinacaqui
 nižaza nii parti wajtquin kamñi
 žoñinacaqui ċjul ew takunacami
 nonzkaz pecatċha. Nižaza ċjul ew
 takunacami chiiz kaz pecatċha. Jalla
 nii ew takunacquizkaz ninacž kuz
 tjaañitaċha.

²²Jalla nii Areópago yokquin
 Pabluqui ninacž taypiquin tsjitsiċha.
 Jalla nuž tsjitscu, tuž cjichiċha:

—Atenas wajtchiz žoñinaca,
 anċhucqui wacchi yooznaca
 rispitiñchucċha, jalla niil cheruċha.
²³Tii wajtquiz ojklaycan, wejrqui
 anċhuca silunaca cherchinċha. Nižaza
 tsjii silquin cherchinċha tuž cjirra: “Tii
 siluqui ana pajta Yooz sirwizjapaċha”.
 Nii ana pajta Yooz anċhucqui rispitiċha,
 ana pajžcupacha. Jalla nii ana pajta
 Yooz puntuquiztan chiyuċha.

²⁴Nii Yoozqui tii muntu paachiċha,
 nižaza tjapa tii muntuquiz žejlñi
 cusasanaca. Jaziqui arajpachquinami
 yokquizimiž mantiċha. Nii Yoozqui
 žoñinacž kjuyta timplunacquiz ana
 kamċha. ²⁵Anaž ċjulumi pecċha,
 žoñiž sirwita paataqui. Niipachaž zapa
 atquiztan jeejsjapa tjaaċha, nižaza
 tjappacha tjaaċha žoñinacžquiz.

²⁶Tsjii lucutiñi žoñžquiztan
 tjapa tii muntuquiz žejlñi žoñinaca
 tjonkatchiċha Yoozqui, tjapa kjutñi tii

muntuquiz kamajo. Nižaza žoñinacž žejtz timpumi ticz timpumi, jalla nii Yoozpachaž mantiča. Nižaza jakziquin tsjii žoñiqui kamslaja, jalla niimi zakaz mantiča Yoozqui. ²⁷ Jalla nuž mantichiča Yoozqui, žoñinaca nii kjurajo, nižaza wachajo. Ultimupanča Yoozqui učumnacaquiztan anaž ažkquin žejlča. ²⁸ Yooziž cjen učumqui žejtča, nižaza ojklajča. Jalla nižtazakaz yekjap ančhucaquiztan cijrchiča, tuž cijcan: “Yooziž paatača učumqui”. ²⁹ Nekztanaqui učumqui Yooz paatiquiztan, učumlaqui anaž pinsis waquiziča, tuž cijcan: “Ultim Yoozza žoñiž paataqui, korquiztan, paazquiztan, mazquiztan, jalla nižta žoñiž paataqui”. ³⁰ Tuqui timpuqui žoñinacaqui Yooz puntuquiztan ana zumpacha zizziča. Jalla nuž cjen Yoozqui žoñinacž uj awantichiča. Anziqui tjapa tii jazta žoñinacžquiz mantichiča, tuž cijcan: “Persun uj pajžcu, kuzza campiya”. ³¹ Nekztanaqui Yoozqui tsjii tjuñi utchiča, tjapa tii muntuquiz žejlñi žoñinaca werara pjalzjapa. Tsjii Yooziž illzta žoñiqui tjapa žoñinaca pjalaquiča, Yooz Ejpž cuntiquiztan. Yoozqui nii illzta žoñi ticziquiztan jacatatskatchiča. Jalla nižtiquiztan Yoozqui kjanapacha tjeeziča, nii žoñiqui illztatača pjalnijapa, jalla nii. Jaziqui nižiquin criya. —Nuž paljaychiča Pabluqui.

³² Jalla nii ticziquiztan jacatatchi quintu nonžcu, yekjapanacaqui tjassiča. Yekjapanacazti cjichiča: —Tii jarquin tii amiž chiita puntuquiztan wilta nonznachani.

³³ Jalla nekztanaqui Pabluqui ninacžquiztan ojkičiča.

³⁴ Yekjapanacazti Pablužquiz apziča, niž taku criižcu. Ninacžquiztan tinaca želatča: Dionisiotacha tsjiui, nižaza

niiqui Areópago cjita t'akquiztantača. Nižaza Dámaris cjiti tsjaa maatak žonqui criichintača. Nižaza tsjii kjaž iya žoñinacaqui criichiča.

PABLUŽ KAMTA CORINTO CJITA WAJTQUIN

18 ¹ Wiruñauqui Pabluqui Atenas wajtquiztan ulanchiča. Corinto cjita watja ojkičiča. ² Jalla nicju tsjii judío žoñžtan zalchiča. Nii žoñiqui Aquila cjitatača. Ponto yokquiztan tjonchitača. Niiž tuquiqui Claudio cjita chawc jiliriqui mantichiča tjapa judío žoñinaca Roma wajtquiztan ulnajo. Jalla nižtiquiztan Aquilaqui Italia yokquiztan ulanspantača, niiž tjunatanpacha, Priscila cjiti. Ninacžquin Pabluqui tjonžni ojkičiča. ³ Pablužtan ninacžtan tsjii oficiuchiztača, tultu kjuya paañitača. Jalla nižtiquiztan Pabluqui ninacžtan kamchiča junto nii tultu kjuya langzjapa. ⁴ Zapa jeejz tjuñquiz Pabluqui judionacž acjz kjuya ojknitača. Jalla nicju judionacžquiz Yooz taku paljayñitača, nižaza ana judío žoñinacžquizimi. Zuma razunchiz tawkžtan paljaychipanča ninacaž zumpacha intintazni cjisnajo.

⁵ Nekztan Silžtan Timoteožtan Macedonia yokquiztan irantižquichiča. Nekztanaqui Pabluqui Yooz takupanž paljayatča. Yekja langžnijapa timpu ana želatča. Nižaza Pabluqui judío žoñinacžquiz kjanacama intintiskatchiča, Jesusaqui ninacaž tjewžta Cristuča, jalla nii. ⁶ Nii judío žoñinacazti quintra cjissiča Pablužjapa. Nižaza niž quintra anawalinaca chiichiča. Jalla nižta niž quintra chiitiquiztan Pabluqui niž zquiti tsajttsajtsinchiča, ninacž quintra tsjii siñala cjeyajo. Nižaza cjichiča:

—Ančhucqui infiernuquinž tjojttaž cjequičha, liwriiñi Yooz taku ana nonzinčhuccha, nekztan. Jalla nuž castictaž cjen, ana wejtquiz uj tjojtnasačha. Ančhucqui kuzinpan Yooz taku ana criiz peccha. Tonjtan nawjchuc wejrqui yekja wajtchiz žoñinacžquin okačha, ninacžquin liwriiñi Yooz taku paljayžčača.

⁷Nekztanaqui nii ajcz kjuyquiztan ulanžcu tsjii Justo cjeta žoñž kjuya ojkcichiča. Nii žoñiqui Yooz sirwiñitačha, nižaza ajcz kjuy latuquiz kjuychiztačha. Jalla nekcžejlñitačha. ⁸Nii ajcz kjuy jiliriqui Crispo cjitatačha. Niiqui nižž familianacžtanpacha Jesucristužquin criichiča. Nižaza walja Corinto wajtchiz žoñinacaqui Yooz taku nonžcu criichiča. Nekztanaqui bautista cjissiča. ⁹Jalla nekztanaqui tsjii ween Yooz Jiliriqui Pablo chjuuzkatchiča. Nii chjuužtquiztan Yoozqui Pablužquiz cjichiča:

—Ana eksna amqui. Tirapan Yooz taku parla. Yooz taku paljayñi langzquiztan ana jayta. ¹⁰Wejrqui amtan chicapachačha. Anaž jakziltami amquiz tani atasacha, ana wali paazjapaqui. Nižaza tii chawc wajtquiz muzpa žoñinacaqui wejtquin criayaquičha.

¹¹Jalla nuž chjuuzcu Pabluqui nii Corinto wajtquiz tsjii wata tirzuchiz kamchiča, Yooz taku tjaajincan.

¹²Jalla nižž wiruñ judfo žoñinacaqui Pabluž quintru tsjii kuzziz ajcziča. Nekztanaqui Pablo tanžcu, chawc jilirž yujcquin chjitchiča. Galión cjitatačha nii Acay yok jiliriqui. ¹³Jalla nuž chjichcu, nii chawc jiliržquiz cjichiča:

—Tii žoñiqui učumnaca lii quintruž ojklayča. Tiiqui žoñinacžquin ana wal tawkžtan intintiskatča, nižž Yooz sirwizjapa. Pero nižž Yooz sirwizqui učumnaca lii quintruča.

¹⁴Pabluž chiyawc cjen Galión cjeta jiliriqui judionacžquiz paljaychiča, tuž cjican:

—Judfo žoñinaca, tii žoñiqui ana wejtnaca lii quintru paachiča. Nižaza ana chawc uj paachiča. Tsjii anawali paatasacha, nekztan ančhucaž quijta razuna nonžtasacha. ¹⁵Tii asuntuqui ančhuca takucamakazla; nižaza žoñž tjuu puntuquiztan parlakazla; nižaza ančhuca liiquiztankazla. Jaziqui ančhucporaz parlasa; nižaza ančhucporaz kjažmi arreglasa. Wejrqui anal tii ančhuca lii puntuquiztan arreglis želuča.

¹⁶Jalla nekztanaqui nii jiliriqui nii žoñinaca tjirkatchiča nižž ofcinquiztan. ¹⁷Nii ajcz kjuya jiliriqui Sóstenes cjitatačha. Jalla niiča quijchiqui. Jalla nuž nii jilirž tjirkattiquiztan, tjapa nii wajtchiz žoñinacaqui nii quijñi žoñžtan kichi tansiča, jalla nekpacha, nii jilirž yujcquizpacha. Nii Galión cjeta jilirizti nuž kichjasanami ana importichiča.

PABLUQUI ANTIOQUIA QUEJPCHIČHA

¹⁸Nekztanaqui Pabluqui iyapan kamchiča. Nekztan nii criichi jilanacžquiz “Okučha” cjican ulanchiča. Nekztanaqui tsjii warcu zali ojkcichiča, Siria yoka ojczjapa. Priscilatan Aquilžtan chica ojkcichiča. Cencrea cjeta wajtquiz, ima warcuquiz luzcan, Pabluqui nižž ach chara k'ala murchiča, tsjii compromitta cuzturumpi cumplisjapa. ¹⁹Nekztanaqui warcuquiz ojczcu, Efeso cjeta watja irantichiča. Jalla nicju Pabluqui Priscilatan Aquilžtan, jalla ninaca ecchiča. Nekztan Pabluqui judionacž ajcz kjuya ojkcichiča. Jalla nicju nii ajczñi judionacžtan parlichichiča. ²⁰Nekztanaqui nii

judionacaqui Pablo roct'ichiča, iya tsjii kjaž majžtan kam't'ajo. Pabluzti ana munchiča. ²¹Jalla nekztan ima ninacžquiztan ojkan, Pabluqui cjichiča:

—Jerusalén watja irantistanča, pijista paazjapa. Pero Yooz munanaqui wejrqui quejpžcača ančhucatan wila zali.

Jalla nuž chiižcu, warcuquiz luzziča. Nekztanaqui Efeso wajtquiztan ojkiča. ²²Nekztanaqui Cesarea cjita watja irantižcu, Pabluqui warcuquiztan ulanchiča. Jalla nuž ulanžcu Jerusalén watja ojkiča, criichi jilanacžquin zalzjapa. Nekztan Antioquía wajt kjutni ojkiča. ²³Jalla nekz tsjii kjaž tjuñi kamžcu, wila ojkiča. Galacia nižaza Frigia yokanacaran ojklaychiča. Jalla niiran iclizquiztan icliza ojklaychiča, criichi jilanaca tjurt'iñi kuzziz cjiskatzjapa.

APOLOS CJITA YOOZ TAKU PALJAYÑI

²⁴Jalla nii timpuqui tsjii judío žoniqi Efeso cjita watja irantichiča. Apolos cjita tjuuchiztača. Niiqui Alejandría pajk wajtchiz žonitača. Nižaza niiqui Yooz taku walja zuma paljayñitača. Nižaza cijjrta Yooz taku zumaž zizatča. ²⁵Nii Apoložquiz Yooz kamañ puntu walja tjaajintatača. Jaziqui walja tjapa kuztan Yooz taku parliñitača. Juanž bautistakaz cjenami Jesucristuž puntuquiztan walja kjana tjaajinchiča. ²⁶Nekztanaqui Efeso wajtquiz žejlcan, Apolosqui ajcz kjuyquiz tjurt'iñi kuzziz tsijtsiča, Yooz taku paljayzjapa. Niiž paljaya taku nonžcu, Priscilatan Aquilžtan jalla ninacaqui tsjii latu Apolos chjitchiča, Yooz kamaña puntu tsjan kjana tjaajinzjapa. ²⁷Jalla nekztanaqui Apoložquiz Acaya cjita

yokaran ojklayz pecatča. Jalla nuž cjen jilanacaqui walja apoychiča, nižaza tsjii carta credencial apaychiča nii yokquin žejlñi jilanacžquiz, ninaca zuma risiwajo. Nii yokchiz jilanacaqui Yooz okzñiž cjen criichiča. Acaya irantiscuqui Apolosqui nii criichi jilanacžquiz zuma tjaajinchiča. ²⁸Nižaza zuma razunquiztan chiican, tjapa žoninacž yujcquiz nii quintra judionacž pinsitanaca tjeziča, anapan zumaž ninacž razunaqui. Ninaca atipchiča. Nii quintra judío žoninacaqui ana kjaž cjii atchiča. Cijjrta Yooz tawk jaru intintiskatchiča, Jesusaqui ninacaž tjewzta Cristuča, nižaza Yoozquiztan cuchanžquita Cristuča, jalla nii.

PABLUŽ KAMTA EFESO CJITA WAJTQUIN

19 ¹Acayquiztan quejpžcu, Apolosqui Corinto wajtquiz želatča. Pabluzti curunac yoka watžcu, Efeso watja irantichiča. Jalla nicju tsjii kjaž Yoozquin criichi žoninacžtan zalchiča. ²Jalla nuž zalžcu, Pabluqui pewcziča, tuž cjican: —¿Ančhuc criiz oraqui Espíritu Santuqui ančhuca kuzquiz luzzikay? Ninacaqui kjaaziča, tuž cjican: —Anaž. Nii Espíritu Santo puntuquiztan anawira nonzinča. ³Jalla nižtiquiztanaqui Pabluqui pewcziča, tuž cjican: —Ančhucqui, čchjul bautismo tanzinčhuctaya? Ninacaqui kjaaziča: —Juanž bautismo tanzinča —cjican. ⁴Nekztanaqui Pabluqui cjichiča: —Walikazza. Juanqui kuz campiñi žoninacžquiz bautisñitača. Pero nii Juanž wirquin tsjiiqui tjonchiča. Jalla niiča Jesusaqui. Niiqui Yooz Ejpžquiztan cuchanžquita Cristuča.

Jalla niizquin criiz waquiziicha. Jalla nižtazakaz Juanqui žoñinacžquiz chiižniitača.

⁵ Jalla nii taku catokžcu, nii žoñinacaqui Jesucristo Jilirž tjuuquiz bautistatača. ⁶ Nekztanaqui Pabluqui ninacž juntun kjaržtan lanchiča. Jalla nuž lanznan Espiritu Santuqui tjonchiča. Jalla nižtiquiztan yekja takunacžtan parli kallantichiča. Nižaza Yooziž zizkatta puntunaca parličiča. ⁷ Jalla ninacaqui tsjii tuncapan žoñinacatakalača.

⁸ Čhjep jiiz Pabluqui jalla nicju kamchiča. Jalla nuž kamcan ajcz kjuya ojknipantača. Nii ajcz kjuyquin zuma tjurt'iñi kuzziz paljayñipantača, Yooz mantita kamañ puntuquiztan intintiskatcan. ⁹ Yekjap žoñinacazti wira ana criichipanča. Ninacaqui chojru kuzziz cjišiči. Yooz kamañ quintra parličiča. Jalla nižtiquiztan Pabluqui ninacžquiztan zarakchiča. Nižaza criichi žoñinaca chjitchiča tsjii escuel kjuyquin. Nii escuelchiz žoñiqui Tiranno cjita tjuuchiztača. Jalla nicju Pabluqui tjaaajinčiča zapuru.

¹⁰ Jalla nuž tjaaajincanaqui pizc wata kamchiča. Jalla nižtiquiztan tjapa nii Asia provincia yokquin kamñinacaqui Jesusa Jilirž liwriiñi quintu nonchiča. Judío žoñinacami, nižaza ana judío žoñinacami nii quintu nonchiča.

¹¹ Nižaza Yooz aztan Pabluqui wali pajk milajrunaca paachiča. ¹² Jalla nižtiquiztan žoñinacaqui pañumi zquitimi Pablužquiz lanskatchiča. Jalla nuž lanskatzcu, nii pañumi zquitimi chjitchiča, laa žoñinacžquin. Jalla nižtiquiztan nii laanacaqui čhjetintatača, nižaza nii žoñinaca tanñi zajranacami ulanskatchiča.

¹³ Tsjii kjaž judío žoñinacaqui ojklayatča, zajranaca chjatkcatcan. Jalla nuž chjatkcatcan, nii žoñinacaqui

Jesusa Jilirž tjuužtan ojklayz pecatča. Nekztanaqui zajranacžquiz cjichiča:

—Zajranaca, ančhuc ulnaj cjiwča, Pabluž parlita Jesús tjuuquiz.

¹⁴ Jalla nižta paachiča pakallaww judío jilazullacaqui. Ninacž ejpqui Esceva cjita tjuuchiztača. Niiqui judiuž timplu chawc jiliritača. ¹⁵ Nii pakallaww jilazullaca nižta paan, tsjii žoñi tanñi zajraqui ninacžquiz cjichiča:

—Jesús pajuča. Nižaza Pablo pajuča. Ančhucqui čjetcčhuctajo?

¹⁶ Jalla nižtiquiztan nii zajra tanta žoñiqui tsjii layžcu ninacžquiz tanziči, kijchjapa. Nii zajraž tanta žoñiqui walja azziztača. Jalla nii aztan ninaca atipchiča. Nižaza k'alapacha čhjojritchipanča. Nižtami chjojricta ana zquitichiz atipassiča nii pakallaww žoñinacaqui. ¹⁷ Jalla nekztanaqui tjapa nii Efeso wajtchiz žejlñi žoñinacaqui nii quintu zizziča, judionacami, ana judionacami. Jalla nekztan walja eksnatča. Nižaza Jesucristo Jilirž tjuu walja alawazziča.

¹⁸ Nižaza walja criichi žoñinacaqui ninacaž tuquita persun uj paatanaca pajžcu, kjanacama mazziča. ¹⁹ Nižaza yekjap žoñinacaqui ima Yoozquin criican, laykican ojklayniitača. Jalla ninacaqui ninacž layka ojklayz liwrunaca zjijcchiča. Nekztan k'ala nii liwrunaca ujkatchiča tjapa žoñinacaž cheran. Pijjska tunc waranka pajk ultimu paaz, nuž valorchiztača nii liwrunacaqui. ²⁰ Jalla nekztan nii criichi žoñinacaqui tjapa kjutñi Yooz taku paljayi ojklaychiča. Nekztan tsjan tsjan žoñinacaqui Yooz taku catokchiča.

²¹ Jalla niž wiruñ Pabluqui niž kuzquiz Macedonia nižaza Acaya yokanacquin tjonzpanž tantiichiča. Jalla nuž wattan Jerusalén watja

irantispanž tantiichiča. Nižaza Pabluqui cjichiča:

—Jerusalén watja ojkcucuqi, wejtlaqui Roma watja irantistanča.

²² Jalla nižtiquiztanaqui Pabluqui pucultan yanapñinaca cuchanchiča Macedonia. Nii pucultanaqui Timoteotača, nižaza tsjiiqui Erastotača. Pabluzti tsjii kjaž majjapa eclichiča Asia yokquin.

ŽOŇINACA APTJAPŽTA EFESO WAJTQUIN

²³ Jalla nii timpuqui walja žoñinaca aptjapziča, Yooz kamañ jicz puntuquiztan paljaytaž cjen. ²⁴ Nii aptjapñi achaqui Demetrio cjitatača. Jalla niiqui paazquiztan yooznaca paañitača. Jalla nuž paatiquiztan walja paaz canchiča, nižaza parti nižta paañinacaqui. Diana cjiti žoñiž paata yooz timplu irata jalla nii paachiča ninacaqui. ²⁵ Nekztan Demetrio cjita žoñiqui tjapa nii yooznaca paañi žoñinaca juntichiča, nižaza niž langžni mazinaca juntichizakazza. Nekztanaqui tuž cjichiča:

—Jilanaca, ančhucqui zizza. Tii oficiuquiz langzcan, zuma paaz canča učumnacaqui, zuma kamzjapa. ²⁶ Tii Pabluqui ojklajča, “Žoñiž paata yooznacaqui anača ultim yoozqui”, cjican. Jalla nuž chiyani, walja žoñinacaqui niž taku criiča, tii Efeso wajtquinami, nižaza tjapa tii Asia provincia yokquinami. Niiž taku criižcu, učum yooznacquižtan zarakchiča. Jalla nii quintu nonchinčhucča, nižaza cherchinčhucča. ²⁷ Jalla nižtiquiztan tii učum langznacaqui anat cusa cjisnačhani. Nižaza učumž cansmi pertisnačhani. Anziqiu tjapa tii Asia provincia yokquin žejlñi žoñinacami

nižaza tjapa tii muntuquiz žejlñi žoñinacami naa yooz siñuri sirwiñiča. Pero Pabluž cjen, Diana cjiti pajk yooz siñuri timplumi ana rispittat cječhani.

²⁸ Jalla nuž Demetriuž chiita taku nonžcu, walja žawjchi cjišiči. Jalla nuž žawjžcu, kjawchiča tuž cjican:

—iViva Diana yooz siñura! iViva tii Efeso wajtchiz yooz! —nuž cjican kjawchiča.

²⁹ Nekztan tjapa nii wajtchiz žoñinacž kuz turwayskatchiča. Nižtiquiztan nii wajtchiz žoñinacaqui Gayžtan Aristarcužtan, jalla ninaca kichi tanziča. Nii pucultanaqui Macedonia yokquiztan Pablužtan chica ojkcitača. Jalla nii pucultan tanžcu, pajk parliz kjuya chjitchiča. ³⁰ Nižaza Pabluqui nii kjuya luz pecatča, žoñinacžquiz paljayzjapa. Criichi žoñinacazti Pablo atajchiča, ana luzkatajo. ³¹ Nižaza yekjap Asia jilirinaca želatča, Pabluž amigonacatakalča. Jalla ninacaqui tsjii žoñi cuchanžquichiča Pablužquin rocžinajo, nii parliz kjuyquiz ana luzajo. ³² Tampachquiztan juntazcu žoñinacaqui kjawchiča tjapaman razunanaca chiican. Aptjapziž cjen nekztan nižta kjawchiča žoñinacaqui. Ancha pajk ch'awjwa paatča. Jila manka žoñinacaqui čjul puntu ajcztažlaja ana zizziča. ³³ Yekjap žoñinacaqui nii ajczta puntu zumpacha intintiskatchiča Alejandrožquiz. Nekztan niiqui tucquin tsjitskatchiča, nii judionacžquiztan tjurt'ižinajo. Nekztanaqui Alejandroqui kjara waytižcu ch'uj cjeej cjichiča. Nekztanaqui niiqui tjapa žoñinacž yujcquiz tjurt'ižiniž tawkžtan chiiz pecatča. ³⁴ Parti žoñinacazti Alejandro judío žoñi cjican zizcu, wilta kjawchiča tsjii pizc ora. Tsjii joržtan tuž cjican:

—iViva Diana yooz siñura! iViva tii Efeso wajtchiz yooz!

³⁵Jalla nektanaquii nii wajt secretariuquii žoñinaca ch'uj cjiskatžcu, paljaychiča tuž cjican:

—Efeso jilanaca, tii pajk yooz Diana siñura timplu tii Efeso wajtchiz žoñinacžquiz cumpjiitača. Nižaza arajpachquiztan tjojtžquichinča taa yooz siñuriquii. Tsjii maz cheechi tjonžquichinča. ³⁶Jalla nii puntuquiztanaquii anaž jecmi nicasača. Jaziqui ch'ujča cjee. Ima zuma tantiyazcan anača čjulumi paa. ³⁷Tii ančuca zijjcta žoñinacaquii ana čjulumi čiihiča naa Diana siñurijapaquii, anazaž naa quintra čjulumi paachiča. ³⁸Demetriužtan niiž langžni mazinacžtan quijz pecčhaj niiqui, nijapa juez jilirinaca žejlča. Nii jilirinacžquinkaz ojkl, nii quija arreglisjapaquii. ³⁹Tsjii yekja puntu parliz pecčhaj niiqui, zumpachaž ajczcuž parla. ⁴⁰Tii aptjapzi puntuquiztan učum čhiiz razunanacaquii ana žejlča. Jaziqui učum gobiernuquii učumnac quintra uj tjojtñasacha, tii nooj aptjapztiquiztan. ⁴¹Tii parlaquii žeržta cjila, —nuž cjichiča nii secretariuquii.

Nektanaquii žoñinaca liwž cuchanchiča, persun kjuya okajo.

PABLUŽ OJKTA MACEDONIA NIŽAZA GRECIA

20 ¹Jalla nektanaquii nii aptjapzta žoñinacaž ojektan, Pabluquii criichi žoñinaca kjawziča, ninacžquiz tjaaajnzjapa. Nektanaquii Pabluquii “Okaz” cjichiča, Macedonia yoka ojkszjapa. ²Jalla nii yokquin ojklaycan, criichi jilanacžquin zuma tawkžtan ancha p'ekinchaychiča, tjurt'liñi kuzziz cjeajajo. Nektanaquii Grecia yoka irantichiča. ³Jalla nicju

čhjep jiiž žejlčiča. Nektan warcu zalz pecatča, Siria yoka ojkszjapa. Warcu tanawc cjen, Pabluquii quintu zizziča, judionacaquii niiž quintra parlassitaquiči, jalla nii. Jalla nižtiquiztan niiž warcuquiz ojksz cjitaquii nužquiz tijiči. Yokaranpacha ojksiči. Nektan Macedonia yoka irantichiča. ⁴Nižaza Pablužtan čica ojksiqui tinacatača: Sopatertača (niiqui Berea wajtchiztača), nižaza Aristarcutača, nižaza Segundutača (niiqui Tesalónica wajtchiztača), nižaza Gayutača (niiqui Derbe wajtchiztača), nižaza Timoteotača, nižaza Tiquicutača, nižaza Trofimutača. (Jalla Tiquicužtan Trofimužtan Asia provinciquiztantača). ⁵Jalla nii jilanacaquii wejtnaca tuquii okjaychiča. Jalla nuž okjayžcu Troas cjita wajtquin wejrnac tjewziča. ⁶Wejrnacquii ana liwaturchiz t'anta lujlz pijjsta paztan, Filipo cjita wajtquiztan zarakchinča tsjii warcuquiz. Tsjii pijjska tjuñquiztan Troas watja irantichinča. Jalla nicju kamchinča tsjii simana.

PABLUŽ KAMTA TROAS WAJTQUIN

⁷Dominguquii wejrnacquii ajczinča, Santa Cena paazjapa. Jalla nuž ajczcu Pabluquii tjaaajinčiča criichi jilanacžquiz. Jaka tažu zarakz cjen, čica aramacama tjaaajinčiča. ⁸Wejrnacquii tsewcta pisuquin ajczintača tsjii kjuyquiz. Kjanzjapa wacchi michanaca tjeestatača. ⁹Nižaza Eutico cjita tjowa ventanquiz julzi želatča. Pabluž ažkapacha čiiyan, nii tjowaquii ancha tjaji tjonkatchiča. Nektan nii ventanquiztan kossuc tjojtšiča, čhjep pisu kjuyquiztan. Ticzi waytitatača nii tjowaquii. ¹⁰Nektanaquii Pabluquii čhijwžquichiča. Nii tjowž juntuñ

chutjatžcu žcojrziča. Nekztanaqui parti jilanacžquin cjichiča:

—Anača tsucaquiča. Žejtča tiiqui.

¹¹ Jalla nekztanaqui Pabluqui wilta yawchiča tsewcta pisuquin. Nekztan Santa Cena paachiča. Jalla nuž paažcu, Pabluqui tirapan parličiča kjantatscama. Nekztan ojkičiča.

¹² Partinacazti zuma kuzta ecličiča. Nii tjowa vivož cjen, cuntintu nii tjowa chjitchiča.

¹³ Nekztanaqui wejrnacqui warcuquiz okjaychinča Asón yokacama. Pabluzti kjojchuñ ojcz pecatča. Asón wajtquiztan Pablo zakaz warcuquiz ojcz tantiichiča. Jalla nuž cjican kaztatača. ¹⁴ Nekztanaqui Asón wajtquin Pabluztan zalzinča. Nekztanaqui Pabluqui wejtnacatan chica warcuquiz luzziča. Nekztanaqui Mitilene kjutni ojkičinča.

¹⁵ Mitilenequiztan ojkan, jaka tažuqui Quofo latuquin watchinča. Kat tažuqui Samos cjita watja irantichinča. Nekztanaqui Trogilio cjita wajtquin jeejsassinča. Niiž jaka tažuqui Mileto cjita watja irantichinča. ¹⁶ Jalla nuž ojkičinča, Asia yokuin ana wacchi tjuñi žejljapa. Efeso wajtquin ana ojcz pecatča. Antiz Jerusalén watja apura ojcz pecatča Pabluqui. Jalla nicju irantis pecatča ima Pentecostés tjuñi tjonan. Jaknužquiztanami irantisquizpanž pecatča.

EFESO ICLIZ JILIRINACŽQUIN CHIIŽINTA

¹⁷ Mileto wajtquiz žejlcan, Pabluqui Efeso icliz jilirinaca kjawžquini cuchanchiča. ¹⁸ Jalla nii jilirinacaž tjontan, Pabluqui ninacžquiz tuž chiižinchiča:

—Weriž Asia yokquiz tjontan, nii tjuñquiztanpacha jaknužt ančhucatan chica kamtučhaja,

jalla nii ančhucqui zizza. ¹⁹ Jalla nuž ančhucatan kamcan, humilde kuzziz Yooz Jiliržquiz sirwichinča. Nižaza criichi žoñinacžquiztan wejt kuzquiz sint'itiquiztan ancha kaachinča, nižaza ancha pruebanacami sufrichinča. ²⁰ Tsjan zuma kamañchiz cjisjapa ančhucquiz tjapa zumanaca tjaajinčinča, tjup kuzziz. Plazquinami callquinami tjaajinčinča, nižaza ančhucata persun kjuyquiztan kjuya tjaajinčinča. ²¹ Nižaza judionacžquizimi ana judionacžquizimi paljaychinča wejrqui, tuž cjican: “Ančhucqui persun uj pajžcu, kuznaca campiya. Jesucristo Jiliržquin tjapa kuztan criya”. ²² Anziqui wejrqui Jerusalén watjal okača. Espiritu Santuž mantital okača. Jalla nicju čhjulut watačhaja, anal zizuča. ²³ Jalla tii puntukal zizuča. Tjapa watjaran weriž ojklayan Espiritu Santuqui wejtquiz chiichiča, tuž cjican: “Amqui carsilquiz chawctam cjequiča. Nižaza ancham sufraquiča”. ²⁴ Pero nii mazintiquiztanaqui wejr anal turwasnuča. Tii muntuquiz žejtjapa anaž importiča wejrqui. Wejt wiraqui anaž chekanaqui. Jesucristo Jilirž tjaata apóstol cargo, jalla nii cumplistanča chekanaqui. Yooziž tjaata kamañ jaru ojklayz pecuča, ticzcama. Liwriini Yooz taku parliz pecuča, Yooz zuma okžniča cjican.

²⁵ Yooz mantuquiz kamz puntuquiztan ančhucquiz mazzinča. Anziqui ančhucqui wejtta anaž iya zalaquiča tekztan nawjccuc. ²⁶ Jalla nižtquiztan ančhucquiz chiyuča, tuž cjican: Anaž jecmi ančhucquiztan wejtquin uj tjojtasača, tuž cjican: ²⁷ “Pabluqui anaž tjapa Yooziž tjaata taku tjaajinchiča” cjicanaqui. Wejrqui tjapa Yooziž tjaata takunaca

ančhucaquiz mazzinča. ²⁸ Jalla nižtiquiztanaqui ančhucqui persunpachquiz cwitaza, nižaza parti ančhuca iclizziz jilanaca cwitaquiča ančhucqui. Espíritu Santuqui ančhuc jiliriztakaz utchiča Yoozquin criichinaca cwitajo, nižaza Yooz tawk čheri tjaajo. Nii criichi jilanacz laycu Jesucristo Yoozqui niiz persun ljoc tawkchiča, cruzquiz ch'awczcu. Jaziqui criichi žoñinacača Jesucristužtaqui. ²⁹ Tsjii zakal zizuča. Weriž ojktan, yekja žoñinacaqui ančhucaquin tjonaquiča ančhuc wichanzjapa, nižaza ančhuca icliza akskatzjapa. Ninacaqui uuzi tanñi kitižtakaz luzcaquiča. ³⁰ Nižaza ančhucaquiztan toscara chiiñinaca želaquiča tsjii kjutñi criichi jilanaca chjitzjapa toscar tawkžtan. ³¹ Jaziqui ančhucqui zumpacha cwitaza. Wejrqui čhjep wata intiru majiñami weenami zapa mayni ančhucaquiz tjajinchinča. Nižaza ančhucaquiz chiichiižincan, ancha kaachinča. ³² Jaziqui jilanaca, ančhucqui Yoozquin cumpjiyuča. Nižaza Yooz zuma taku zumpachaž catoka. Jalla nuž cjen ančhucqui tjurt'iñi kuzziz cjequiča. Nekztan Yoozquiztan irinsa tanznaquiča tjapa Yooziž t'akžta žoñinacztan. ³³ Wejrpachača paazmi zquitimi anapan pecchintqui jeczquiztanami. ³⁴ Antiz wejrtča persun kjaržtan langziñtqui, čjulut pecatučhaja, jalla nijapa, nižaza wejttan chica ojklayñi žoñinaczjapami. Jalla nii puntuiztanaqui ančhucqui zumpachaž zizza. ³⁵ Jalla nužupan ančhucqui langz waquiziča, t'akjir žoñinaczquiz yanapzjapa. Jalla nuž kjana tjeezinča persuna langzcan. Nižaza Jesús Jilirž chiita taku cjuñzna. Jalla tuž cjiča nii chiitaqui: “Onanñi žoñinacaqui juc'ant cuntintuča tanzñi žoñinaczquiztanaqui”.

³⁶ Jalla nuž chiižcu, Pabluqui quillziča, tjapa nii žejlñi hermanonacztan, Yoozquin mayizizjapa. ³⁷ Jalla nekztanaqui tjapa nii jilanacaqui kaachiča Pabluž ojcz cjen. Pablo žcojzriča, nižaza chjulziča. ³⁸ Pabluqui cjichiča: —Wejrqui okača, jaziqui anaž iya wejr cheraquiča. —Jalla nižtiquiztan nii jilanacaqui ancha llaquita cjissiča. Jalla nekztanaqui warcu luzcama chica ojkiča.

PABLUQUI JERUSALEN WATJA OJKCHIČA

21 ¹ Jilanaca eccu, warcuquiz luzzinča. Nekztan Cos cjita yok tirichuc ojkinča. Jaka tažuqui Rodas cjita yokquin ojkinča. Jalla niwjctan Pátara cjita watja ojkinča. ² Jalla nii Pátara wajtquiztan tsjii Fenicia kjutñi ojknj warcu zalchinča. Nekztan nii warcuquiz luzcu ojkinča. ³ Jalla nuž ojkan Chipre cjita yoka ažkquin cherchinča. Chipre yokaqui zkar latuquintača. Tira ojkinča Siria yoka irantizcama. Tiro cjita wajtquiz kuzi ecz želan, nekztan Tiro watja luzziča. ⁴ Jalla nicju criichi jilanaca kjurchinča, zalañcama. Nekztanaqui ninacztan kamchinča tsjii simana. Ninacaqui Espíritu Santuž cjen chiikatchiča Pablužquiz, tuž cjican: —Amqui anatača ojczqui Jerusalén watja. ⁵ Simanaž wattan, Tiro wajtquiztan ulanchinča. Nižaza tjapa nii wajtchiz criichi žoñinacaqui maatakanacztanami ocjalanacztanami wejtnacaquiz cumpant'ichiča wajtž tjiya. Jalla nicju tsjii k'ara želatča, kot atquin. Nii k'arquiz quillžcu Yoozquin mayizassinča. ⁶ Nekztanaqui zumpacha kjara tansascu, jaljtassinča

“Kjažllami okall” cjican. Nekztanaqui wejrnacqui warcuquiz luzzinča. Ninacazti kjuya quejpcihiča.

⁷Nekztanaqui Tiro wajtquiztan zarakchinča, Tolemaida cjita watja irantiscama. Jalla nicju criichi jilanacžquin tsaani ojkcchinča. Jalla nekztanaqui tsjii nooj kamchinča nii jilanacžtan. ⁸Niž jaka tažuqui Pablužtan wejtnacatan ulanchinča. Nekztan Cesarea cjita watja irantichinča. Jalla nii wajtquiz irantižcu Felipž kjuya ojkcchinča. Jalla niitača liwriiñi Yooz taku parliñiqui jalla nii oficiuchiztača. Niž tuqui Jerusalenquin pakallaw k jilanaca illztatača, Yooztajapa langzjapa. Tsjiiqui nii Felipitača. Jalla niž kjuyquin kamchinča. ⁹Nii Felipiqui pajkpaltan ana zalzi tjunmatanacchiztača. Nižaza ninacaqui Yoozquiztan zizta taku parliñi profetanacatača. ¹⁰Jalla ninacž kjuyquin tsjii kjaž maj kamžcu, tsjii Agabo cjita žoñiqui tjonchiča Judea cjita yokquiztan. Nii žoñiqui Yooz taku parliñi profetatača. ¹¹Jalla nii žoñiqui wejrnac tjonžni tjonchiča. Nekztanaqui Pabluž jweranta kojch aptichiča. Nii kojchtan persun kjojcha kjara jwersiča tuž cjican:

—Espíritu Santuqui tuž cjiča: “Jalla nižtapacha Jerusalén wajtquin judío žoñinacaqui tii kojch tuyñi žoñi jweruaciča. Jalla nuž jweržcu, yekja wajtchiz žoñinacžquiz intirjaquiča”.
—Nuž cjichiča Agabo cjita profetaqui.

¹²Jalla nuž nonžcu, wejrnacmi nižaza nii Cesarea wajtchiz criichinacami tjappacha Pablužquiz rocassinča ana Jerusalén watja okajo.

¹³Pabluzti kjaaziča, tuž cjican:

—¿Kjažtiquiztan ančhuc kaajo?
¿Kjažtiquiztan ančhuc wejr
llaquizkatjo? Wejrqui Jesucristuž cjen

listuča čhejlta cjisjapami nižaza Jerusalén wajtquin ticzjapami.

¹⁴Jaziqui wejtnaca razunžtan Pabluž taku ana atipi atchinča. Jalla nuž cjen ana tira chiichinča. Tiikazza cjichinča:

—Yooz Jilirž munañpaj cjila.

¹⁵Jalla nekztanaqui ojczjapa tjaczinča. Nekztan Jerusalén wajt kjutñi ojkcchinča. ¹⁶Nižaza yekjap Yoozquin criichi jilanacaqui wejtnacaquiz cumpant'ichiča. Tsjii ninacžquiztan Mnasón cjita žoñi želatča. Niiqui Chipre cjita wajtchiz žoñitača. Ažk wata Yoozquin criichipantača. Niž kjuyquin alujazjapatača Jerusalén wajtquin.

PABLUQUI JACOBŽQUIZ TJONZIČHA

¹⁷Jerusalén watja irantižcu, Yoozquin criichi jilanacaqui wejrnac ancha cuntintu risiwt'ichiča. ¹⁸Niž jaka tažu Pabluqui wejtnacatan Jacobžquin tjonžni ojkcchiča. Jalla nicju tjapa nii Jerusalén icliz jilirinacaqui želatča. ¹⁹Pabluqui jilanacžquiz tsaanzcu, tjappacha niž ojklajta quint'ichiča. Yoozqui Pablužquiz wali pajk obranaca paakatchiča ana judío žoñinacž yokaran ojklayan. Jalla nii quint'ichiča Pabluqui. ²⁰Jalla nii takunaca nonžcuqui, Yooz honora chiichiča. Nižaza Pablužquiz cjichiča:

—Jila, walikazza niiqui. Nižaza tekzi tsjii kjaž warank judionacaqui Jesucristužquin criichizakazza. Jalla nii zizzamča. Nižaza tjapa ninacaqui cjichipancha, “Moisés lii jaru ojkanča” jalla nii. ²¹Nižaza ninacaqui nonziča tii quintu: Amqui yekja yokquin kamñi judionacžquiz tjajinñamča, “Moisés mantita lii ana cumplis waquiziča”, jalla nii.

Nižaza ninacaqui am puntuquiztan tuž nonziča: Amqui “Lucmajch wawanaca ana chimputa cjis waquiziča”, cjican tjaajinñamča. Nižaza amqui “Učhum judío cuzturumpinac jaru ana paaz waquiziča” cjican tjaajinñamča. Jalla nuž am puntuquiztan nonziča tekz žejlñi hermanonacaqui. ²² Anziqúi nii hermanonacaqui am tjonchi zizcu ajcznaquiča. Jaziqúi, čjaknužum cjeeqúi? ²³ Amqui jalla tužum paačhaj. Tii Jerusalén wajtquiz pajkpaltan žoñinaca žejlča. Ninacaqui compromitta taku cumplistanča. ²⁴ Amtan chica ninaca chjiča. Nekztan ninacžtan chica am učhum cuzturumpi paa. Nižaza ninacž gasto pacna, ninaca persun ach chara k'ala murta cjisjapa. Jalla nižtiquiztan tjappacha intintiskataquiča, amqui učhumnaca cuzturumpi ana quintrača, jalla nii. Jalla nuž chiichiñinacaqui toscara cjičaž cjequiča. Ampachazakazim učhum lii jaru paača. Jalla nuž intintaquiča tjappachaqui. ²⁵ Nižaza wejrnacqui nacjuñta wajtchiz ana judío criichinacžquiz cjičrinča, tuž cjican: “Žoñiž paata yoozquiz wilana jawkta chjizwi anača lujlsqui. Nižaza jora zkenzcu conta animal chjizwimi anača lujlsqui. Nižaza luctakžtanami maatakžtanami anača adulteriuquiz ojklayzqui”. —Jalla nuž Pablužquiz chiichiča nii icliz jilirinacaqui.

PABLUQUI PRESO TANTATAČHA

²⁶ Jalla nekztanaqui Pabluqui nii pajkpaltan žoñinaca chjitchiča. Niiž jaka tažuqui ninacžtan chica cuzturumpi paachiča. Nekztanaqui timpluquin luzziča čhjulorat nii cuzturumpi paaz tjuñinaca žerznachaja, jalla nii mazjapa. Nii cuzturumpi paaz tjuñinaca žerztan, Pabluqui persunjapami ninacžtajapami

ofrenda tjaastanča. Nii puntu zakaz timpluquin mazñi luzziča.

²⁷ Nii pakallawk cuzturumpi paaz tjuñinaca žeržmayatača. Jalla nii ora tsjii kjažt judionacaqui želatča Asia provinciquiztan tjonchi. Ninacaqui Pablo cherchiča timpluquiz žejlñi. Jalla nuž cheržcu, ninacaqui tjapa žoñinaca aptjapchiča Pabluž quintra. Nižaza Pablo tanzjapa jirchiča. ²⁸ Nekztan kjawchiča tuž cjican: —Israel wajtchiz žoñinaca. Yanapt'alla. Tiiča anawal žoñiqui. Tiiqui tjapa kjutñi ojklaycan, žoñinacžquiz tjaajiñča učhum nación quintrami, nižaza Moisés lii quintrami, nižaza tii timplu quintrami. Nižaza anziqúi tii timpluquiz ana judío žoñinaca chjitchiča. Jalla nižtiquiztan tii Yooz timplu quintraž paača. Učhum alajakazza tii arajpach Yooz timpluquiz luzpanqui. Ana judío žoñinacaqui ana luztanča. —Jalla nuž kjawchiča Pabluž quintra.

²⁹ Niiž tuquilla Pabluqui Trófimo cjita žoñžtan želatča. Trofimuqui Efeso wajtchiz žoñitača. Niiž pucultan chica cheržcu, nii judío žoñinacaqui tuž pinsatča, Pabluqui timpluquin nii Trófimo chjitchižlani, cjican. Jalla nižtiquiztan Pabluž quintra kjawchiča.

³⁰ Tjapa žoñinacaqui Pabluž quintra žawjchi tjojktichiča. Zati pariju tjonchiča timplu kjutñi. Nekztanaqui Pablo tanchiča. Timplu kjuyltan tanžcu zawncchuc joochiča. Nekztanaqui nii timplu zanami chawjczčiča. ³¹ Ninacaqui Pablo conzmayatača. Nekztan žoñinaca walja aptjapzi cjen, zultatž jiliržquin maztatača. ³² Jalla nii quinto zizcu, walja apura zultatunaca juntassiča ninacž sargentunacžtan. Nekztan zati pariju jirchiča jakziquin tama žoñinaca želatčaja, jalla

nicju. Nekztanaqui žoñinacaqui nii zultatunaca sargentunacžtanpacha cherchiča. Nuž cheržcu Pablo kijtž cjen nužquiz apatatchiča. ³³Jalla nekztanaqui nii zultatž jiliriqui macjatžcu Pablo preso tanchiča. Nižaza mantichiča, pizc carinžtan chelajo. Nekztanaqui žoñinacžquiz pewcziča:

—¿Ject teejo? ¿Čhjulu paachita tii žoñejo?

³⁴Nii žoñinacazti tjpaman puntunaca chiican kjawchiča. Ancha altu joržtan arnan, nii zultatž jiliriqui ana intintasi atatča. Jalla nižtiquiztan mantichiča, cuartilquin chjicha, cjican. ³⁵Zultatž cuartil guardanacžquiz macjatžcan, zultatunacaqui Pablo waytižcu chjitchiča, ana nii žoñinacžquiz kijchkatzjapa. ³⁶Niž wirquiz tama žoñinacaqui apzquichiča, kjaw jawi: —iTiczla tiiqui! iPanj ticzla! —cjican.

PABLUQUI PERSUNA TJTURT'ICHIČHA

³⁷Nekztanaqui Pabluqui cuartilquiz makawc cjen zultatž jiliržquiz paljaychiča, tuž cjican:

—Wejrqui tsjii chiiz pecuča. ¿Wejr chiyasaya?

Nekztanaqui nii zultatž jiliriqui kjaaziča tuž cjican:

—¿Amqui griego taku chiiñam jaa? ³⁸Jaziqui amqui anaž nii anawal egipt wajtchiz žoñimča. Niiqui ažk tjuñinaca gobiernuž quintr žoñinaca tjojtiskatchiča. Ch'ekti yokquin tsjii pajkpic warank guerrillero juntichiča gobierno niž puestuquiztan chjatkatzjapa. ¿Ana nii egipto žoñimya?

³⁹Nekztanaqui Pabluqui kjaaziča, tuž cjican:

—Wejrqui judío žoñtča. Cilicia cjita yokquin Tarso cjita wajtquin

nassinča wejrqui. Nii pajk wajtchiz žoñtča wejrqui. Jalla nižtiquiztan tii žoñinacžquiz paljayskatalla. —Nuž permiso maychiča.

⁴⁰Nekztanaqui zultatž jiliriqui permiso tjaachiča, žoñinacžquiz paljayajo. Nekztanaqui Pabluqui tsijtsiča nii gradanacuntuñ. Nižaza kjara waytižcu žoñinaca ch'ujquizkatchiča. Jalla nuž žoñinaca ch'ujquizkatžcu, Pabluqui hebreo tawkquiztan paljaychiča, tuž cjican:

22 ¹—Jilanaca, ejpnaca, wejrqui persunal tjurt'ača. Wejt takuž nonžna.

²Jalla nuž hebreo tawkžtan paljayan, walja ch'uj žejlchiča nii žoñinacaqui. Nekztanaqui Pabluqui paljaychiča, tuž cjican:

³—Wejrqui judío žoñtča. Nawjc Cilicia cjita yokquin Tarso cjita wajtquin nassinča. Pero tekzi tii Jerusalén wajtquiz pajkchinča. Gamaliel cjita maestruqui wejr tjaajinchiča, učum atchi ejpnacž tuquita lii jarupanča tjaajinchiqui. Nižaza wejrqui tjapa kuztan Yoozquin sirwiñpanča, jaknužt anchucqui tjapa kuztan učum cuzturumpi jaru paačhaja, jalla nuž.

⁴Tuquiqui wejrqui Yooz jiczquiz ojklayñi žoñinaca taniñtača, conañcama. Nižaza Yoozquin criichi luctaka cjiñimi maataka cjiñimi preso tanžcu, cheliñtača carsilquiz chawjckatzjapa.

⁵Nižaza timplu jilirinacami tjapa wajt jilirinacami zizza, weraral chiyuča, nii. Ninacaqui wejtquiz carta credencial tjaachiča, Damasco wajtquin učum judío jilanacžquiz tjeezjapa. Nekztan nicju ojkhinča, Yoozquin criichi žoñinaca tanzjapa. Tekzi Jerusalén wajtquiz zjižcžcu, casticz peccinča. Jalla tii weriž ojklayta puntuquiztanaqui tii Jerusalén jilirinacaqui kjanacama declarasača.

PABLUQUI JESUCRISTUŽTAN ZALCHIČHA

⁶“Carta credencial tanžcu, wejrqui Damasco watjal ojkhinča. Nižaza taypur ora irantiz cjen, tiripintit arajpachquiztan tsjii wali pajk ispijužtakaz kjanžquichiča wejt muytata. ⁷Wejrqui yokquin tjojtzinča. Jalla nuž tjojtžcu tsjii jora nonziča, tuž cjican: “Saulo, Saulo, ĺkjažtiquiztan am wejt quintramjo?” ⁸Jalla nekztanaqui wejrqui pewczinča, tuž cjican: “Wejt Jiliri, ĺject amya?” Jalla nekztanaqui wejtquiz kjaaziča, tuž cjican: “Wejrtča Jesusitqui. Nazaret wajtchiz žoñtča. Amqui wejt quintram paača”. ⁹Wejttan chica cumpant’iñi žoñinacaqui walja tsucchiča. Nižaza nii kjanžquiñi cherchizakazza. Pero nii wejtquiz chiizquiñi jora ana nonziča. ¹⁰Nekztanaqui wejrqui cjichinča: “Wejt Jiliri, ĺčhjulu wejr paajum cjii amya?” Nekztanaqui wejt Yooz Jiliriqui kjaaziča, tuž cjican: “Žaažna. Tiraka amqui Damasco watja oka. Jalla nekz amquiz mazinta cjequiča čhjulut paasalaj, jalla nii”. ¹¹Jalla nii kjanaž cjen zuranzinča. Jalla nekztanaqui wejt cumpant’iñi žoñinacaqui wejt kjarcu tanžcu Damasco watja irantizcama chjitchiča.

¹²Jalla nii wajtquin tsjii Ananías cjita žoñi želatča. Jalla niiqui Moisés lii jaru walja cumpliñitača. Nižaza tjapa nii Damasco wajtquin kamñi judionacami nii žoñž puntuquiztan “Zumapanča nii žoñiqui” cjiñitača. ¹³Nekztanaqui Ananiasqui wejtquiz tjonžni tjonchiča. Jalla nuž tjonžcu wejt latuquiz tsijtsiča. Nekztan wejtquiz cjichiča: “Saulo jila, wilta cherñim cjequiča”. Jalla nii orapacha wejrqui cherñi cjissinča. Nekztan Ananías kjutñi cherzinča. ¹⁴Jalla

nekztanaqui Ananiasqui wejtquiz cjichiča: “Tuquitantpacha učhum ejpnacž Yoozqui am illziča, niiž pinsita zizajo, nižaza niiž ancha zuma Majch cherajo, nižaza niiž jora nonžnajo. ¹⁵Nižaza amqui niiž puntuquiztan paljayaquiča tjapa tii muntuquiz žejlñi žoñinacžquiz. Nižaza ninacžquiz amiž chertanaca, nižaza amiž nonztanaca declaraquiča. ¹⁶Jaziqui apura žaažna, Yooz Jiliržquin tjapa kuztan cjee, am ujnaca pertunta cjisjapa. Nižaza bautista cjee”.

¹⁷Wiruñiqui Jerusalén watja quejpchinča. Jalla nuž quejpžcu, timpluquin ojkhinča Yoozquin mayizizjapa. Jalla nuž mayizican Yoozqui tsjii chjuužtažokaz wejt kuzquiz tjonskatchiča. ¹⁸Nekztan Yooz Jiliri cherchinča. Nižaza Yooz Jiliriqui wejtquiz cjichiča: “Tii Jerusalén wajtquiztan apura ulna. Amiž wejt puntuquiztan chiita takunaca anaž nonz pecča”. ¹⁹Nekztanaqui wejrqui cjichinča: “Wejt Jiliri, ninacaqui zizza weriž ojklaytanacaqui. Tjapa ajcz kjuyaran ojklayiñtača, amquin criichinaca kjurcan. Jalla nii criichinaca wachtiquiztan, wejrqui ninaca wajatkatchinča. ²⁰Nižaza am puntu declarñi Esteban conan, wejrqui nicju tsijtsi želatuča. Nižaza wejt kuzmi tjapa kuztača nii conan. Nižaza nii conñi žoñinacž zquitinaca cwitichinča”. ²¹Pero Yooz Jiliriqui wejtquiz chiižinčinča, tuž cjican: “Oka amqui. Ažkquin nacjuñta wajtchiz žoñinacžquin am cuchnača”.

PABLUŽTAN COMANDANTI JILIRŽTAN

²²Jalla niicama žoñinacaqui Pablų paljaya taku nonziča. Nekztanaqui kjawi kallantichiča, tuž cjican: —iTiczla tii žoñiqui! iAna žejtz waquiziča!

²³ Jalla nuž tirapan kjawcan, persun zquitinaca wewcwewczinchiča, polvo žketinchizakazza. ²⁴ Jalla nižtiquiztan zultatž jiliriqui mantichiča, Pablo cuartelquin majkžnajo. Nižaza mantichiča, Pablo wjajtžcu mazkatzjapa, “čKjažtiquiztan nii žoñinacaqui niž quintr nižta kjaw?” jalla nii puntuquiztan zizjapa. ²⁵ Pablo wjajtžjapa čhejlžtaž cjen, Pabluqui nekz žejlñi tenientižquiz paljaychiča, tuž cjican:

—Ima zumpacha zizcan, čtsjii roman žoñi wjajtž waquiziya? Anapaž waquiziča.

²⁶ Jalla nii taku nonžcu, nii tenientiqui niž comandantižquiz ojkičiča, nii puntu mazjapa. Jalla nekztanaqui tuž cjichiča:

—Tii žoñiqui roman žoñipanzača. Anaž čhjulumi nižtaqui kjaž cjila.

²⁷ Nekztanaqui nii comandante jiliriqui Pablužquin macjatžquichiča. Nekztan pewcziča, tuž cjican:

—čRoman žoñim panj amya?

Pabluqui kjaaziča, tuž cjican:

—Jesalla.

²⁸ Nekztan nii comandantiqui cjichiča:

—Wacchi paaz wejrqui pacchinpanča roman wajtchiz žoñi cjisjapaqui.

Nekztan Pabluqui kjaaziča, tuž cjican:

—Wejrqui nastiquiztanpacha roman wajtchiz žoñtča.

²⁹ Jalla nuž Pabluž taku nonžcu, nii Pablo wjajtajo mantita zultatunacaqui nužquiz wir kjutñi atziča. Nižaza Pablo roman žoñi zizcu, nii comandantiqui nii wjajtžjapa čhejlchiž cjen, tsucchi quirchiča.

PABLUQUI JUDIO JILIRINACŽQUIZ PRISINTISKATCHIČA

³⁰ Niiž jaka tažuqui nii comandantiqui ancha ziz pecatča

Pabluž puntuquiztan. Ultimu, čkjažtiquiztan nii judfo žoñinacaqui Pablo conkatz pecatjo? Jalla nekztan Pablo čhejlta carina apakžinchiča. Nižaza timplu chawc jilirinacami wajt jilirinacami juntjapznajo mantichiča. Jalla nuž juntjapztiquiztan nii comandantiqui Pablo ninacž yujcquin prisintisjapa chjitchiča.

23 ¹ Nekztanaqui Pabluqui nii ajczi jilirinacž kjutñi cherziča. Jalla nuž cheržcu, tuž cjichiča:

—Jilanaca, wejt kuzquiz zizuča, tii noojcama wejrqui Yooz yujcquiziqui walika kamchinča, nii.

² Nuž chiitiquiztan, Ananías cjita chawc jiliriqui Pabluž žcati žejlñi žoñžquiz mantichiča Pabluž atquiz kijchnajo.

³ Pabluzti kjaaziča, tuž cjican:

—Pizc kuzziz žoñi, Yoozqui am casticaquiča. Amqui tekz julzamča, učum lii jaru wejr jusjizjapa. Jaziqui, čkjažtiquiztan amqui učum lii quintr wejr kijchnajo mantichamtajo?

⁴ Jalla nii žejlñi žoñinacaqui kjaaziča, tuž cjican:

—čJalla nuž Yooz chawc jiliriqui chayskazkaya?

⁵ Nekztan Pabluqui cjichiča:

—Jilanaca, anal wejrqui zizatuča tiiqui Yooz chawc jilirižlaja, jalla nii. Cjijrta Yooz takuqui tuž cjicha: “Tsjii wajt jilirž quintraku anača chiizqui”.

⁶ Jalla nekztanaqui Pabluqui naaziča, parti ajczñi žoñinacaqui saduceo partiquiztantača, nižaza parti ajczñi žoñinacasti fariseo partiquiztantača. Jalla nižtiquiztan altu joržtan nii žoñinacžquiz paljaychiča, tuž cjican:

—Jilanaca, fariseo parti žoñtča wejrqui. Wejt familiaqui fariseo partizakazza. Tsjii noojiqui ticzi

žoñinacaqui jacatataquiĉha. Jalla nii tjuñi wejrzakal tjewznuĉha. Jalla nii puntuquiztan anĉhucqui wejr jusjiĉha.

⁷ Jalla nuž chiitiquiztan fariseo partinacžtan saduceo partinacžtan porapat aptjapziĉha. Nekztanaqui nii ajczñi žoñinacaqui t'akziĉha.

⁸ Nii saduceo žoñinacazti cjiñitaĉha, “Ticziquiztanaqui anaž wira jacatatasāĉha. Nižaza anaž anjilanacami zajranacami želasāĉha”, nuž cjiñitaĉha. Nii fariseo žoñinacazti jacatatp puntumi anjilanacž puntumi, zajranacž puntumi, tjapa nii puntunac criñitaĉha. ⁹ Jalla nižtiquiztan altu joržtan ch'aasi kallantichiĉha. Nekztan tsjii kjaž lii tjaañiñi maestronacaqui tsijtsiĉha. Ninacaqui fariseo partiquiztantaĉha. Ninacaqui paljayĉiĉha tuž cjican:

—Tii žoñžquiz ana ĉjul ujmi wachuĉha wejrnacqui. Cunamit tsjii anjilaĉha Pablužquiz chiižinchini, už ispiritužlaj tiižquiz chiižinchi.

¹⁰ Juc'ant juc'ant ch'aascan aptjapsiĉha. Jalla nuž cjen comandante jiliriqui eksnatĉha Pablo chjojritžta cjeĉhaj, jalla nii. Nekztan nii comandantiqui zultatunacžquiz mantichiĉha nii judionacž taypiquiztan Pablo jwescu wilta cuartilquin ĉjichajo.

¹¹ Niiž jaka zeztažu nii arama Yooz Jiliriqui Pablužquiz jeczquichiĉha, tuž cjican:

—Pablo, tjup kuzziz cjee. Jaknuž tii Jerusalén wajtquiz wejt puntuquiztan paljayĉhamžlaja, nižaza Rom wajtquin wejt puntuquiztan paljaystanĉha.

PABLO CONZ KAZTA

¹² Jalla niiž jaka tažuqui tsjii kjaž judfo žoñinacaqui Pablo conzjapa juramentužtan tsjii acuerduquiz asiptassiĉha. “Pablo ana ticznaquiz

niiqui, wejrnac conal cjeeĉha”. Nuž cjican asiptassiĉha. Nižaza ninacaqui palt'assiĉha ninacpora, tuž cjican:

—Anaž ĉjul ĉjherimi lujls, Pablo conaĉcama, —jalla nii.

¹³ Jalla nii parla asiptiñi žoñinacaqui pusi tunc jilataĉha. ¹⁴ Nižaza ninacaqui mazñi ojkcĉiĉha timplu ĉawc jilirinacžquinami nižaza wajt jilirinacžquinami. Ninacžquiz mazziĉha tuž cjican:

—Tsji acuerduquiz asiptassinĉha tuž cjican: “Pablo ana ticznaquiz niiqui, wejrnac conal cjeeĉha”. Nižaza palt'assinĉha wejrnacpora, tuž cjican: “Anaž jecmi ĉjul ĉjherimi lujls, Pablo conaĉcama”, jalla nii. ¹⁵ Jaziqui anĉhucqui parti jilirinacžtanami nii comandante jiliržquiztan nii Pablo mayaquiĉha, tuž cjican: “Wilta Pablo cuchanžcalla wejtnacaquin. Wejrnacqui Pabluž puntuquiztan tsjan zumpacha intintiz pecasuĉha”. Jalla nuž cjican Pablo mayaquiĉha. Wejrnacqui listuž cjeeĉha Pablo conzjapa. Ima anĉhucaquiz irantižcan, wejrnacqui nii Pablo conaĉha. —Jalla nuž cjichiĉha.

¹⁶ Jalla nekztanaqui Pabluž cullaca majĉhqui Pablo conz puntuquiztan nonziĉha. Jalla nii nonžcuqui cuartilquin ojkcĉiĉha Pablužquiz mazñi. ¹⁷ Nekztanaqui Pabluqui tsjii zultatž teniente kjawziĉha, tuž cjican: —Tii tjowa ĉjicha comandantižquin. Tiiqui quintuchizza.

¹⁸ Nekztanaqui nii teniente nii tjowa ĉjitchiĉha tuž cjican:

—Nii Pablo prisita žoñiqui wejr kjawziĉha. Nekztan wejtquiz ĉiichiĉha tii tjowa amquin ĉjichajo. Tiiqui amquiz quint'iz pecĉha.

¹⁹ Nekztan nii comandantiqui kjarcu tanžcu nii tjowa tsjii latu ĉjitchiĉha. Jalla nekztan pewcziĉha, tuž cjican:

—¿Chjulum amqui wejtquiz chiiz pecya?

²⁰ Jalla nektanaqui tjowaqui kjaaziča tuž cjican:

—Judío žoñinacaqui tsjii acuerduquiz asiptassiča. Jaka wenz amquiztan mayaquiča Pablo chjitzjapa judío jilirinacž yujcquin. Jalla tuž mañžtan mayaquiča, “Wejrnacqui Pabluž puntuquiztan tsjan zumpacha intintiz pecasuča”. Jalla nuž cjican mayaquiča. ²¹ Amzti ana ninacžquiz juyzu paaz waquiziča. Tsjii pusi tunc jil žoñinacaqui juramentužtan tsjii acuerduquiz asiptassiča, tuž cjican: “Pablo ana ticznaquiž niiqui, wejrnac contal cjeeča”. Nižaza ninacpora palt'assiča, tuž cjican: “Anača čjjeri lujls Pablo conañcama”. Nii žoñinacaqui čhjojziž tjewža Pablo irantisquizcama. Anzpacha listuča, amiž asiptita takukaz tjewža.

²² Jalla nii quintu nonžcu nii comandantiqui nii tjowa cuchanchiča. Nižaza mantichiča:

—Anaž ječžquizimi amiž quint'itaqui chiichiyaquiča, —jalla nuž cjican cuchanchiča.

PABLUQUI FELIX CJITA JILIRŽQUIN CUCHANTA

²³ Jalla nektanaqui nii comandantiqui pucultan teniente kjawziča. Jalla nuž kjawžcu tsjii ortina mantichiča, tuž cjican:

—Zultatunaca tuž tjaczna, paa patac zultatu kjojchiñ ojkñijapa, nižaza pakallawk tunca zultatu cawallquiz yawchi ojkñijapa, nižaza paa patac zultatu lanzižtan ojkñijapa. Ispir ora listu tjacžta cjequiča Cesarea watja ojkzjapa. ²⁴ Nižaza tsjii cawallu tjaczinaquiča Pablo yawchi chjitzjapa. Nižaza Pablo chjichaquiča ana čjulu kjaž cjižcu. Nektanaqui Félix cjita

chawc jiliržquiz intirjaquiča. —Jalla nuž mantichiča nii comandantiqui.

²⁵ Nižaza nii Pablo chjichñi zultatunacžtan tsjii carta apaychiča, tuž cjican:

²⁶ “Al señor excelentísimo chawc jiliri Félix: Wejrqui amquin tsaanuča; Claudio Lisias wejrtča. ²⁷ Judío žoñinacaqui tii žoñi preso tanchiča. Nižaza konz cjichitakalča. Jalla tiiqui roman žoñiča. Jalla nii zizcu, wejrqui zultatunacžtan ojkchinča, tii liwrii. Wejr irantan, judío žoñinacaqui tii konzmayatača. ²⁸ Wejrqui ziz pecatuča, ultim u kjažtiqiztan nii judío žoñinacaqui tii conkatz pecatjo, jalla nii. Nižtiqiztan judío jilirinacž yujcquin chjitchinča.

²⁹ Nektanaqui zizzinča nii judionacž lii puntuquiztankaz tii quintra uj tjojtunchiča. Anaž konz razunami nižaza ana carsilquiz chawjcz razunami želatča tii judionacžquiztanaqui. ³⁰ Jalla nektanaqui nii judío žoñinacaqui tsjii acuerduquiz asiptassitakalča tii Pablo konzjapa. Jalla nii zizcu, nektan wejrqui amquin apura cuchanžcuča. Nižaza nižta quintra žoñinacžquiz mantichinča, am yujcquiz parlajo, čjul puntuquiztan quintra aptazaja, jalla nii. Jalla nužukazza”.

³¹ Jalla nektanaqui ortin jaru zultatunacaqui ween Pablo chjitchiča, Antípatris cjita watjacama. ³² Niž jaka tažuqui kjojchiñ ojkñi zultatunacaqui cuartilquin quejpžquichiča. Cawallquiz ojkñi zultatunacakaz tira Pablužtan ojkchiča. ³³ Cesarea watja irantižcu, carta tjaachiča chawc jiliržquiz. Nižaza nii jiliržquiz Pablo intirjichiča. ³⁴ Carta liižcu, nii chawc jiliri Pablo pewcziča, jakzi wajtchiz žoñitažlaja, jalla nii. Cilicia wajtchiz žoñi, nii zizcu, ³⁵ tuž cjichiča:

—Am quintra aptazñi žoñinacaž tjonchiž cjen, am puntuquiztanaqui wejrqui atintača.

Nekztanaqui nii jiliriqui mantichiča Herodes pajk kjuyquiz Pablo zuma wijilta želajo.

PABLUQUI FELIX YUJCQUIZ PRISINTIČIČA

24 ¹Nekztan pjjska tjuñquiztan, Ananías cjita timplu chawc jiliriqui Cesarea watja irantichiča Jerusalén wajt jilirinacžtanami nižaza tsjii Tértulo cjita tjurt'ižiñi awjatžtan. Jalla ninacaqui chawc jilirž yujcquin prisintichiča Pabluž quintra chawc uj tjojtunzjapa. ²Tsjii audiencia cjetžtanaqui jilirž yujcquiz Pablo chjichtatača. Nekztan nii Tértulo tjurt'ižiñi awjatuqui Pabluž quintra chii kallantichiča tuž cjican:

—Wejt excelentísimo chawc jiliri: Walikazza wejt watjaqui, nižaza cuntintu kamasuča. Sparaquiča amquin. Am walja zizñiž cjen zuma irpiñamča wejnacaquiz. Čhjul necesidad žejlčhaja, jalla nii atintichamča. ³Tjapa watjanacquin amiž uchta obranacquiztan ancha sparaquiž cjiwča, zuma excelentísimo Félix. Nižaza tjapa žoñinacaqui nuž amquiz sparaquiča cjiñipanča. ⁴Wejrqui am ana ancha molistis pecuča, tii puntuquiztankaz am atintalla. Nižaza tsjii ratu wejt taku nonžnalla. ⁵Nuc ažka kamcan, wejrnacqui zizzinča, tii žoñiqui wira anawalipanča. Nižaza tjapa kjutñi judío žoñinacaž aptjapčha, t'aka t'aka. Nižaza tiiqui walja achača nii nazaren cjita t'akquiztan. ⁶Nižaza wejnaca timpluquin yekja wajtchiz žoñi luskatz yanchiča. Jalla nižta anawalipanča. Jalla nižtiquiztan wejrnacqui tii preso tanchinča. Nižaza wejtnac lii

jaru tii žoñi casticskatz pecatuča.

⁷Nii Lisias cjita comandantizti fuerziižcu wejtnacaquiz mitissiča. Tama zultatunacžtan tii kjañchiča.

⁸Nekztanaqui nii comandantiqui wejrnacqui tii žoñž uj tjeezjapa tekzi am yujcquiz tjonkatčha. Jazic amza tii pewczna. Jalla nekztanaqui tiižquiztanpacha zizaquiča wejrnaca ultim werara chiichinča, wejtnacaž tjojunta uj puntuquiztan zumpacha zizaquiča. Tii žoñiqui walja ujchizza.

⁹Nii žejlñi judío žoñinacaqui cjichizakazza:

—Tiiž chiita takunaca werarača.

¹⁰Nekztanaqui nii chawc jiliriqui kjara waytižcu Pablo chiikatchiča. Jalla nuž cjen Pablo paljaychiča, tuž cjican:

—Nuc ažk wata tekz tii nacionquiz amqui jiliri tsjitsamča. Jaziquiz wejrqui ancha cuntintuča am yujcquiz tjurt'izjapaqui wejt puntuquiztan.

¹¹Ampacham wejt puntuquiztan averiguasača. Tuncapan tjuñikaz veriž irantisquitaqui, nii Jerusalén wajtquin Yoozquin sirwizjapa tjonchintača.

¹²Anaž jec žoñimi wejr žoñžtan ch'assñi cherchiqui, nižaza wejrqui ana žoñinaca aptjapchinča, Jerusalén wajtquizimi. ¹³Tii wejt quintra žoñinacaqui anaž čhjul ujmi amquiz tjeežñi atča. ¹⁴Jalla tiiča ultim weraraqui. Wejrqui wejtnac ejpnacž Yoozpacha sirwuča Yooziž tjeežta kamaña jaru. Jalla nii Yooz kamañaqui yekjaž t'aka cjiča tinacaqui. Nižaza wejrqui criyuča tjapa Moisés cjiirta liimi, nižaza tjapa profetž cjiirta Yooz takunacami. ¹⁵Nižaza criyuča Yoozqui ticziquiztan jacatatskataquiča zuma kamñi žoñimi ana zuma kamñi žoñimi. Jalla nii jacatatz tjuñi tjewznuča, tinacami nižazakaz tjewža. ¹⁶Jalla nuž tjewžcan, Yooz yujcquizimi

žoňž yujcquizimi wejt kuz zuma iwjt'ican persunpacha cwitasuĉha, ana ujchiz cjisjapa.

¹⁷Tsjii kjaž watanaca yekja nacionaran wejr cjklajžquichinĉha. Jalla nuž ojklajžcu wejrqui wejt persun yoka quejpcchinĉha, limosnami ofrendanacami timpluquin uchjapa.

¹⁸Jalla nuž paan, tsjii kjaž Asia provinciaquiztan tjonchi judionacaqui wejttaan zalchiĉha. Timpluquin žejlchinĉha judíož cutzturumpi jaru paacan. Timpluquin žoñinacaqui anataĉha wacĉhi, nižaza anataĉha ĉhjulumi aptazzi. ¹⁹Jalla nii Asiaquiztan tjonchi judionacaqui jalla ninacžla tekziui am yujcquiz prisintisquizlani wejt quintraqui, ĉhjul uj paatuĉhaja, jalla nii. Ninacaqui tsjii uj tjeeznaĉhaj niiqui, tekz am yujcquiz tjeežla. ²⁰Jalla nii ana atchucažlaj niiqui, tii žejlñi žoñinacaj weriž paata uj kjanacama chiilalla. Wejr judío jilirinacž yujcquiz želan, uj paachinžlaj niiqui kjanaj chiilalla. ²¹Judío jilirinacž yujcquiz žejlcan, tiikaz altu joržtan chiichinĉha: “Ticziquiztan jacatatž tjuñi tjewznuĉha. Jalla nižtiquiztan tonj anĉhucqui wejr jusjiĉha”. Jalla niikazza weriž čiitaqui. —Nuž cjican Pabluqui čiichiĉha.

²²Jalla nuž nonžcu, Félix chawc jiliriqui nii cjetžta audiencia nužquiz suspintiskatchiĉha. Nii jiliriqui Yooz jicz puntuquiztan zuma zizziĉha. Jalla nižtiquiztan Pabluž quintra žoñinacžquiziqui ana juyzu paachiĉha. Nekztan cjichiĉha:

—Ĉhjlorat Lisias comandante tjonacĉhaja, jalla nekztanž tii anĉhuca ujiaqui wilta atintita cjequiĉha. Nii nooj azquitzta cjequiĉha.

²³Nekztanaqui Félix chawc jiliriqui teniente capitanzquin mantichiĉha Pablo tira kjuyquiz chawjcta cwitajo.

Pero Pabluž amigonacžquiz permiso tjaachiĉha, Pablo atintizjapa.

²⁴Tsjii kjaž majquiztan Félix chawc jiliriqui Drusila cjiti tjunatan tjonžquichiĉha Pabluž taku nonzjapa. Jalla naaqui judioquiztan žontaĉha. Nekztanaqui Pablo kjawzñi mantichiĉha. Niiž yujcquiz prisintižcu, Pabluqui Jesucristužquin kuzziz puntuquiztan paljaychiĉha. ²⁵Nii jiliriž nonznan, Pabluqui parličiĉha tii ĉhjep puntuquiztan: Yooz zuma kamaña puntuquiztan, nižaza persun kuz zuma irpiz puntuquiztan, nižaza Yooz casticž tjuñi puntuquiztan. Jalla nii parlita nonžcu Félix chawc jiliriqui muzpa tsucchiĉha. Nekztanaqui cjichiĉha:

—Oka amqui. Wejttaž timpu želan, wilta am kjawznaĉha.

²⁶Félix chawc jiliriqui “paaz pac jaa” cjican jalla nuž Pablužquiztan pecatĉha. Paaz pactiquiztan Pabluqui cuctaž cjitasaĉha. Jalla nižtiquiztan nii jiliriqui kjaž wilta Pablo kjaw kjawatĉha, “Cunamiž paaz pacasa jaa” cjican. Pablo kjawžcu, niižtan parličiĉha. ²⁷Félix jiliriqui judionacž kuz wali cjiskats pecatĉha. Jalla nižtiquiztan Pablo preso ecchiĉha. Pizc wata nuž watchiĉha. Jalla nekztanaqui Félix chawc jiliriqui niiž puestuquiztan ulanchiĉha. Nii puestuquiz tsjiizuñ luzziĉha, Porcio Festo cjita tjuuchiztaĉha.

PABLUQUI FESTUŽ YUJCQUIZ PRISINTIČIĤA

25 ¹Festuqui chawc jilirž puestuquiz luzcu, niiž ĉhjep majquiztan Cesarea wajtquiztan Jerusalén watja ojkcĉiĉha. ²Jalla nicju timplu chawc jilirinacami walja acha wajt jilirinacami, jalla ninacaqui Pabluž quintra quijchiĉha. ³Nižaza rocchiĉha:

—Tsjii fatora paalla —cjican. —Tii Jerusalén watja Pablo cuchanzcalla.

Nii oraqui ninacž kuzquiz pinsichiča, Pablo jiczquiz tjonan conzjapa. ⁴Nekztanaqui Festo chawc jiliriqui kjaaziča, tuž cjan:

—Pabluqui Cesarea wajtquin preso žejlča. Tsjii kjaž majquiztan wejrpachal quepača nicju. ⁵Jaziqui ančuca jilirinacaqui wejttan chica Cesarea ojkla. Jalla nicju nii žoñiqui ujchizpanžlaj niiqui, jalla niiz uj tjeezpanikazza ančucalaqui.

⁶Nii Festo jiliriqui quinsakal tjuñžlaj už tunca tjuñžlaj, jalla nuž žejlchiča Jerusalén wajtquiz. Jalla nekztanaqui Cesarea watja quejpchiča. Niiž jaka tažuui niiz jusjiz oficinquiz luzziča. Jalla nekztan Pablo zjijcajo mantichiča. ⁷Pablo zjijctiquiztan Jerusalén wajtquiztan tjonchi judionacaqui jusjiz oficinquiz luzzizakazza. Pabluž muytata tsijtscu, wali chawc ujnaca tjojtunchiča. Pero ana čjul uj tjeezni atchiča.

⁸Jalla nekztanaqui Pabluqui persuna tjurt'ican takunaca chiichiča, tuž cjan:

—Wejrqui ana čjul ujmi paachinpanča, ana judionacž lii quintrami, nižaza ana timplu quintrami, nižaza ana roman chawc jilirž quintrami. Anapan uj paachinča.

⁹Nekztanaqui Festo jiliriqui judionacž kuz wali cjiskatzjapa tsjii favora paaz pecatča. Jalla nižtiquiztan Pablužquiz pewcziča, tuž cjan:

—¿Jerusalén watjam okasaya? Jalla nicju am quintra quijta puntuquiztan atintasača.

¹⁰Jalla nižtiquiztan Pabluqui kjaaziča, tuž cjan:

—Roman chawc jilirž jusjiz oficinquiz želuča. Tekzpacha wejrqui jusjita cjistanča. Amqui zumpacham zizza wejt puntuquiztan. Wejrqui ana čjul ujmi paachinča tii

judionacž quintrami. ¹¹Jaziqui wejrqui ujchizpančhalaj niiqui, casticta cjis anal jiwjatuča. Nižaza uj paachiž cjen ticz waquizičhaj niiqui, ticzmi anal jiwjatuča. Pero wejt quintra tjojtunta ujnacami ultimu ana tjeezkattača. Nižtiquiztan anaž nii judionacž kjarquiz wejr intirjita cjesača. Jaziqui roman chawc jiliržquinpan watz mayuča wejt puntuquiztan zumpacha arreglita cjisjapa.

¹²Jalla nekztanaqui Festo jiliriqui niiz tantiñinacžtan palt'ichiča. Jalla nuž palt'ižcu, Pablužquiz chiichiča, tuž cjan:

—Amqui roman chawc jiliržquin watz maychamča. Jaziqui jalla nii jiliržquinpanikam watačhani.

PABLUQUI AGRIPŽ YUJCQUIZ PRISINTIČIČA

¹³Jalla tsjii kjaž majquiztan tsjii Agripa cjita chawc jiliriqui Cesarea watja tjonchiča Berenice cjiti tjunatan. Jalla ninacaqui tjonchiča Festo tsaanzjapa. ¹⁴Jalla nicju tsjii kjaž maj kaman Festo jiliriqui ninacžquiz quint'ichiča Pabluž puntuquiztan, tuž cjan:

—Tekz tsjii pres žoñi žejlča, Félix jiliržquiztanpacha. ¹⁵Wejrqui Jerusalén wajtquiz želan, timplu jilirinacami wajt jilirinacami jalla ninacaqui tii žoñž quintra quijchiča. Ninacaqui wejtquiz tii žoñi conkatz pecatča. ¹⁶Jalla nižtiquiztan wejrqui kjaazinča tuž cjan: “Romanž liiqui tuž cjiča: Quijta žoñžtan quijni žoñžtan pucultan declarskatzpanikazza, čjulut watčaja, jalla nii. Nekztan nii quijta žoñiqui persun takunacžtan tjurt'asača werarquiztanaqui. Nekztan chawc ujchizlaj niiqui, contaž cjesača”.

¹⁷Jalla nižtiquiztan ninacaž tiwc tjonchiž cjen, ana timpu pertižcu, niiz

jaka tažuqui quija atintichinča wejt jusjiz oficinquiz. Nii quijta žoñi zjiycajo mantižcu zuma atintichinča. ¹⁸Nii quijñi žoñinacaqui prisintichizakazza. Wejrqui pinsichintača, ninacac chawc uppan nii žoñžquiz tjeeznaa, cjan. Ultimu ninacazti ana čhjul chawc ujmi tjeezkati atchiča. ¹⁹Nii žoñž quintra chiichiča religiún puntuquiztankaz. Tsjii Jesusa cjita žoñiqui ticziča. Pabluzti “Žejtča niiqui” cjiñitakalča. ²⁰Wejrqui nižta quija atintizjapa anal zuma zizatuča. Jalla nižtiquiztan Pablužquiz pewczinča, tuž cjan: “¿Jerusalén watja okasay? Jalla nicju tii am quintra quij puntuquiztan atintasača”. Jalla nuž chiichinča wejrqui. ²¹Jalla nekztanaqui niiqui maychiča roman chawc jiliržquin watzjapa. Jalla nižtiquiztan Augusto cjita chawc jiliržquin watajo mantichinča. Nižaza tirapan preso želajo mantichinča, čhjulorat chawc jiliržquin mantichuca cječhaja, jalla niicama.

²²Jalla nekztanaqui Agripa jiliriqui Festo jiliržquiz cjichiča:

—Wejrakal nii žoñž razuna nonz pecuča.

Festo jiliriqui kjaaziča, tuž cjan:

—Jakapacham nonznaquiča.

²³Niiž jaka tažuqui Agripa cjita jiliriqui Berenice cjiti tjunatan pajk audiencia kjuyquin luzquichiča, ancha zuma honorchiz. Zultatž jilirinacžtanami wajt jilirinacžtanami luzzizakazza. Nekztanaqui Festo jiliriqui Pablo zjiycajo mantichiča.

²⁴Pablo zjijectiquiztan Festo jiliriqui tuž paljaychiča:

—Agripa chawc jiliri, nižaza tekz ajczi zuma žoñinaca. Tekziča tii žoñiqui. Walja judionacaqui tii žoñž quintra chiichiča Jerusalén wajtquinami tii Cesarea wajtquizimi.

Jalla ninacaqui wejr rocrocchiča tii žoñi conzjapa, “Tii žoñiqui ana žejtz waquiziča” cjan. ²⁵Wejrpacha tii zuma pewcpewczcu, anapan čhjul uj wači atchinča, ticzkatajo. Nižaza tiiqui roman chawc jiliržquin watz maychiča jusjita cjeajo. Jalla nuž maytiquiztan tantiižcu, watajo mantichinča. ²⁶Wejrqui roman chawc jiliržquin čhjul puntut tii žoñž puntuquiztanaqui cijiras? Anal zizuča. Jalla nižtiquiztan am yujcquiz prisintiskatuča, señor Agripa, wejt chawc jiliri. Nižaza tjapa ančhucquiz prisintiskatuča. Jaziqi ančhucqui tii žoñi zumpachaž pewczina. Nekztan wejrqui aptačhani čhjul puntut cijiras, nii. ²⁷Tii pres žoñž quintra puntuquiztan kjanapacha cijrzw waquiziča. Ana nižta cijiraquiz niiqui, anapal cuchni atasacha. —Jalla nuž paljaychiča Festo jiliriqui.

PABLUQUI TJURT'IÑI TAKUNACA WILTA CHIICHIČA

26 ¹Jalla nekztanaqui Agripa jiliriqui Pablužquiz tuž cjichiča:

—Amqui am persunquiztan zuma tjurt'iz taku chiya.

Jalla nekztanaqui Pabluqui kjara chjinžcu paljayi kallantichiča, tuž cjan:

²—Excelentísimo Agripa, chawc jiliri, ancha cuntintuča wejrqui, am yujcquiz wejt puntunaca werara chiizjapa. Judío žoñinacaqui wejt quintra ujnaca tjojtunchiča. Jaknižlaj nii werara chiyasača.

³Amqui tjappacha učum judionacž cuzzurumpinaca zumam zizza. Nižaza učumpora čhjul puntu ch'aasaj, nii ch'aastanacami zizza amqui. Jalla nižtiquiztanaqui wejrqui ancha cuntintuča, am yujcquiz

tjurt'izjapaqui. Zuma pasinsistanž nonžnalla.

⁴Tjapa judionacaqui weriž kamta zizza. Wejt yokquiz ojklajtami nižaza Jerusalén wajtquiz ojklajtami jaknuž ocjalquiztanpacha kamiñtažlaja, nii zizza tjapa judionacaqui. Ninacžtan kamiñtača. ⁵Tjowanstiquiztanpacha fariseo t'akquiz željchinča. Nii fariseo t'akaqui učum judionacž lii jarupan walja estricto kamñiča yekja judionacž t'akanacquiztan cjenami. Jalla nii ažktan zizza nii wejt quintra judionacaqui. Jaziqui ninacakaj declarla, declarz pecčaj niiqui. ⁶Tuquiqui Yoozqui učum tuquita ejpnacžquiz taku ecchiča, ticziquiztan jacatatz puntu, jalla nii. Jalla nii jacatatzpan tjewznuča. Jalla nuž weriž tjewztiquiztan, judionacaqui wejt quintra quijchiča. ⁷Pero Israel wajtquiziqui wejtnac tuncapan t'akanacaqui Yooziž ecta taku cumplis zakaz tjewža. Jalla nižtiquiztan Yoozquin rispitñiča, nižaza majiñami weenami nižžquin sirwiča. Wejt chawc jiliri, jalla niipan tjewzñiž cjen judionacaqui wejt quintra tjojtikiča. ⁸Ančhucmi zakaz criičani, Yoozqui ticziquiztan žoñinaca jacatatzquiča, nii.

⁹Tuquiqui wejrqui pinsiñtača, nii Nazaret wajtchiz Jesusižžquin criichi žoñinacž quintra čhjul anawalinacami paaz waquiziča. ¹⁰Jalla nuž wejrqui criichinacž quintra anawalinaca paachinča Jerusalén wajtquin. Učum timplu jilirinacž mantita jaru walja criichinaca carsilquiz chawjescatchinča. Nižaza criichinaca conajo, wejr zakal taku utchinča. ¹¹Nižaza kjaž wilta criichi žoñinaca sufriskatchinča, Jesucristuž quintra chikatatzjapa, nižaza Jesucristužquiztan quejpskatzjapa. Wejrqui nižtapacha

paachinča judionacž ajcz kjuyquizimi. Nižaza walja žawjwiñtača nii criichinacž kjutñi. Jalla nuž žawjžcu wejrqui criichinaca tani ojklayiñtača yekja watjaranami.

¹²Jalla nijapa Damasco watja ojkcchinča, timplu chawc jilirinacž mantita jaru. Nižaza ninacaqui wejtquiz carta credencial tjaachiča, nii criichi žoñinaca tanzjapa.

¹³Jiczquiz okan, taypur ora tiripintit arajpachquiztan tsjii wali pajk ispijužtakaz kjanžquichiča, tjuñ siiquiztan juc'anti. Wejt muytatami wejt cumpant'iñi žoñinacž muytatami kjanchiča. ¹⁴Niiž cjen, wejrnacqui yokquiz tsucaña tjojtsinča. Nekztanaqui wejrqui tsjii jora nonzinča. Hebreo tawkquiztan wejtquiz paljayžquichiča, tuž cjican: “Saulo, Saulo, čkjažtiquiztan am wejt quintramjo? Ampacha persun quintra paača. Tsjii wacaqui ar parž quintra llawkžcu, persun janchiž quintra paača, jalla nižta irata am persun quintra paača”. Jalla nuž paljayžquichiča nii tsewctan chiiñi joraqui. ¹⁵Nekztanaqui wejrqui pewczinča, tuž cjican: “Wejt Jiliri, čject amya?” Nekztan Yooz Jiliriqui wejtquiz cjichiča: “Wejrtča Jesusitqui. Amqui wejt quintram paača. Wejrtča niitqui. ¹⁶Žaažna. Tsijsna. Amqui wejr sirwaquiča. Nižaza tii amiž chertanacami declaraquiča muzpa žoñinacžquiziqui. Wiruñaqu iyam cheraquiča wejt puntuquiztan. Jalla nekztan tjapa wejt puntuquiztan parlaquiča. Jalla nižtajapa am illzinča. Jalla nuž cjen amquiz pariscuča. ¹⁷Jaziqui am cuchnača ana judfo žoñinacžžquin wejt puntuquiztan parližcajo. Nekztanaqui amiž parlan, wejrqui am cwitača, judionacžquiztanami, nižaza nacjuñta

žoñinacžquiztanami. ¹⁸Nacjuñta žoñinacžquiz am cuchnača, wejt puntuquiztan parlajo. Jalla nuž amiž parlitiquiztan nii žoñinacž kuzqui cjetžintaž cjequiča wejt puntu intintazajo, nižaza ana zumchiquiz kamajo, antiz zuma kamañquiz kamzjapa. Nižaza amiž parlitiquiztan ninacaqui liwriita cjequiča, Satanás cjita diabluž mantita jaru ana ojklajajo, antiz Yooz mantita jaru ojklajajo. Nižaza wejtquin criyaquiča, ninacž ujnaca pertunta cjisjapa, nižaza Yooz kamaña tanzjapa parti Yooz illzta žoñinacžtan”.

¹⁹‘Nekztanaqui, Agripa chawc jiliri, nii arajpachquiztan paljayta takunaca catokchinča, nii jaru kamzjapa. ²⁰Primiraqui Damasco wajtquin žejlñi žoñinacžquiz liwriiñi Yooz taku parli kallantichinča. Nekztanaqui Jerusalén wajtquin nii Yooz taku parlichinzakazza. Niiž jaru Judea yokaran parlichinča. Niiž jaru nacjuñta žoñinacžquin Yooz taku parlichinča. Judío žoñinacžquizimi ana judío žoñinacžquizimi tjappachquiz parlichinča, ninacž kuznaca campiyajo, Yooz sirwiz quejpnajo, nižaza Yoozquin quejptiquiztan zuma kamaña tjeežnajo. ²¹Jalla nižta Yooz takunaca parlitiquiztan judío žoñinacaqui wejr preso tanchiča timpluquiz, wejr conajo. ²²Anzcama Yoozqui wejr yanapča. Jalla nižtiquiztan wejrqui tjurt'iñi kuzziz tii zuma Yooz taku paruča humilde žoñinacžquizimi pajk jilirinacžquizimi. Tuquitan Yooz taku parliñi profetž chiita tawk jaru nižaza Moisés chiita tawk jaru, jalla niicama paruča. Jalla ninacaqui mazinchiča, tuž cjican: ²³“Cristuqui sufristanča ticzama. Nekztan ticziquiztan jacatatstanča. Jalla niiqui

primer ticziquiztan jacatatchi žoñiča. Jalla nii Jesucristuž cjen tii zuma liwriiñi Yooz takuqui parlitapantača ućhum wajtchiz žoñinacžquizimi yekja wajtchiz žoñinacžquizimi”. Jalla nii liwriiñi taku zaka wejr paruča.

PABLUQUI AGRIPŽQUIZ CHIIŽINCHIČA

²⁴Pablo jalla nuž tjurt'iñi taku paljayan, Festo jiliriqui altu tawkžtan cjichiča:

—Pablo, ilucuratažtakazza amqui! Zmali istuižcu, jalla nižtiquiztan lucurata cjissamćhalani amqui.

²⁵Pabluqui kjaaziča, tuz cjican: —Festo, zuma chawc jiliri. iWejrqui anača lucuratqui! Antiz weriž paljayta takunacača razunaqui, nižaza werarača. ²⁶Tekzimi Agripa chawc jilirim žejlča. Niimi zumaž tii puntuquiztan zizza. Jalla nižtiquiztan wejrqui tjup kuztan tiiž yujcquiz chiižinuča. Tii Agripa chawc jiliriqui tjapa weriž paljayta puntunacaqui zizzipanja. Nižaza tii puntunacaqui watchiča tjapa žoñinacaž zizan, anača tsjii chjojzak watchi quintu. ²⁷Señor Agripa, chawc jiliri, ¿profetaž parlita takum crija? Amqui criiž caa kal cjiwchiya.

²⁸Agripa chawc jiliriqui Pablužquiz kjaaziča, tuž cjican:

—¿Tsji koluc takunacžtankam wejr cristiano cjiskatz pecya?

²⁹Nekztanaqui Pabluqui cjichiča:

—Tsji kjaž takunacžtan už wacchi takunacžtan wejrqui anćhuc tuž cristiano cjiskatz pecuča. Ammi nižaza tjapa tonj nonžñi žoñinacami wejr irataj cjisla. Jalla nuž Yooz munañpaj cjeequi. Wejr irata Yoozquin criichej cjisla, pero ana tižta carinžtan mokta.

³⁰Jalla nuž Pabluž chiitan, tjappacha nii julzi žejlñi jilirinacaqui tsjitsiča,

Agripa chawc jilirimi, nižaza Festo jilirimi, nižaza Berenice cjiti tjunmi.

³¹Nekztanaqui ninacaqui Pabluž puntuquiztan parlizjapa tsjii latu ojkchiča ninaccama palt'i. Jalla nekztanaqui ninaccama kazziča:

—Tii žoñiqui ana čjul ujmi paachiča, conkatajo. Anaž conta cjesača. Nižaza anaž carsilquizimi chawjcta cjesača.

³²Nižaza Agripa chawc jiliriqui Festo jiliržquiz cjichiča:

—Tii žoñiqui ana roman jiliržquin watz maytasaz niiqui, cuttaz cjitasača.

PABLUŽ QUIJAQUI ROMA TJATŽTAČHA

27 ¹Jalla nekztanaqui nii jilirinacaqui tantiichiča, Pabluž quija roman chawc jiliržquin tjatzjapa. Jalla nižtiquiztan Pablumi parti presonacami intirjitatača tsjii Julio cjita capitanžquiz, Italia watja chjitzjapa. Nii capitanaqui Augusto cjita batalionquiztan jiliritača. Wejrqui Pablužquiz cumpant'ichinča. ²Adramitio cjita wajtquiz tsjii warcu želatča. Nii oraqui nii warcuqui ojkzpachatača Asia kjutñi. Jalla nuž cjen nii warcuquiz luzzinča. Nižaza wejtnacatan Aristarco cjita žoñitača. Niiqui Tesalónica wajtchiz žoñitača. Tesalónica watjaqui Macedonia yokquintača. ³Jaka tažuqui Sidón cjita wajtquin irantichinča. Jalla nicju Julio capitanaqui Pablužquiz tsjii favora paachiča, Pablužquiz permiso tjaachiča niiz mazinacžquin tjonznajo atintita cjisjapa. ⁴Nekztanaqui Sidón wajtquiztan ulanžcu Chipre cjita zkolta yoka watchinča. Zkar latu watchinča tjamiž cjen. ⁵Jalla nekztanaqui Cilicia nižaza Panfiliaž niiz waruñ chawc kota kajkchinča Mira cjita watjacama. Mira watjaqui Licia cjita yokquintača.

⁶Jalla nicju zultatž capitanaqui tsjii Italia ojkñi warcu zalchiča. Nii warcuqui Alejandría wajtquiztan ulnatča. Jalla nii warcuquiz capitanaqui wejrnac luzkatchiča tira ojkzjapa. ⁷Nekztanaqui tsjii kjaž maj ojkchinča zumat. Ancha tjamiž cjen ch'aman irantichinča Gnido cjita yokž wartuñtan žcati. Nižaza nii ancha tjamiž cjen Salmón cjita yok žcati watchinča. Nekztanaqui Creta yok žcati irantican tajachuc muytižcu ojkchinča. ⁸Tjamiž cjen, ch'aman ojkcan Creta cjita yok žcati ojkchinča. Nižtami wejrnacqui irantichinča Buenos Puertos cjita watja, Lasea wajtž žcati.

⁹Jalla nicju irantizjapaqui walja timpuqui pertitača. Auti timpu irantisquiz cjen, tjamiqui tirapan tjamchiča. Jalla nižtiquiztan anawalitača chawc kotquiz ojkzqui. Jalla nižtiquiztan Pabluqui chiižinchiča, ¹⁰tuž cjian:

—Jilanaca, wilta ojkzqui anawaliž cjequiča. Warcumi cargami pertisnačhani nižaza učhummiž ticznasača.

¹¹Nii zultatž capitanazti Pabluž čiita ana cazziča. Warcuchiz tuyñumi, nižaza warcuž capitanami, jalla ninacž takukaz nonziča. ¹²Nii wajtquiz auti timpu watzjapa, warcužtaqui anatača cuza. Jalla nižtiquiztan jos tjappacha ninacaqui pinsatča nawjctan ojkz tsjan cusa, nii. Fenice cjita wajtquin irantis pecatča jaknužumi. Fenice watjaqui Creta yokquinzakaztača. Nii wajtquiztan cheržtaqui pajk kota tjenča warutuñtan, užatuñtan. Jalla nicjuñtača waliqui auti timpu watzqui.

PAJK KOTQUIZ ANAWALI WATCHIČHA

¹³Jalla nekztanaqui warutan zuma queržcan ninacaqui pinsichiča, tira

ojkzjapa. Jalla nekztan ninacaqui zarakchiča. Creta yok tjiyaranpan ojkchiča. ¹⁴Tsjii kjaž majquiztan tsjii walja pjursanti tjamiqui tjonchiča užatan tuwantan cheechi. ¹⁵Nekztanaqui tjamiqui warcu chjitchiča chawc kot mor kjutñi. Tjamž kjutñiqui anataž wira ojkchuca. Jalla nižtiquiztan jakzichuckat tjamiqui učum chjichačhani, jalla nicjupankaz okačhani. ¹⁶Jalla nekztanaqui Clauda cjita kolta yokž waruñ watchinča. Jalla nicjuñ watan tjamiqui anatača ancha pjursanti. Tsjii kolta warcuqui pajk warcuž wirquiz mojkžtatača. Ana ancha tjamiz cjen nii kolta warcuqui pajk warcuquiz tewziča ch'aman. ¹⁷Jalla nuž tewzcu, nii pajk warcu kojchnacžtan zumpacha t'ejžtatača, ana cjacsnajo. Jalla niiran yok pjila želatča Sirte cjita. Tjamiz cjen nii yok pjilquiz julz eksnatča. Jalla nižtiquiztan nii pajk pañuz cherchi pajk tultu apakchiča warcu tsewctan. Nekztanaqui tjamžquiz warcu chjitskatchiča. ¹⁸Niiz jaka tažuqui nii tjam queraqui tira walja pjursantitača. Jalla nižtiquiztan nii warcuquiz žejlñi kuzinacaqui pajk kotquiz tjojtatača. ¹⁹Jalla niipa tažuqui warcuž cusasanaca kot kjazquiz tjojtchinča wejtnaca kjaržtan. ²⁰Tsjii kjaž majquiztan ancha ch'orawitača. Jalla nuž ch'orawiž cjen anaž tjuñimi warawarami tjenatča. Nižaza nuž ch'orawiž cjen wejrnacqui “Ticznačhani. Anaž jaknužumi liwriyasacha”, nuž cjican chiichinča.

²¹Tsjii kjaž maj ana čjeri lujlchi cjen Pabluqui ninacž taypiquiz tsijtsiča, tuž cjican:

—Jilanaca, anatača učumqui Cretquiztan ulansquiz, wejt taku cazpantača ančhucalaqui. Nižaza anaž carginacami pertitasača,

nižaza učumqui anaž tižta sufritasača. ²²Anziqui ančhucqui tjup kuzziz cjisna, anača llaquiza. Tii warcuž katanami, anaž jakziltami ticznaquiča. ²³Wejrqui Yooz sirwuča, nižaza Yooz partitča. Zez ween Yoozqui tsjii anjila wejtquiz cuchanžquichiča. Nii anjilaqui wejtquiz jecžquichiča, ²⁴tuž cjican: “Pablo, ana eksna amqui. Roman chawc jilirž yujcquiz prisintistanča amqui. Jaziqui amiž cjen tjapa amtan chica ojkñi žoñinaca žetaquiča”. ²⁵Jilanaca, anača llaquiza. Wejrqui Yoozquin tjapa kuztanča. Jaknuž nii anjilaqui chiitčaja, jalla niicamaž cumplisnaquiča. ²⁶Kot taypiquiz tsjii kolta yoka žejlča. Jalla nii yoka irantiž cjen warcuqui yokquiz čhjākžcu, tsijtsnaquiča kjazquizpacha. —Jalla nuž paljaychiča Pabluqui.

²⁷Jalla nekztanaqui pizc simana ojktiquiztan, Adria cjita kot kjazquiz želan, tjamiqui warcu chjichatča. Jalla nii ween chica arama warcu joojooñinacaqui pinsichiča, yokquin irantičhani, cjican. ²⁸Jalla nižtiquiztan kjazquiztan kozzuc yokquin tupžcu, zizziča quinsa tunc sojtan metro. Nižaza tsjii kjažtapacha ojkžcu wilta tupzizakazza. Jalla nuž tupžcu, zizziča paatunc pakallakun metro. ²⁹Kjaz kosten maz akji želačhani cjican pinsichiča. Nekztan warcu wirquiztan tsjii pajkpik pajk jirunaca quijtsiča ana nii maz ajkquin čhjākajo. Ekskan tjuñi tjewks tjewznatča. ³⁰Jalla nuž tjewžcan, nii warcu joojooñinacaqui pinsichiča, warcuquiztan atipasjapa. Jalla nuž pinsižcu, nii tewžta kolta warcu kjazquiz chjiwnatča. Jalla nuž chjiuncan nii pajk jirunaca quijžtažokaž cjetča nii warcuž yujcquiztan. ³¹Jalla nuž cheržcu, Pabluqui zultatž capitanžquiz

paljaychiĉha niĉaza zultatunacĉquizimi, tuĉ cjican:

—Nii warcu joojooĉinacaqui ana tii warcuquiz eclaquiĉ niiqui, anĉhucqui ticznasaĉha.

³²Nuĉ nonĉcuqui zultatunacaqui nii kolta warcu mojka kojchnaca pootĉinchiĉha kolta warcu kjazquin tjojtsnajo.

³³Jalla nii kjantati Pabluqui taku tjaachiĉha ĉhjeri lulajo, tuĉ cjican:

—Pizc simana tjontaĉha anĉhucmi kuz turwayzi ana tjaĉhi niĉaza ana lulĉhi. ³⁴Niĉtiquiztan anĉhucqui ĉjulullamekaz luljznalla, azi tanzjapa. Anaĉ jecmi wira apt'isnasaĉha. Niĉaza ana zinta ĉhjojrigha cjequiĉha.

³⁵Jalla nuĉ chiiĉcu Pabluqui tsjii t'anta tanzĉha. Niĉaza Yooz Ejpĉquin sparaquiĉ cjichiĉha tjapa nii ĉejlĉni Źoĉinacĉ yujcquiz. Jalla nekztanaqui nii t'anta kjolĉcu lulĉhiĉha. ³⁶Jalla niĉtiquiztan tjapa nii Źoĉinacaqui luljsquin kuzziz cjissiĉha. Nekztan lulĉhizakazza. ³⁷Nii warcuquiz paa patac pakallawk tunca sojtan Źoĉinacataĉha. ³⁸Jaknuĉt zapa mayni pecĉhaja jalla nuĉ lulĉhiĉha. Jalla nuĉ lulĉcu nii parti trig kuzinaca kjaz kotquin tjojtchiĉha nii warcu cjeĉu cjejajo.

WARCU KJAZQUIZ KATCHIĉHA

³⁹Tjuĉni tjewktanalla, warcu joojooĉinacaqui nii yoka cherĉcu ana pajatĉha. Pero tsjii puj atquin pjila iĉĉta k'ar yoka Źelatĉha. Nii yokquin warcu tsijtskatz pecatĉha. ⁴⁰Jalla nekztanaqui nii pajk quijĉtza jirunacĉquiz mojka kojchmi pootchiĉha. Kjazquizpacha cutziĉha. Niĉaza kochnaca jwerĉcu, warcu irpiĉni maderanaca cutsiĉha. Nekztan pajk tultu, warcu juntuĉ tucquin tsijjipsiĉha tjami tanzjapa. Jalla

niĉtiquiztan warcuqui puju iĉĉta yoka Źcatĉinchiĉha. ⁴¹Jalla nuĉ Źcatĉincan, pizc curinti ojkiĉ kjaz jalla nekz cjissiĉha. Jalla niĉtiquiztan nii warcuqui kjaz koztan yokquiz quijtsiĉha. Warcu tucquiztanaqui pjilquiz luzzitaĉha. Ana jaknuĉquin kissiĉha. Niĉaza warcu wirquiztanaqui kjaz ljojkikaĉ warcu kjolatĉha. ⁴²Jalla nuĉ cjen preso itzĉni zultatunacaqui preso Źoĉinaca conz pecatĉha, ana atipskatzjapa kjazquiz naran. ⁴³Zultatĉ capitanazti Pablo liwriiz pecatĉha. Jalla niĉtiquiztan presonaca conawc cjen atajichiĉha. Nekztan mantichiĉha, tuĉ cjican:

—Kjazquiz narĉni zizĉni Źoĉinaca, anĉhucqui primiraqui kjazquiz luzna, yokquin irantizjapa. ⁴⁴Parti Źoĉinaca, anĉhucqui tabla tanĉcu kjazquiz zakaz luzna. —Jalla nuĉ mantichiĉha nii capitanaqui.

Jalla nuĉ tjappacha yokquin irantichiĉha. Ana zinta ticziĉha.

PABLUĉ MALTA YOKQUIN KAMTA

28 ¹Jalla nuĉ yokquin ulanĉcu, nii kolta yokĉ tjuu zizzinĉha Malta cjitatakalĉha. ²Jalla nii yokquin Źejlĉni Źoĉinacaqui wejrnaca ancha wali atintichiĉha. Niĉaza tsjii pajk uj taazinchiĉha wejrnac kutnajo. Chijniĉ cjen zaquiĉ cjen wejtnacaltajapa uj taazinchiĉha. ³Nekztanaqui Pabluqui kjoĉ ĉup aptichiĉha. Nii ĉup ujquin tjojtan, tsjii zkoraqui uj kjakiĉ cjen ulanĉquichiĉha Pabluĉ kjarquin ch'atzi chejĉhipacha. ⁴Jalla nuĉ cherĉcu nii yokchiz Źoĉinacaqui tuĉ cjejassiĉha:

—Tii Źoĉiqui Źoĉi conĉiĉzlani. Kot kjazquiztan liwriitaĉ cjenami Yoozqui anat munĉhani, tiiz ĉejtzm.

⁵Pabluqui kjarquiztan zkora tsajttsajtsiĉha ujquiz. Zkoraĉ ch'attaĉ cjenami anapan kjaĉ cjissiĉha Pabluqui.

⁶Tjapa nii žoñinacaqui Pabluž kjarat tjuwačhani cjican chekznatča. Nižaza tsjii ratuquiztan ticzit cjee tiiqui, jalla nuž pinsatča nii žoñinacaqui. Jalla nuž ažk tjewžcu, Pablo ana kjaž cjissi cherziča. Jalla nižtiquiztan pinsita campiižcu, nii žoñinacaqui cjichiča:

—Tii Pabluqui cheka Yoozzalani —cjican.

⁷Ulanda yok žcati nii yokchiz jilirž yokanaca želatča. Nii jiliriqui Publio cjitatača. Jalla niiqui wejrnaca zuma risiwchiča. Čhjep maj wejrnac zuma atintichiča. ⁸Publiož ejpqui laa želatča, tsjii ch'ujlñi conžtan, nižaza jawžtan. Pabluqui nižžquin tjonžñi ojkičiča. Nekztanaqui Pabluqui nii laa žoñžta Yoozquin mayizichiča, čhjetinzjapa. Nekztanaqui niž juntuč kjaržtan lanžcu, čhjetinchiča. ⁹Jalla nižtiquiztan parti nii yokquiz žejlñi laanacaqui tjonchizakazza, jalla ninacami čhjetintatača. ¹⁰Nuž čhjetintiquiztan nii žoñinacaqui wejtnacquiz walja rispitchiča. Čhjep jiizquiztan wila tsjii warcuquiz luzzinča. Ima nii warcu luzan, nii žoñinacaqui walja zuma žaka cjižinchiča, wejrnaca ojczjapa.

PABLUQUI ROMA WAJTQUIN IRANTICHIČHA

¹¹Warcuqui nii yokquiz auti timpu watchiča. Alejandria wajtquiztan tjonchitača. Nii warcuž tucquin pizc yooznacchiztača. Cástor y Pólux cjitatača nii pizc yooznacaqui. ¹²Nekztanaqui warcuquiz ojkan, Siracusa wajtquin irantichinča. Jalla nicju čhjep maj kamchinča. ¹³Jalla nekztan warcuquiztan tira ojkinča. Nekztan yok žcatiran ojkan, Regio cjita wajtquin irantichinča. Niiž jaka tažuqui wartan queržquichiča. Jalla nuž queržcan pucmajquiz

irantichinča Puteoli wajtquin. ¹⁴Jalla nicju tsjii kjažultan Yoozquin criichi jilanacžtan zalchinča. Jalla ninacaqui wejtnacaquiz invitchiča ninacžtan tsjii simana kamajo. Jalla nekztanaqui Roma wajt kjutñi zarakchinča.

¹⁵Roma wajtchiz Yoozquin criichi jilanacaqui wejtnacaž tjonz quintu zizzitakalča. Jalla nekztan wejtnacatan zali ulanžquichiča. Jalla ninacaž nuž zalzquichiquiztan, Pabluqui Yoozquin sparaquič cjichiča. Nižaza juc'ant tjup kuzziz cjissiča. Wejrnacqui ninacžtan zalchinča Foro de Apio cjita yokquin, nižaza Tres Tabernas cjitazakaztača.

¹⁶Jalla nekztanaqui Rom watja irantitanaqui nii capitanaqui preso žoñinaca intirjichiča roman zultatž jiliržquiz. Pero nii capitanaqui Pablo kamkatchiča wejkquin tsjii guardiñi zultatžtan.

PABLUŽ KAMTA ROMA WAJTQUIN

¹⁷Čhjep majquiztan nuž irantižcu, Pabluqui kjawzkatchiča Roma žejlñi judío jilirinaca. Jalla nuž Pablužquin tjontan, Pabluqui ninacžquin paljaychiča, tuž cjican:

—Jilanaca, wejrqui roman zultatžquiz preso intirjitatača Jerusalén wajtquin, ana čhjulumi judionacž quintr paachi cjenami. Nižaza ana čhjulumi učum tuquita ejpnacž cuzturumpi quintr paachi cjenami. ¹⁸Wejr zumpacha pecunžcu, ninacaqui wejr cuts pecatča. Wejt quintr ana čhjul ujmi watchiča, wejr conzjapaqui. ¹⁹Judío partinacasti ana munchiča. Jalla niztiquiztan roman chawc jiliržquin wejt quija tjtaznažo maychinča. Jalla nuž cjenami, wejrqui wejt wajtchiz žoñinacž quintr ana čhjul uj tjeeskatz pecuča. ²⁰Jalla nižtiquiztan ančhuc kjawzkatuča

ančuca cherzjapa, nižaza ančhucatan parlizjapa. Učhumqui Israel wajtchiz žoñinacčhumča. Jalla učhumqui Yooziž cuchanžquita žoñi tjewža. Jalla nii tjewža žoñi sirwiñiž cjen wejrqui tii carinžtan čhejlta želuča.

²¹ Jalla nekztanaqui nii judionacaqui cjichiča:

—Wejrnacqui am puntuquiztan ana čhjul cartami risiwčinča Judea wajtquiztan. Nižaza nii nawjctan tjonchi judío jilanacami anaž am quintra čhiča. ²² Wejrnacqui amiž pinsita takunaca nonz pecuča. Tjapa wajtquizimi tii ew yekja t'akž quintra čhiča. Jalla nuž zizuča.

²³ Jalla nekztanaqui tsjii tjuñi citchiča. Jalla nii citta tjuñquiziqui walja žoñinacaqui tjonchiča jakziquin Pablo alujassi želatčhaja, jalla nicju. Jalla nuž žoñinacaž tjonžcu Pabluqui ninacžquiz paljayčiča wenstanpacha zezicama Yooz mantita kamañ puntuquiztan. Pabluqui ninaca zumpacha intintiskatz pecatča Jesucristuž puntuquiztan. Moisés liiquiztanami nižaza profetanacaž cjijrta liwrunacžquiztanami punta punta čhižinčiča, ninaca zuma intintazajo Jesusiž puntuquiztan.

²⁴ Yekjapanacaqui Pabluž nuž čhiita takunaca catokčiča. Yekjapanacazti niiž takunaca ana nonziča. ²⁵ Jalla ninacpora Jesucristuž puntuquiztan ch'aascan, nužquiz ninacaqui wichanži kallantichiča. Ima okan, Pabluqui cjichiča:

—Espíritu Santuqui Isaías cjita profetžquiz paljayčiča učhum

tuquita ejpnacžjapa. Ančuca puntuquiztan werarapan čhiichiča, tuž cjican:

²⁶ “Oka, tii žoñinacžquiz paljayža, tuž cjican: Ančhucqui nonzñeeka nonznaquiča, pero ana intintazasača. Nižaza chekzñeeka chekznaquiča, pero ana cumprintasasača. ²⁷ Jalla nuž cjequiča. Tii žoñinacž kuznacaqui walja tjupiča, ana Yooz taku intintizjapa. Nižaza oñižtakazza ninacaqui, Yooz taku ana nonzjapa. Nižaza zuražtakazza Yooz paatanaca ana cherzjapaqui. Jalla nižtakaz žejlča ana intintiñi kuzziz cjisjapa. Nižaza ana wejtquin cut'iscaquiča, liwriita cjisjapa”.

²⁸ Jalla tekztan nawjčhuc tii liwriiñi Yooz takuqui parlitaž cjequiča ana judío žoñinacžquin. Jalla nii ziza ančhucqui. Nii yekja wajtchiz žoñinacaqui tii liwriiñi Yooz taku nonznaquiča.

²⁹ Jalla nuž Pabluž čhiitiquiztan, judionacaqui ojkčiča, ninacpora ancha ch'aascan.

³⁰ Pabluqui pizc wata intiru nii aquilta kjuyquiz kamčiča. Jakzilta niižquin tjonžni žoñimi zuma risiwñipanikaztača. ³¹ Jalla ninacžquin parličiča Yooz mantita kamañ puntuquiztan, nižaza Jesucristo Jilirž puntuquiztan. Tjapa kuztan kjana tjaajnatča. Nižaza anaž jecmi Pablo atajčiča, Yooz taku ana paljayajo.